



龜巢彙卷十五

啟

訟伯父墳地上縣宰啟

掩骼埋胔者古今之制其仁如天過家上冢者子孫之情伊誰無地顧邱壟之失所實風化之有傷瀝血寸丹陳情尺素竊念某痛懷伯父曩歷兵戈死雖正狐首之邱時未集鴻飛之澤啟手啟足幸能四體之全歸若斧若堂詎信百年之難保蓋自陵谷變遷之後以致家門摧敗之餘失此故塋屬諸姻黨誰其主之展我甥兮此一錯在乎當時故陸沈至於今日渭陽之舅既無見念於秦龜陰之田那復肯還於魯然豈料人面獸心之輩乃謀爲兔葵燕麥之場雷厲風飛宰木頓空於斤斧日侵月削佳城亦壞於犁鋤殆將見暴骨之寒又何異鞭屍之慘三尺之法不畏匹夫之勇莫當向來不平之鳴屢致逢彼之怒鬪狠不顧輕性命於鴻毛匍匐而歸飽尊拳於雞肋是可忍孰不可忍如之何末如之何徒增蒿里

之悲每動窮途之哭既無面於江東父老復何顏於地下祖宗日月不照之盆弗堪長覆天水違行之訟可憚終凶賴典章有禁地之條其情理實滔天之罪仰惟公道俯察愚衷恭唯某官讀萬卷書爲百里宰冰其清玉其白絃之直稱之平寬猛適中剛柔相濟皜乎不可尚聲飛臺閣恩迆絲綸如某者受塵爲民閉門斂迹亦久被卓魯之化烏敢與虞芮之爭但悲夫九原之人欲掩以一抔之土願施善政垂戒惡人使知見舅如母之親勿爲敗俗亂常之事復此牛眠之地仍爲馬鬣之封想去家舊鶴重歸看銜土慈烏畢集凡春秋拜埽之日皆存亡感激之時上窮碧落下黃泉爲雪幽冥之恥生當隕首死結草弗忘判斷之恩痛切之私敷宣罔既

上于尚書啟

公名傳字受道號止齋延祐乙卯進士

不封萬戶侯願識韓荆州常切慕謫仙之志手把一封書上有皇甫字輒敢叩昌黎之門胡爲乎今日之來曰專爲古人之事與其

進也適我願兮嘗謂傳道不絕者先民之功沒世不忘者後人之義若道鄉鄒忠公之墓近在城陰有了翁陳先生之名流傳天下孰謂此一邱之土盡廢於八世之孫鄉鄰忍於瓜分翁仲隨以蕪沒故諸生爲之歎息於當路鳴其不平賴二侯以公道主盟不半載而佳城復舊築思亭而薦蘋藻立華表以樹松楸苟非記載之詳尚慮耕鋤之患立羊公一片石欲大書名世之言如季子十字碑以昭示尊賢之意雖不咎於既往庶有補於將來求之與之完矣美矣恭唯某官老成前輩文章鉅公三千字禮樂縱橫在早歲修名揭日九萬里扶搖直上至晚年壯氣凌雲典文衡則慎於稱亭秉史筆則嚴於褒貶雲霞一壑今歸老於長洲茂苑之閒霖雨八荒將拜命於安車蒲輪之召斯言非佞輿望所期某曩客新安聞公舊政復紫陽之闕里大振儒風勒黃絹之好辭有光吾道諒弗忘於素志必重念於斯文唯大賢無不容則小子肆有造於以紀前言往行於以發潛德幽光當令梓里之閒永若桐鄉之愛鏘

如韶鈞蔚如虎豹雄文照耀於九京明則禮樂幽則鬼神妙理昭
章於千古存亡有感敷敘莫殫

贊見余用中先生求作辨惑編序啟

狂簡斐成章辨諸家之邪說品題作佳士必當代之儒宗夫辨香
敬爲南豐蓋學者仰如北斗與其進也適我願兮嘗謂璞玉雖奇
非和氏則山中之石琴材固美無中郎則爨下之灰太玄經有覆
醬之譏公羊傳有賣餅之辱古猶如此今豈不然欲立言圖不朽
之傳必取正於有道之士嗟今陋俗舍正路而弗由集古遺言迴
狂瀾於旣倒可奈一齊而眾楚猶如皆醉而獨醒驚人之鳥一鳴
怪雪之犬羣吠願君斲聖爲我折衷或袞袞一字之榮則價倍千
金之重馮豐儻寄寥廓久矣馳情抉雲漢分天章豈辭揮手綱維
吾道黼黻斯文茲蓋伏遇某官文章鉅典刑前輩詞場較藝視
五色之目不迷鄉國興賢使三代之風復振躬行古道歷踐華途
每爲政郡邑之閒常飛英臺閣之上歸從彭澤舊家若北固江山

教若河汾大隱居南徐城市戶外之屨常滿門前之轍何多雖云
遂菟裘之營必復有蒲輪之召如某者俯慙後進仰慕先知尊其
所聞行其所知愧未造高明正大之域博我以文約我以禮誓弗
忘仰鑽瞻忽之誠景慕有餘編摩罔旣

贊見李晉仲提舉求思賢錄序啟

思忠公傳道之賢爲哀遺事辨邪說誣民之枉乃集前言持布鼓
於雷門分天章於雲漢恭惟某官儒林麟角學海龍門鍾山草堂
之英靈雪竹霜松之標致癩折腰於彭澤早賦歸來聊濯足於滄
浪亦云自取皜皜乎不可尚已休休乎其有容焉然吾道賴以綱
維而儒林視爲儀表尚持藻鑿以主文衡名動京師柏府之薦章
交上官居翰苑蒲輪之召命將臨先生自此升學者仰如斗某吳
中晚進白下漫遊自憐如明月暗投誰復念陽春寡和汲汲有登
龍之願拳拳慕倚馬之文方往依劉以圖御李欲因劉堯輔見公
乃于劉處偶得識
面低頭拜東野適因邂逅之閒辦香爲南豐得展殷勤之敬敢持

兩帙謹用三薰長年坐井底觀天此日詣程門立雪儻賜五之
覽必蒙一字之褒登山采玉入海求珠網載乃酬其素志製芟爲
衣紉蘭爲佩激昂正賴其清風

贊見楊廉大提舉求序思賢錄啟

兩袖春風作洛下書生之詠滿船明月過關西夫子之門問何爲
今日之來曰端爲古人之事竊有請也能無從乎伏念某生延陵
季子之邦頗知禮讓復道鄉鄒公之墓當效馳驅樂民俗之還淳
喜士風之近古思賢有錄味道無厭紀前言往行之二三發潛德
幽光之萬一自藏燕石誰售雞林恐公羊遺賣餅之譏使太玄有
覆醬之辱願借春秋之筆特爲月旦之評得一序以冠塵編若干
金而加敝帚庶傳不朽有補將來非唯先哲之有光真乃後學之
多幸茲蓋伏遇某官乾坤清氣風雲壯懷走馬看長安花早歲似
唐人得意割雞爲百里宰居官如言子愛人以文章政事之俱優
宜天下國家之大用尚淹筦庫未展經綸人皆知大器晚成我乃

獲景星快覩題鸚鵡句多年傳麗則遺音到鳳凰池不日遂平生
高志倚須瓜代入覲楓宸如某者敢不長遡下風永懷高誼聞所
聞見所見真如到神仙十二樓之閒步亦步趨亦趨或可在弟子
三千人之列其諸欣慕罔旣敷宣

贊見張用中教授啟

黃魯直謁蘇東坡因述依松之志彌正平過孔北海乃蒙薦鶚之
辭蓋同氣以相求必當仁而不讓敢持尺牘特造丈函恭唯某官
海內儒宗江西詩派往歲爲馬尚書賓客當時有虞學士品題謂
鵬程萬里橫飛期鳳池十年可到道出羲皇才過屈宋何鄭公猶
在於廣文上規姚姒下逮莊騷若韓子獨尋於墜緒先覺覺後已
立立人四方之學者來歸一鼓而斯文作氣博求地利開玄武湖
以廣澤物之功善育人才置治事齋而兼水利之意教蜚臺閣恩
迓絲綸如某者生長吳中栖遲白下顧窮居而獨善恐後世以無
聞著辨惑編辟近世之異端邪說作思賢錄發前修之潛德幽光

欲煩斲郢人之斤輒敢弄班門之斧平居抱膝仰泰山北斗之高
此日承顏覩鳳皇景星之快天其或者道之行與得華袞一字之
袞增敝帚千金之價品題作佳士何慚奏白雪遺音吹噓上清真
或可借春風餘力洪武某年歲次丙子夏六月二十日某書

答陳天倪謝薦師啟

見賢而舉者古先之訓惡敢言功易子而教者夙昔之心幸逢知
已豈意予互鄉之進亦勞賦小山之招恩斯勤斯至矣盡矣恭唯
容齋先生玄玄眾妙休休有容身雖領袖宗門學則淵源吾道小
樓明月勝元龍百尺之豪高枕白雲待丹鳳九重之詔有前人風
烈爲後學範模如某者與緇黃交能青白眼獨喜於墨名儒行非
他人虎質羊皮通家隨三十年責善難一二計茲荷愛烏之及時
塵遺鯉之書曲憐覓梨棗之兒特命入芝蘭之室從明復受春秋
之業看希夷畫太極之圖熊魚何幸乎得兼犬馬當知其所報
道院迎仙書堂隱相增爽氣於西山鄰家乞火小窗分鐙藹餘光於

東壁銘心有感筆舌奚殫

謝監察御史舉茂異啟

天朝重耳目之官實居清要風憲擢山林之士非市私恩蓋竹頭
木屑有可用之時而拔茅茹連乃必然之理敢因奇遇庸布謝言
竊念某家本吳中客茲江左以芰荷爲衣秋蘭爲佩訪鍾山之英
草堂之靈作山川司馬壯遊負湖海元龍豪氣自憐骯髒誰問飄
零瞻烏蒼柏之間歌鳳古臺之下幸逢驄馬蒙試雕蟲叩大小從
容之鳴以盡其聲收輪囷離奇之材而爲之器使李白立階前地
如毛遂脫囊中錐得之若驚觀者如堵茲蓋伏遇某官身居臺閣
腹果詩書凜凜乎動搖山岳之威惓惓乎樂育菁莪之意植公門
之桃李蓄相籠之參苓昔中州草木知名今南國衣冠俱化三省
十道俱聞鐵面之威一日九遷將拜玉音之召風塵一掃霖雨八
荒如某者敢不恆念品題益加修省行日用常行之道讀平生未
讀之書雖蒲柳之質望秋先零而薑桂之性到老益辣惴惴焉出

門下誓不忘一瓣之香耿耿者在胸中當自愛千金之帚
代羽士上廉訪僉事啟

上士無爭奉先師之明訓監主自盜奈公論之難容故鳴鼓而攻
之若同室而鬪者竊念某李老君弟子住焦真人道場小小山林
設住持之主席區區金帛有交代之成規比因樽節年多致有羨
餘日積被前職鼠偷狗竊使空山鶴怨猿驚當市攫金眾所共見
匹夫懷璧罪實難逃已嘗赴愬於有司且復陳詞於教所始則強
項不屈終乃搖尾乞憐乃償薄產以補亡金未幾背插血之盟又
復爲紆臂之奪用朝三暮四之術專務貪婪逞人一己百之能肆
爲欺罔楚方得失秦鏡咨度勞六轡之驅馳廉法廉辦廉善廉能
按百官之能否明月靡遺罅隙清風一掃塵埃睽茲寂寞之濱亦
在照臨之下豺狼斂迹草木知春激濁揚清旣憲綱之振肅舉直
錯枉宜公道之昭章或移北山之文或賜南山之判戒無厭溪壑
之欲征悖入府庫之財庶有補於焚修更無煩於訟謀思之弗措

辨之弗措願亟持全璧之歸得之若驚失之若驚當永守青氈之
業

謝崑山梅州判舉鄉善序

求儒雅闡大猷漢室之興復見經品題作佳士荆州之室爲榮矧
蒙下采於菲葑豈作不言之桃李寸丹有感尺素具陳某官佐理
神州賢勞王事虛心待物明於滄海之珠美德含光粹若崑岡之
玉有賢守與承流宣化在寮案則同寅協恭切切斯民倦倦吾道
冰霜並潔風月平分南山之判不移北闕之心長戀二千石不如
逢掖下士尤勤九萬里直上扶搖前程甚遠吾言匪佞輿望所期
某久客東吳遠逃兵燹功名蹭蹬昔爲竹上之鮎身世飄零今作
無枝之鵲偶爾宿贊公土室儼然追梅仙市門聽高山流水以知
音驚明月夜光以投暗說項不輒薦禰有書駕言采泮水之芹何
異繼廩人之粟驥千里未甘伏櫪鳥一鳴或可驚人翱翔道義之
林涵泳詩書之澤鄉之善士國之善士尚期自下以升高知唯春

秋罪惟春秋勿謂有名而無實

賀陶教授啟

鄭廣文才過屈宋坐一氈而司業相憐胡安定教授蘇湖置二齋而太學爲法升高自下振古如茲恭唯某官胸襟貯萬卷書文章揮五色筆頻年花縣絃歌之化大行今日薇垣贊畫之才方展王公大人以青眼相顧縉紳先生以白眉見稱茲泛綠以依紅將腰金而曳紫一節旣全其清白百憂當念乎羣黎願爲龍伯高勿效杜季良恪守祖傳之家法近舍皇甫湜遠取白居易當求用世之人才跂予望之自此升矣某遠逃兵燹久客句吳秋菊寒泉祠甫里見尊賢之義長洲茂苑頌鄉校輿人之言已知和白雪之詞但未覩景星之象自村落以來至城府見軍民多困於饑寒敢用條陳以效芹獻於以開難發之口於以推不忍之心區區匪釣於虛名懇懇必求其實效蒼生顛厓受辛苦仰羣仙天上清高大庇廣廈俱歡顏願比屋眼前突兀

代謝沈太守啟

一輪明月清輝今照蘇州萬里長風素志乃如宗慤念先人之遺澤挈孤子於長途知幸自天感恩無地恭惟某官乾坤清氣風雲壯懷旣不忘向日之誠且深識隨時之義往年烏府冠峨鴈角之威此日黃堂庭蔑鼠牙之訟退食則斑衣以娛父母傳家則黃卷以授兒孫鞭不施蒲莊先種柳愷悌咸稱召杜勳名必到蕭曹三江五湖之風謠政聲藹藹四海八荒之霖雨民望懸懸遺愛甘棠流芳汗竹如某者仰承公庇勉讀父書旣已承薦鶚之章當不負愛烏之及備參苓於藥籠作桃李於公門庶竭駑材以圖豹變父爲大夫子爲士賴提攜發軔之初車如流水馬如龍願追逐後塵之末其爲報效罔旣敷宣

上沈太守啟

太叔爲鄭大夫始從寬而終猛不疑謁暴公子先言威而後恩唯大海不擇細流故他山可以攻玉請以田夫野老之語陳於大人

君子之前竊以某近寓吳江遠經荒浦聞近日有鼠竊狗偷之輩在各都如蜂屯螳集之多始則穿窬終爲強禦忽忽乎神出鬼沒累累然晝伏夜行星月光中窺商賈他鄉之客煙波深處伺妻孥逃難之人或如斫嚴顏之頭或如斷孤兒之臂橫屍洲渚流血泥沙遺臭衝天銜哀入地掩鼻而過者多矣垂涕而道者誰與鄉鄰懼而不言州縣置之不問致令滋蔓轉肆凶頑目之所覩者如此其多耳之未聞者尤爲不少新鬼煩冤舊鬼哭痛恨難忘他生未卜此生休衷情誰白惟當路發神明之政爲斯民雪冥漠之冤三尺法申明紀綱五色棒埽除羣醜寬猛相濟不勞用萑澤之兵恩威並行何待藉繡衣之斧一雷旣震百蟄俱驚恭惟某官俊傑識時精忠貫日清冰出萬壑比往年烏府威聲明月照蘇州乃今日虎邱佳話甘棠樹聽召伯之頌老萊衣照堂上之親愛民若拙於征科下士能勤於吐握五花馬金章紫綬方被殊恩六柳莊綠水青山未容高興政須治最以候登庸如某者幸獲承顏甚慚饒舌

聞而來見而去仰山斗之彌高道以政齊以刑看民風之丕變與梅知州陸同知啟

葭莠不除必有傷於嘉穀盜賊不息寧無害於良民目前事可爲寒心林下人敢云饒舌俯慙卑陋上瀆高明竊以某爲客松林艤舟荒浦聞近日有鼠竊犬偷之輩在各鄉如蜂屯螳聚之多或穿墉以踰垣或發匱以肱篋或牽去春耕之犢或移人夜泊之舟或劫行商囊物爲之席捲或因逃難妻孥與之偕亡或如斫嚴顏之頭或若斷孤兒之臂慘慘星月見遭毒手渺渺煙波逸去凶身濺血菰蒲伏屍洲渚漂流五都十都之境臭腐六月七月之時里正不敢言恐煩檢覆鄉鄰寂無語懼有干連致使跳梁轉加延蔓天陰地溼但聞冤鬼之聲水遠山長渾是愁人之景惡貫旣滿禁網難逃今有司獲盜竊之徒宜因事究凶強之黨幸毋姑息亟賜施行轟雷霆於掩耳之光照日月於覆盆之下追三窟免須旁求曲徑之蹤殺兩頭蛇方能免後人之患餘罪戾之輕者加徒役而遠

馬庶令涇渭殊流不致薰蕕同器蓋治非常之盜必加非常之刑
雪痛怨於黃泉聽歌謠於綠野恭唯某官同心同德無黨無偏閭
閻蒙撫字之恩案牘絕煩苛之弊訟庭如水印匣生塵明月清風
暫爾居淞江太湖之上高牙大纛翩然到蘭臺鳳閣之間人皆仰
之自此升矣如某者言雖僭越事實昭彰祇緣以冤死狐悲未免
較鶴長鳧短溺猶已溺望明公擴仁愛之心刑期無刑變惡黨爲
仁良之俗幽明有感贊美奚殫

代上江浙丞相求蔭敘啟

上書伏光範門韓愈以布衣自進斗酒酌新豐市馬周於逆旅誰
知仰止三台素非一日唯吐哺握髮以下士敢搜肝瀝膽以陳情
竊念某生毘陵錫谷之墟客吳郡長洲之滸早年勤苦頗讀父書
連歲孤單且罹兵燹妻孥於荆棘垂涕泗於蓼莪學弓爲箕學
治爲裘尚賴傳家之業在無父何怙無母何恃孰憐遊子之歸遲
望西日之長安歎南風之不競鬱鬱居此遑遑何之芟爲衣蓉爲

裳第慚沒世而無聞有負先人之遺澤欲求蔭敘願借恩光雖云
無麟角鳳嘴之奇亦庶幾竹頭木屑之用持衡畱藻鑑天書適降
於九重隨水上龍門巨浪可乘於三級鯤鯢變化鵷鷺翺翔茲蓋
伏遇某官簡在帝心肱股王室保江浙數州之地障東南半壁之
天以和靜鎮國家量同文靖有忠勳塞天地爵比汾陽公門之桃
李欣榮藥籠之參苓並蓄五風十雨頻年見陰陽調燮之功寸地
尺天指日復疆里廣輪之舊恩加袞舄銘在鼎彝如某者幸獲瞻
依宜蒙拔擢大木爲宗細木爲桷良工得適用之宜南山有臺北
山有萊君子致太平之樂永言報效盡力驅馳

賀上海石縣尹啟

郎官應列宿方照臨滄海之秋鴻毛遇順風乃奮起青雲之日敬
陳賀語兼達忠言嘗觀時有盛衰道無今古爲國者必以人民爲
本有司者必以父母爲心擾攘雖值於艱難撫字必由乎古道簡
編所載矩矱具陳曰旣庶旣富而教之曰足食足兵而信矣曰孝

弟可盡堯舜之道曰忠信可撻秦楚之兵唯教化能結其心斯奮發以盡其力小而一邑大者九州是道爲農桑學校之原其事乃錢穀甲兵之屬苟一日而必達斯三年而有成儻不鄙常談老生斯可謂知言君子恭唯某官心存愷悌氣稟高明先世稱萬石君其道義傳家之久今官爲百里宰蓋功名發軔之初以胸中所蘊之詩書爲目下可行之政事征科不廢撫字尤勤春風藹田野如春民無愁歎明月照閭門似水吏絕喧囂釜魚之聲譽已聞鱸堂之禎祥必應行書上考仁見高遷幸屬故知喜聞新政彼客燕皆能賀廈豈窮猿反不投林東入海西去秦儼欲依棲於贊老昔無襦今五袴願同歌詠於吳儂

諸士友陳言陸同知誣枉事

排難解紛竊慕古人之高義舉直錯枉宜蒙當道之至公芻蕘有言菲葑可采竊見吳江州同知陸公某職居佐貳政出循良三載守官一廉如水自許以赤心報國人皆知洗手奉公豈意權豪乃

加排陷以兵戍干有司之政以文移行無妄之災昇一夫病死屍身勒其子巧生詞訟集眾擁停屍之地環若重圍當官逼忤作之人傷皆誣驗強梁若此毒害顯然越官職以橫行違憲章而不顧各州縣聞之而喪膽諸士民觀此以寒心赫然恣逞其凶威甚矣有傷於治體是可忍也尚何言哉仰惟上相之賢明俯察本官之冤枉照覆盆之日月卽見昭彰遏平地之風波毋令陷溺如某等與本官初無私愛且隔鄰封聞一州有賴其主張知百姓多蒙其恩惠昔頌德於三江五湖之上今稱冤於萬口一辭之間其言至公而無私所願抑強而扶弱直爲壯曲爲老當明曲直之情危而持顛而扶庶免顛危之辱宜加采擇特賜施行

上量田徐孟二公啟

立國以經界爲先當盡革其中之弊生民以耕稼爲本方能供在上之需唯任用之得人乃公勤而稱職欲陳梗槩敢效芹誠嘗謂朝廷革命之初才俊爲時而出凡所以體國經野皆可以忠君愛

民況皇家付尺度之公要農畝定租庸之法甲是乙非者固當分
辨鶴長鳧短者尤宜折衷爲前代除毒斂之蛇免後人爲涸轍之
鮒此當務之爲急其任非輕但至公而無私所行必達恭唯某官
同心同德無黨無偏志如百鍊之鋼不爲繞指事若重調之瑟能
用改絃雖寸田尺宅皆入版圖而賸水殘山猶蒙紀錄田野旣揚
其聲譽銓衡必錄其勤勞同升諸公一臺二妙某生本常郡寓此
吳鄉如去邠而居岐敢因徐而見孟願求荒圃學爲老農春雨一
犁駕烏犍而東作青雲萬里看黃鵠之雙飛

上王知府啟

玉門關兩鬢秋風歸來晚景金牛臺一輪明月喜把清輝人皆作
未暮之春我欲快爭先之觀騎竹失隨於童子杖藜敢謁於宵人
旣獲披雲亦言獻曝嘗謂農業者民生之本學校者風化之原其
在有司直爲急務睠此常郡卽古延陵二十年兵革以來數百里
人煙欲絕犁鋤不作絃歌無聞大田皆變爲荆榛泮宮亦燬爲瓦

礫今天下全歸於大統而郡中方集其遺黎如谷寒而吹律重溫
若絃斷而麟膠再續民何以勸唯恤民則民乃力農學何以興惟
重士則士皆志學嚴一鼓而作氣必三年而有成田野闢而賦稅
增教化行而習俗美上以副聖天子明詔之意下以著賢宰侯善
治之功斯文黼黻於皇猷舉世甄陶於清化渤海郡勸農龔遂復
見於今成都府興學文翁罔專於昔苟二端之並舉則百廢之具
興幸無謂老生常談真可與古人同傳恭惟某官三槐世胄五馬
恩榮金莖露之澄清玉壺冰之潔白有民人有社稷雅稱弘才爲
保障爲繭絲會能兼美飽夙學於胸次急當務於目前報主赤心
待士青眼吐握行周公之禮謙德彌光循良希漢吏之賢芳名不
朽如某者然歸魯得此依劉三十年辛勤有廬欲訓城南之
子千萬閒突兀廣廈願蒙庇天下之寒頌禱有餘敷宣罔旣

謝孫大雅惠詩文啟

寄杜甫題華堂舉世頌高公之句送李愿歸盤谷至今傳韓子之

文故詞章誠有可嘉則名譽皆爲不朽感承傑作敬敘謝言某生長延陵本同鄉土僑居吳郡因避風塵既聲迹之相聞且音問之不絕千萬人之前常承說項十五年之內唯欠識荆嘗結巢爲蓮葉之龜來詩甚美至還家若華表之鶴得序尤佳顧予生非李杜之傳視所作乃高韓之比陽春寡和明月暗投巾箱謹於珍藏棊几時乎圭復想丰采於氛埃之外見肺肝於文字之間投桃報瓊茲抒情於尺素如葭倚玉別請教於文函恭唯某官以申甫之澄清鍾於姿稟以君山之秀氣發於文章驅馳莊騷出入佛老鳴教鐸東吳者久投朝簪北海■枕流漱石而有祖風弄月吟風而忘世慮山中曆日看黃楊厄閏之年天上春風待紅杏倚雲之日如某者素慚孤陋雅愛交游味六經如嗜膏梁觀三益便成膠漆江東暮雲之酒願與論文山陰夜雪之舟尚期乘興雷門持鼓雲匠揮斤

謝張雲門作詩序啟

魯直獻東坡二詩蓋欲見瞻依之志士安敘左冲三賦方能無非議之詞蓋當世之鴻儒乃後學之龜鑑寸丹方感尺素具陳伏念某田野草莽山林樛櫟不揣鉛刀之鈍常持鐵硯之堅鮎上竹竿往歲之功名可笑龜巢蓮葉近年之身世如浮八九家寂寞江村三千丈蕭騷白髮出言爛熟作字迂疏寤疑辨惑以成編懷古思賢而有錄頽然詩癖忘乃途窮時抱膝爲梁父吟或掩鼻作洛生詠對明月清風而思玄度蘊高山流水以待鍾期持鼓雷門探珠驪頷得警策片言而爲幸豈春容大篇之敢望珠璧暗投瓊瑤匪報不識面而知肺肝可謂神交如寫容而見精神珍藏手筆披雲未遂仰斗彌高恭唯某官四海儒宗一門科第爲時而出不勝烏鳥之情謝病而歸非爲鱸魚之美以東吳之山水爲西漢之文章託古意於焦桐播遺芳於叢桂風月襟懷江湖雅氣本磊落之奇才泉石膏肓煙霞痼疾享優游之清福道則高矣人皆仰之如某者敢不佩服斯文勉旃爾力弊甚千金之帚榮哉一字之裒廢繩

墨不爲拙工灼見用春秋之筆經品題便作佳士惟恐孤月旦之
評瞻企依依臨書草草

擬與金壇縣告索尹氏寄書啟

賣金買書自是平生之志刻舟求劍難忘眷念之情雖吳霜已白
其頭顱惟秦鏡能明其肝膽敬持尺素用寫寸丹念某辟地昔年
泛湖連日移舟至尹干橋下依乃姻家藏書如孔氏壁中扇諸奧
室物其多矣人皆見之十三年賤迹飄蓬數百卷常懷汗竹豈知
瓜葛乃變薰蕕以諸史之青編易兩牽之黃牘餘存簡牘悉入巾
箱屢云還合浦之珠竟不返連城之璧且經夕史欲重對於聖賢
甲是乙非合辨明於官府是可忍孰不可忍求之與抑與之與唯
當道之至公庶斯文之不墜聽其言也適我願兮恭唯某官承恩
九重出宰百里乃冰其清乃玉其白如絲之直如鏡之明以識時
俊傑之才了積年煩劇之事戴星出入雙鳧暫止於金沙搏風扶
搖孤鳳必巢於阿閣某遠來鄰邑如倚太山鶴溪水天影涵秋比

琴堂之清澈米家船虹光貫日載書篋以還歸
擬謝常州府官啟

曾參以同姓殺人其母嘗投杼而走黔易非在家邁疾厥子乃驚
心而歸奈何事出於比鄰甚至弊生於本邑幸大府能爲辨析今
微言合用敷陳竊念某乙老窮居若守株於橫峴丁男復遠出因負
米於荆溪疊疊乎縣帖拘迫纍纍乎里人被執始自三月三修禊
之日阜隸登門遂令八十八老耄之年倉皇赴縣換名字如雲翻
雨覆動文移則雷厲風飛陷阱欲成網羅交設南阮貧非阮富姓
雖同而產業不同東家丘西家愚人有異而鄉閭亦異故奔訴甘
棠之下蒙戒愆刻木之徒號咷徹於二天枉屈爲之一雪伏遇某
官等同宣聖化並著仁聲召父杜母之慈祥春濡秋露馨弟梅兄
之清白月映冰壺閭閻興擊壤之歌城郭寢擊柝之響行書上考
仁侯高遷如某者父子知恩鄉鄰感德覆蕉藏鹿本無夢於前時
緣木求魚免受災於後日報當銜結力效驅馳

上周縣尹請祭顧將軍啟

孔北海表鄭公鄉人皆起敬文潞公題明道墓學者知歸蓋追敬於儒先實有裨於風化敢持尺牘用徹琴堂某老不趨時心猶好古覽中吳之勝槩訪前代之名賢笠澤西頭黃天蕩煙波相接葑門東畔顧將軍邱壟猶存叢祠依馬鬣之封荒蘚沒龜蚨之石每經斯地常念斯人生爲吳相之孫死有元公之諡華亭二陸初齊名得三俊之稱白羽一麾獨仗義平六州之亂晉史備書其勳業吳儂尚保其祠塋但每歲之烝嘗欠有司之遵豆不揣效豐干饒舌敢云煩陶令折腰蘋蘩失薦於鬼神桑梓益加其恭敬此非違道以干譽幸不以人而廢言恭唯某官以董賈之才爲卓魯之政乃冰其清乃玉其白如絃之直如鏡之明見義勇爲當仁不讓有民人有社稷國家委任之隆教禮樂教詩書流化承宣之急行書上考位見高遷某漂泊長洲蕭條短褐投老二天之下知名兩月之間其言至公而無私其事似緩而實急生芻一束其人如玉望

喬仙雙鳥之鳧寒鴉數點流水孤村弔華表千年之鶴

千陳敬初先生作懷古錄序啟

懷賢千古聊綴緝夫前言借重一辭庶流傳於後世竊有請也能無從乎睠我楚狂久客吳下過鳳凰嶺顧彥先之墓有感而傷情傾鸚鵡杯李太白之詩長歌而擊節甚矣疾薰蕕同器忍乎隨桃李不言豆邊既請於有司丹青乃新其遺廟屏除妖豸祭掃佳城搢紳皆爲之詠歌樵牧則嚴於禁約載噓黎烝用寫蒲編於以發潛德之光於以紀廢興之事過雷門持布鼓敢曳長裾扶雲漢分天章煩揮椽筆恭唯某官居玉堂之署人慕登瀛紉石室之書自當名世爲士林冠冕演王國絲綸目短曹劉汗流籍湜大鵬九萬里扶搖直上之秋黃河三千年會見重清之日前程遠大吾道光榮某不揣迂疏尚希題品書八篇因窮而著初不效於古人賦三都得序而傳誠有望於今日

代上饒參政啟

叔向知饒蔑因聞堂下之言毛遂從平原乃脫囊中之穎既古人有如此者豈今日獨不然乎竊某幼讀父書從遊都邑聞所聞見所見囿先生長者之鈞陶步亦步趨亦趨習王公大人之規矩辭親日下棒檄浙東干戈擾攘者閱五六年鞍馬驅馳者知幾千里及區區益升斗之祿又紛紛服州縣之勞栖枳棘於慈溪望蓬萊於滄海既失怙恃遂用來歸兄弟飄零狀若喪家之犬功名蹭蹬誰憐失水之魚然此膝不屈於常人而其志敢忘於斯世家徒四壁壯氣橫秋但知讀書以聖賢爲師未嘗出門與流俗爲伍高山流水賴有知音明月夜光忍令投暗鷲鷲之書既作鯢鯨之化何疑唯大匠無可棄之才宜小子有相依之志葭苓藥籠桃李公門恭唯某官俊傑識時耿介拔俗隴雲可悅已常似山中宰相之間仁風載揚今復慰天下蒼生之望胸次炯玉壺冰露文章垂金薤琳琅借箸而籌入則告嘉謨於公府累茵而坐出則參大政於薇垣已立立人先覺覺後行吾道於干戈之際救斯民於塗炭之中

幾千仞廬山眾人共仰五百年名世匪公而誰如某者慕藺許年依劉今日韞綬之才雖短菲葑之采不遺朝取一人暮取一人莫非荷提撕之力待以國士報以國士當不忘感激之恩輕瀆崇嚴重加悚息

上張太尉啟

蘇轍上韓太尉書所願觀賢人光耀馬周寓常中郎館卽能以時務條陳不揣下愚敢希前輩敬以恤軍愛民之事陳於王公大人之前聞斯行之時則可矣嘗謂有民有社須當畫策以治安足食足兵乃可運籌而征討斟今酌古發政施仁苟欲展心上之經綸尤先察目前之利病勿求近效宜作遠圖開荒田則爲富國之原設屯政則爲守邊之計除民瘼則免誅求之苦積兵米則無匱乏之憂廣鹽權之法則遠近流通恤軍士之家則存亡感激凡茲六事盡在一時日月雖明固難照覆盆之地風雨不動願蒙庇廣廈之天布以新條革除舊弊唯其愛民如子必不以人廢言詢我蜀

蕘教人稼穡易其田薄其稅民力方舒居有倉行有糧兵威自振
幸無吝一舉手一投足之力更勿辭三握髮三吐哺之勤庶士夫
得進其忠言而軍民免令其失所恭唯太尉相君英雄蓋世度量
容舟以崧高維岳之英靈爲海內百川之襟度興利除害更張漢
瑟之絃革故鼎新重作禹書之貢西鄙之煙塵去遠東吳之風俗
還淳見諸生如見大賓保斯民若保赤子天上天下咸知向日之
忱江北江南共仰福星之照名垂竹帛勳在鼎彝某十年風塵一
逢煙雨辟地居淞江之滄憂天如祀國之人功名雖負於素心窮
困尚憐於黔首或有於一得何忍於三緘知我春秋罪我春秋欲
救顛厓之辛苦待以國士報以國士終當範我以馳驅俯竭葵傾
仰希藻鑑

賀蔡教授到任啟

建學立師本三代之良法化民成俗卽二南之遺風夫以世衰而
道微其必人存而政舉喜聆木鐸敢進芻言睠此崑山舞丹崖之

鳳石沛然婁水接蒼海之鯨波以山川如是之奇況人物由來之
盛紛紛顯宦比比高門豪如劉龍州而寓焉賢若李樂庵以居此
適值近年之兵革遂忘舊日之衣冠都城是而人民非禮義廢而
政教失幸鄉校之不毀令學宮之苟完有司奔走於豆籩多士趨
踰於禮樂但龍蛇之混雜有鳧鶴之短長中也養不中才也養不
才政賴鈞陶之力仁者謂之仁知者謂之知豈無區別之心唯自
今秦鏡之明更不致齊竽之濫大宋小桷匠氏固無棄才貴玉賤
碯識者自能定價嚴一鼓以作氣必三年而有成恭唯某官心醉
六經眼空四海杏花壇上重來鼓焦尾之琴荷蕢門前試聽擊有
心之磬胸次炯玉壺冰露文章垂金薤琳琅曩常淮海維揚人
共仰泰山北斗能不失前賢規矩直可爲後學範模苜蓿闌干且
莫厭一官之冷菁莪長育當挽回吾道之春立登要津入居翰苑
如某者蹉跎仕路流落他鄉不能看長安之花乃亦采泮池之藻
聞所聞見所見星鳳見覩而快哉步亦步趨亦趨蘭鮑久居而化

矣

爲王叔才通吳伯善啟

魯連爲解紛而出斯爲天下之奇陳平能宰社而均終作朝中之相苟有爲於今日亦何異於古人今一見之竊有請也恭唯某官河山清氣邱壑閒情雖爵祿不入其心唯孝友是亦爲政車乘下澤稱鄉里之善人樓臥上牀本湖海之豪氣律呂鳴朝陽之鳳階庭無荀氏之龍惟其博古通今所以出類拔萃有文舉座上之客而開樽常滿聞鸞蔑堂下之言而執手相知近者悅遠者來親疏無閒剛不吐柔不苟好惡唯公恭唯某官藏器待時在邦必達某許年慕藺此日識荆深知有長者之風輒敢訴不平之事曩余有子勉作鹽商同客嘉禾王吉父與成交易親書片楮孔方兄俱付檢收不料墮其計中從此置諸度外屢約屢爽轉富轉貧但知堆滿屋之金不肯返連城之璧况視予之流落竟縱意而欺陵獸心忍負於朋儕狡窟乃居於仁里望公秦鏡照我覆盆能扶顛以持

危乃舉直而錯枉風行草偃水到渠成是猶解歡國之紛何異宰鄉人之社道之禮樂示之好惡豚魚必感而相孚失之東隅收之桑榆犬馬當知其所報心有所憤書不盡言

爲王叔才等訴神文

互古互今人世有難明之事誰曲誰直鬼神能灼見其情唯聰明正直之有司必禍福吉凶之有報請陳始末用徹幽明竊念某至正十有五年作構李異鄉之客統鈔三百餘錠買吳江同姓之鹽託在契交信從期約立文憑之一紙比重諾之千金豈其反面無情從此掉頭不顧彼已跨腰錢之鶴我乃求緣木之魚日往月來馴致遷延之久雲翻雨覆不勝變詐之多故連年空打白厓至今日竟成烏有交情既絕禮貌全無本來似鮑叔相知每去如魯侯不遇彼因積富致嗔物之如山我則固窮避兵戈而失路不念流離之苦轉加欺罔之心日月不照於覆盆風雨自安於廣廈昔伊過我待爲席上之珍今我求伊視若眼中之刺是可忍孰不可忍

如之何末如之何既告於鄰里鄉黨之間當質諸上下神祇之右
吾言若謬甘受天誅彼語如誣當遭陰譴願洋洋之如在降濯濯
之厥靈有感必通如響斯應舉直錯枉必須天理昭彰福善禍淫
庶使人心畏服

上周郎中陳言五事啟

李白識韓荆州雖萬戶之侯非其所願饒明見鄭叔向唯一言之
善得以相人今區區慕足下之賢敢切切論目前之事上以裨國
家之清化下以慰郡國之蒼生遠視欲明邇言可察茲蓋伏遇某
官乾坤清氣風雲壯懷向坐黃堂著鞭蒲之善政今遷畫省冠蓮
幕之諸賓有撥亂反正之才盡扶顛持危之力心不忘乎向日義
不失於隨時英聲蜚九重之天遺愛溢三吳之地和氣挽回於寒
谷恩光照及於覆盆見多士如見大賓保斯民若保赤子能興利
以除害不吐剛而茹柔史編當紀其循良當軸政須其贊畫門牆
羅列好多培桃李之春鼎鼎調和有大用鹽梅之日更勤吐握以

廣咨詢如某者甫里索居泰山高仰折桂之功名蹭蹬衡門之心
迹栖遲雖讀書以聖賢爲師但出門則農圃爲伍東鄰西舍痛遭
毒斂之蛇南枝北風多作無依之鵲歎息愁怨之聲常聞於田里
叫囂隳突之吏每見於鄉鄰况軍儲不積則時有借糴之憂而官
俸太輕則必有侵漁之患此皆係百姓之休戚疇能一言以發揚
唯大人肯念乎羣黎故小子敢輸其忠亦非甚高難行之事非荒
唐謬悠之談是曰是非曰非尚從公論聞所聞見所見奚敢飾詞
宜改絃而更張勿刊印而弗予他有剝牀而請者別當借箸以籌
之溺猶已溺飢猶已飢斯爲愛民之術仁見爲仁知見爲知初無
私己之謀饒舌云何優容幸甚謹奉啟并以所言五事開具詣省
幕以聞伏唯台慈鑒念

一開荒田

夫民之有田猶魚之有水也魚無水則枯而死民無田則飢而
亡原民之情豈不欲治田以養其生哉今長洲縣崑山州等處

水深圍田積荒歲久無錫常熟等處殘破地面荆棘連天其各處流移之民糊口四方而無卓錫之地是皆欲業耕以養生者也但所慮者鉏犁才舉卽有徵科廬舍未完便當差役是以盜受艱辛且逃租賦寧甘窮餓不還鄉土每歲雖蒙官司招諭復業及委官勸農不爲不至而民之所慮如此遂成虛名況各處低田圍岸久壞非一時可能修築積水甚深非一時可以車戽必須隔年料理以俟春耕田家作苦筆舌難盡如蒙呈達省府行下各州縣踏看勘明荒田數目參酌至元閒燕參政開荒舊例聽令諸人諸佃每年不過若干初年官不徵糧私無租課一應雜役俱得優免次年公私半徵三年成熟然後全徵如此則人皆爲養生之謀而不憚工力之費一二年閒官糧數增國家享無窮之利矣開此荒田官民兩便

一除民瘼

爲政以恤民爲先若夫民瘼未除而謂能恤之者謬矣然今之

民瘼未易枚舉姑以前月切近者言之如崑山州等處上年旱潦相兼高田則禾苗枯槁低田則積水瀰漫各都里正及佃戶細民經官告狀俱有堪信不期驗災官吏不行詣田踏視從實免徵止坐各州縣衙門及諸寺觀偪令鄉胥里正一概伏熟繼後部糧官吏驗數納徵其細民棄業逃亡十去八九但將里正緝扒弔打責限賠比破家蕩產終不能足幸蒙上司體察將里正人等發下所屬州縣乃得疏放立案擬於秋糧內帶徵若今年秋糧之時果於里正名下追徵其里正百孔千瘡奚暇再剗其肉以補於茲必著落原佃之人一同部內上下交徵決致失所況連年兵災擾攘差科煩重里正人等俱各消乏誠不能以一歲之所收辦兩年之租賦縱使捶楚之下求而得之甚非國家愛民之意亦非諸大臣恤民之政也如蒙言諸省府移文郡邑從寬免徵庶使里正之家免於破蕩力田之眾不致逋逃非唯今歲秋糧易於辦集而亦免下佃荒廢其田矣除此民瘼斯

民幸甚

一抑豪強

貧富不等借貸有之舊制民間私債月息三分年月雖多不過一本一利而已誠良法也近年以來其官豪富強之家乘人之急取利過倍少有逋欠陵虐百端或以借貸之時勒令并利作本虛立文約明取三分實收過倍之數或有還欠利息倒換文憑利上生利或寬收窄放更易斗斛或左右邀求減剋分利其舉逋還債之人阨於窮苦吞聲忍氣噤不敢語良爲可憫上年幸而官府知之出榜禁約但久弊不能頓除如蒙申明舊制定立罪名嚴加禁治庶使權豪嗜利之徒畏懼憲刑毋蹈前非抑強扶弱公道幸甚

一積軍儲

爲國之要足食足兵然兵固不可無食而用也但頻年水澇歲無全收如無錫常熟等地殘破之餘田地拋荒租糧減數今國

家軍儲之用常恐不敷況凡有賞勞俱用米粟以數千百石爲無益之費至於青黃不接軍人有缺食之憂百姓有借糧之患竊嘗觀之有司采辦米如珠璣濫賞贏餘粟如塵土此理曉然人所共見今從省府移文稟知太尉遇有功賞從公斟酌或加以多爵之榮或犒之金銀等物樽節米糧以備饑荒如此則倉廩之積日增月羨漕運可供軍儲可給而民無和糴預借之患矣多積軍儲公私便益

一增俸祿

張官置吏本以治民黜陟幽明欲其稱職然必須俸祿足以養廉然後考其臧否而黜陟之斯可使之無憾矣今府州司縣之職最爲繁難大小官吏之俸類皆鮮少仰事俯育寧免縈心洗手奉公誠不易得其閒以貪污黜罷者固不足惜而清平廉介祿不償勞者上之人當軫念之如蒙建言本省告之太尉以官吏俸給之數酌古準今量加增益如此則居官者可以絕貪墨

之心而百姓無侵漁之患矣傳曰忠信重祿所以勸士俸祿之
增公道幸甚

賀僕知州到任啟

騎竹羣童爭先迎迓杖藜一老敢進常談或可比乎芻蕘庶無棄
於菅蒯嘗謂州縣作民父母詩書爲世範模必須酌古準今乃能
承流宣化蟠根錯節毋令控利器之鋒流水高山正欲奏朱絃之
曲夫御吏治民之要唯正已格物爲先吏或奸欺民多疾苦但鄉
無叫囂隳突之吏則田無歎息怨恨之民照日月於覆盆轟雷霆
於蟄戶寬猛相濟恩威並行省刑馴致於無刑聽訟當期於無訟
魯中牟之雅化官至司徒黃潁川之循良薦爲丞相苟有爲於今
日亦何異於古人恭唯某官屢世簪纓一門科第金薤琳琅之文
采玉壺冰露之襟懷花縣相傳藹仁聲於荒服蒲鞭不用布德澤
於疲氓下車才一月之間比屋皆二天之喜皞皞乎不可尚恢恢
乎其有餘鷦鷯之巢一枝本非素志鳳凰之翔千里方進修程跋

予望之自此升矣某素嘗仰斗近獲披雲過蒙禮貌謙謙喜聽政
聲藉藉芑寒有賴獻曝何慚三千年黃河一清坐待太平之日九
萬里搏風直上伫看大用之秋有猷有爲善頌善禱

龜巢彙卷十五

龜巢彙卷十六

啟
蕭答張納聘三幅啟

松堅晚節梅占春魁恭唯某官起居有常動止多福某幸扳華閣
獲締葶盟敬憑一紙之書用效七襄之報○祇詞燕申且巖鱗甲
更冀順太平之序而加調甘旨之羞予日望之自此升矣○出使
展埋輪之志闕閱殊高封侯由給餉之功源流已遠幸二姓之合
好占八世之莫京令姪精習讀書拾芥之功名必取孫女粗勤織
紉采蘋之法度能循荷葑菲之不遺俾葭莩之有倚茲承莫雁喜
近乘龍第慚匳具之蕭條莫稱洞房之張設幣帛筐篚之厚意拜
而受之男女家室之大倫永為好也

答請期啟

合歡尋月老之盟將偕鴛偶涓吉訂星翁之曆乃遣魚書既承黃
絹之好辭敢謂綠窗之難嫁曰迎鸞於桃李春風之日尚許從容

欲奠雁於松柏歲寒之時何勞鄭重蓋篤婚姻之好合崇道義之
交迨其吉迨其今敬聞命矣宜其家宜其室適我願兮

賀闕信卿生日

壽入十三月初一日生

生申令辰二月後初交三月比彭高壽十分中才是一分子孫克
肖而俱賢歲月方來而未艾敬將薄禮仰祝修齡非熊非羆夢必
形於西伯如岡如阜壽將比於南山申駕率然丙融幸甚

張回鄒定姻三幅啟

綠野春明畫堂日永某官百靈交相多福駢臻某遙望鄰封近通
姻譜仰辱問名之禮敬酬交好之書○心馳燕居首陳魚素敢冀
對乳燕青春之景而加調紫駝翠釜之珍愛助一忱勤倦三祝○
昔南軒以道鄉可愛曾爲跋甘泉之銘今東泊與時干相望且喜
接鄰封之境惟先世斯文舊契宜後人此日新姻令嗣筆豔春葩
力勤儒業姪女鐙明夜績志在女紅幸有良媒乃成佳耦采下體
封菲之外將厚意筐篚之間受言藏之永爲好也投我以桃報以

李正三春桃李之時丈夫有室女有家乃百歲室家之願有懷依
倚無任欣榮

陳廉謙府史惠錢舜舉畫遣禮答賀

發軔修程十載試蕭曹刀筆還家遠惠一緘遺顧陸丹青愧比龍
鍾失此燕賀想萊子斑衣之樂勝買臣畫錦之榮不腆送芹切希
笑粲插茱萸徧兄弟于胥樂兮投木桃報瓊瑤我無是也

娶婦拜祖先致語

伏以有夫婦而後有父子大矣人倫故齋戒以告鬼神重乎婚禮
幸及時以成家室敢卽刻以覲祖宗參酌時宜兼從古制旣不忘
於報本乃可得而合歡濯濯厥靈降藍橋之仙宅洋洋如在坐花
燭之琦筵伏願先世垂恩新人蒙福有是父有是子一門天爵之
榮宜其室宜其家百世雲孫之盛

合卷致語

竊以禮言合卷自古有之俗曰交杯其來尚矣於結髮百年之始

合開顏一飲之歡孔雀屏中選當年竟成伉儷鴛鴦蓋同傾此日
豈不歡娛伏念孝順庭闈合諧琴瑟新妝不俗朝朝畫張敞之眉
敬對如賓日日舉孟光之案詩曰花燭春輝照洞房藍橋仙偶飲
瑤漿開花結子三千歲人與蟠桃壽總長
拜舅姑致語

伏以男女室家之願喜得及時父母舅姑之尊先當行禮欲居敬
以行簡乃酌古而準今試看花燭熒煌何異桃源會集拜舅姑而
及舅姑之宗族拜親戚以分親戚之尊卑各致殷勤咸加恭敬伏
願夫夫婦婦同心和順於六親子子孫孫一氣流傳於百世

趙與蕭請期啟

嘉會合禮尋月老之姻盟內事用柔訂星翁之日曆納幣於小春
良月之吉御輪於大寒信宿之先是用成行必蒙允諾歲月日時
無易迨其吉兮男女居室大倫永爲好也寸芹修敬一粲爲榮
趙與蕭聘啟

蘭陵之蕭衣冠素盛石橋之趙門戶今寒月老書其姓名雲孫知
爲僥倖令孫女鍾禮郝法乃天生貞淑之姿某男周詰殷盤方
日誦聖賢之訓曩中牽絲之選時爲佩鞶之童數年粗喜其長成
六禮宜容於缺略男女之際婚姻之始區區幣帛之將父母之命
媒妁之言永永室家之好

蕭答陶納幣三幅啟

十月小春一年好景恭唯某官起居惟適福祿是宜某舊日相知
新婚可喜辱子雲之華札效女星之報章○躬問燕居首陳鱗幅
其必對畫閣紅鑪之景而加調紫駝翠釜之羞善保儒珍早登仕
版○讀五柳先生之傳仰慕清高論八葉宰相之家俯愧寥落夙
昔友一鄉之善婚姻占八世之昌令嗣誦詩讀書克修儒業孫女
治絲執紉方習女工既叶鳳占將成鸞偶辱錦繡之贈如此之瑤
瑤之報奈何受言藏之永爲好也兄弟子猶子愛芝蘭玉樹之芳
父母心爲心喜松柏女蘿之施

王答鮮于定婚三幅啟

菊存晚節梅近小春恭唯某官森衛百林起居多祿某因親雖舊
結好唯新來書粲四六之文復狀致再三之敬○寅恭上問未竟
下忱其必順風霜氣候之清而加養玉雪丰神之秀仁膺鸚薦卽
奮鵬程○宋相以福星爲比族望殊高晉人以巖電見稱風流何
在詎圖僥倖乃締婚姻令嗣能讀父書功名必取孫女勉遵姆教
工巧何能旣赤繩繫足之有緣當舉案齊眉之永好一誠相體六
禮何繁笑折黃花答今日殷勤之贈寄言紅葉待他年伉儷之諧
張與巢求贅親啟

交情至舊眞如鮑叔相知姻事從權欲效秦人出贅茲蓋天作之
合亦云時措之宜欲以幣交未蒙金諾先此行成於月老便須涓
吉於星翁所恃久要毋嫌欲速就爾居就爾室送劉郎暫入天台
從如雨從如雲看韓姑終歸蹶里獻芹可愧鑿茹爲榮
王與巢定婚三幅啟

楓錦裁紅荷衣換綠恭唯某官考槃阿澗詒福岡陵某密邇鄰鄉
喜諧齊偶爰發鹿皮之幣敢修魚腹之書○上詞履祥初嚴蒙吉
對去燕來鴻之景進烹龍魚鳳之羞前襲恩榮下無煩禱○洗耳
臨流水千古高風挂頰在西山一時佳致雲孫幸甚月老書之令
姪女養在深閨兼備德容之美小孫男出就外傳粗知禮義之方
亦云如鳳求凰詎謂食魚必鯉問名伊始合好唯新男女居室大
倫願言偕老幣帛筐篚將意幸冀包荒薄侑寸芹別陳尺楮
王與符定婚三幅啟

風露雙清天水兼淨恭唯某官于時處處降福灑灑某雖隔花封
忝居葶黨敢奉尺書之敬仰干丈席之尊○旣諏茵鼎有嚴簡書
當桂子餘香之秋得棣萼相輝之樂請稽月令善保天和○樂施
恩多尚書令遺範可仰太平榮在文中子正學誰傳過攀閱閱之
高乃合婚姻之好令姪女閨室毓秀粹然四德兼全小姪孫鐙火
相親勉爾一經粗曉所幸中東牀坦腹之選豈非藉赤繩繫足之

緣問名通魚腹書將意遣鹿皮幣薄乎云爾歸斯受之夫婦有室
父母心信前言之不謬婚娶論財夷虜道知高誼之不然
請期啟

婚姻無六禮之繁實欽高誼唯諾若干金之重足見真情行成既
託於冰言涓吉乃稽於星曆擬三月中旬之始合百年佳偶之歡
想周南梅標有詩看陳村杏花堪畫得及時也適我願兮承顏當
合登之期敢云燕喜將意表折梅之敬尚冀包荒欣抃有餘敷陳
罔既

王聘巢啟

男女擇德聖賢之訓昭然婚姻以時父母之心同爾願言合好庶
免愆期令女四德兼全天生淑質小孫一丁粗識日習遺經念厥
祖之晚年宜此孫之蚤娶幸蒙金諾宜賜玉成敢將奠雁之儀就
訂迎鸞之約後觴九日星在戶星在天御輪三周從如雲從如雨
請巢氏父母送鸞二首

男室女家喜畢天倫之事山殺野歛可無小酌之歡敢望高車肯
過衡宇相邀愧泥濘勿辭送仙子乘鸞高誼薄雲天所願得嘉賓
式燕

許年聞林下之風喜成姻媿後夜聽鐙前之雨願敘團圓仰屈魚
軒寵臨蝸舍之子宜家宜室必加敬戒之詞騎從如雨如雲將見
爛盈之美

請符氏父母送鸞二首

居室大倫喜佳期之在邇婚姻良會宜此夕之爲歡掃羅雀門迎
衛鸞從烹葵邀上客甚有愧於荒涼隨柳過前川必不辭於光賁
嫁織女於河西依稀渡鵲降姮娥於月下縹緲乘鸞企予望之竊
有請也燕爾如兄如弟適當姻禮之初象服如山如河願覩母儀
之盛

蕭聘張啟

張良爲漢功臣與蕭何同稱人傑張禹有一愛女嫁蕭咸而得佳

偶既兩家先世如斯宜百世姻聯於此令愛毓閨房之秀能采蘋
繁小姪當門戶之勞頗知稼穡僥倖中牽絲妙選因循欠納幣常
儀欲調羹以奉慈闈奈乏人主乎中饋禮慚遲慢事幸速成雖無
雙璧之將已拜百金之諾今日聘明日娶卽迎鸞從之歸五世昌
八世京永叶鳳占之吉

姪娶請親翁啟

吾弟唯一息幸畢婚姻女子願有家必蒙往送望公車騎光我階
庭挹丹桂之香風玩清秋之明月花燭洞房之喜相與欣欣竹林
步兵之遺不妨袞袞

張答鄒請上客二首

兩小無嫌蒙養喜成夫婦一尊重與太平宜會婚姻伏辱寵招本
當趨赴藉手乏荆釵之飾何顏覩花燭之輝男有室女有家且遂
齊眉之願膏吾車秣吾馬別圖會面之期

童婚三載喜合卷之有期王母肆筵辱貽書之見召惟慚蓮鬢合

拜蘭姿奈老態之龍鍾久無心於燕樂梨花夜月對繡佛以長齋
花燭春風想金屏而多喜

代王孟學答張希良賀乃父置妾劄子

一婢赤腳家君每謂包羞雙魚素書
擬暮歸僭開三印之封景見八珍之貺本無稟命合用繳回奈雨
淋滂沱之未休恐星使往來之多累勿辭躡等遂用拜嘉今日目
前甚愧璫瑤之匪報他時膝下當言珠璧之暗投

賀置壽器劄子

鼎新壽器比銀鏤之黃腸珍重安居喜玉板之汗雖賢達預謀
身後宜歡娛益享目前是用送芹敢希笑粲賦詩自挽君應有陶
令佳章荷鍤相隨誰不慕劉伶高見

王文甫嘗臥疾諸親友探問醫禱禮意甚勤疾愈欲置酒敘謝未
邊也至是設盛席招之凡十有七人各書以請

歌偈仄行念鄰氏之久別作真率會慕先輩之遺風擬茲廿一日

清晨舉我二三年缺典蹋雪沽酒敲冰煮茶思向來采薪之憂難
得此盍簪之喜白髮三千丈相看若圖畫之奇金釵十二行但愧
欠笙歌之盛

上請蕭巖桂

曩歲負薪之憂屢塵存問今日折梅之信敢有相期卜大寒一日
之先作小酌三杯之款願陪談笑并謝扶持奴白飯馬青芻聊盡
少陵之意膾金齋羹玉糝真如坡老之詩

上請蕭舜卿

讀牀頭易屢蒙存問冰廬稱飲中仙每羨隱居雪壑斗酒將謀於
小席尺書預奉於大賢欲待萸萸四葉之新如彼蟠桃一花之會
志於道據於德勿云冠佩之殊和其光同其塵聊共壺觴之樂

上請

吳雲

從

往年問疾屢荷殷勤晚景居安寧忘感激開小閣會數人之客至
大寒先一日之期沽酒謝玉川先生下榻待南州高士折梅逢驛
使寄信報幽谷之春看竹到貧家毋吝蹋前村之雪

上請趙師呂

向來問疾曾勞得得相過老去投閒願奉玄玄高論將社酒一杯

之舉待堯奠四莢之新亟掃蝸居祇迎鶴駕陶陸同社幸無麴蘖
之嫌孔李通家況在葭苧之末

上請姜紫霞

曩辱問平安之竹念我顛危近來對索笑之梅思君契闊速客先
大寒一日呼兒辦小酌三杯敢用坐邀幸無他卻頗嘗見此客不
談塵生風顧安所得酒乎鄰酤蹋雪

上請張伯啟

往日負膏肓之疾多荷扶持連年懷肺腑之親無由會集當此嘉
平之月適爲閒暇之時敢謀廿一日泥飲之歡何異三千年河清
之會願竊有請惠然肯來摘我園中蔬盤飧初無異品爲此席上
客襟懷皆喜相知

上請陳嘉會

昔擁衾聞鬪螿之聲曾勞下問今對酒如長鯨之吸願與高談擬
大寒一日之先望清早羣賢之集螿浮似蠟聊索笑於梅花騎氣
如虹必增輝於蓬華

上請蕭仲承

故舊不棄曩勞問疾於吾廬潦倒餘生合罄謝言於姻黨在嘉平
後旬而先一日擬延畱上客以共三杯酌言酬之竊有請也有客

過茅宇甃然空谷之音攜酒遊芝山乘此刻溪之興上請蕭定卿

人生幾何汨汨塵勞之事歲聿云莫區區泥飲之謀待堯階換四
莢之冀望慶亭來五花之馬鑪煨芋栗瓮瀉茅柴一簞食一豆羹
聊奉笑談之樂三握髮三吐哺豈辭迎肅之勞上請陳君惠

疾病相扶持常懷往事故舊則不棄可無謝言敢於後甲三日之
期聊爲知己一杯之飲願竊有請賁然來思瞻彼牛臺邴騎攬搖
金之轡過茲蝸舍長鯨吸藥玉之船上請翁深甫

有患有身曾荷扶持之賜相親相近豈忘感佩之情欲謝殷勤久
成稽緩廿一日專邀大旆三五杯聊奉清談地鑪煨酒煖如湯仍
浮蠟味金城上酥淨如練試簇春盤上請姜用性

臥疴三載之先曾勞請禱話舊片時之款屢欲邀迎奈何日出事
生至此空江歲晚先大寒之一日集佳客之數人對月歌竹枝當
盡流連之意搏拳握松子願陪少俊之歡上請周華甫

饋藥感康子之意懷不能忘置醴敬穆生之賢願竊有請大寒之

前一日小集之歡片時誦陋室銘望高軒過灰香芋栗菲焉盤飮
之微人立梅花忘卻緼袍之冷上請陳君傑

有患有身往歲幾成枯朽是父是子當時多荷扶持奈相逢傾蓋
爲難遂久失舉杯稱謝先大寒之一夕請小酌之三杯田家拊缶
之歌嗚嗚共發故人綈袍之意戀戀相看上請張從傑

昔歲負薪之憂疊承書問今日折梅之信專用邀迎先一日於大
寒會諸賓於小席煩君騎從過我蝸居觥籌眾賓之歡聊復爾耳
綈袍故人之意何日忘之上請陳仲祥

老無能爲每有索居之歎歲聿云暮可無良會之歡先大寒一日
之期辦小酌三杯之款願切有請惠然肯來注玉傾銀笑田家之
老瓦搖金織翠邀才子之高軒上請陳伯將

賀符君彥遇恩劄子

平地風波偶罹人禍覆盆日月喜獲天恩惟正直荷天之休使橫
逆如冰之釋某有懷燕賀無奈龍鍾敢將芹曝之儀少助竹林之

宴叫囂東西隳突南北笑前時悍吏之來觥酬交錯起坐喧譁想今日醉翁之樂

王與金定姻三幅啟

四月惟夏南風之薰恭惟某官動靜有常起居多福某素聞華胄新締葶盟敢於六禮之初輒上一箋之敬○寅恭事上申敬如前所冀順清和之時而加調甘旨之饌行膺芝檢卽上蒲輪○稔侯珥貂之孫猶能世顯葉令飛鳧之舄豈乏家傳媒妁殷勤婚姻繼綰令孫天生淑質兼全四德之稱小兒日誦陳編方盡三餘之力得佳偶之諧若此爲父母之樂何如禮宜問名幣以將意玉郎嬌客勿戲嘲坡老之詩金縷繡襦想富若樂天之語

新親賀冬至劄子

鳳鳴占八世之昌婚姻締好義畫見一陽之復時序更新循乃常儀賀茲佳節恭唯某官道隨年長德與時高炯炯然若清冰英標拔俗温温乎如愛日秋氣接人方沾賜帛之恩將見安車之召某

傾心仰斗轉眼書雲寄殷勤聊折梅花諧伉儷將尋瓜葛日迎修晷喜添紅綫之工月閏來春擬講青廬之禮

新親賀七夕劄子

瓜果庭前望鵲橋之仙偶芙蓉江上尋鴛侶之嘉盟因景物以興懷具禮文而修好恭唯某官黃山毓秀綠野閒居立志清高欲追蹤於巢父無心機巧豈邀福於天孫其初筵露浥之餘必遠召天書之至某謀身甚拙曬腹無書卜兒曹鸞鏡之圓看桂子蛛絲之喜獻芹可愧笑粲爲榮華屋神仙想穿鍼於良夜洞房花燭宜合登於明年

又

月老檢書久定婚姻之約天孫分巧豈無兒女之情敢徇尋儀以賀佳節恭唯某官令名揭日壯氣橫秋縹緲十二樓正宜織阮亭之錦拍塞五千卷又兼曬隆腹之書舉頭睹銀漢祥光拭目進青雲高步某俯慚蹇拙仰慕清高以瓜果之時羞問梧桐之秋信薄

乎云爾歸斯受之當此時占喜蛛絲擬來歲往迎鸞從機杼織作
毋勞吟草堂之詩黼黻文章但願遂柳州之禱

新親賀端午劄子

訂月下書幸締朱陳之好賀天中節合循荆楚之風景物來前禮
文敢後恭唯某官身其蕭爽居則清高月且有評比南州之高士
日長無事臥北窗之清風九節蒲聊同引年三年艾殊可濟世獨
醒咸羨多福鼎來某舉目葵榴馳情瓜葛雖所獻非雪羅風葛或
可畱霧閣芸窗星言起居雷同問訊角黍連昌歌遙知盡華燭之
歡免絲借女蘿續當有佳期之約

納采通日劄子

伐柯以斧言當納采之時差穀有書喜得用柔之日雖居敬以行
簡亦酌古而準今待季春更六莢之奠效野老獻一芹之禮伏唯
無責必賜包荒鶯語丁寧報金谷東風之信鸞妝次第看玉臺明
鏡之圓

問名通日劄子

月老檢書幸自天而作合星翁視曆敢擇日以尋盟後中秋八日
之期結佳偶百年之好竊有請也能無從乎獻芹聊效荃人題葉
試看流水男女之際婚姻之始禮合盡於殷勤父母之命媒妁之
言願早諧於伉儷

袁與陸聘三幅啟

綠莖春明畫堂晝永恭唯某官考槃在澗增福如川某忝在舊交
喜成新好敬致鹿皮之幣敢陳魚腹之書○躬問燕居首陳魚素
尚冀對朱雀烏衣之景更加調紫駝翠釜之珍引養引恬善頌善
禱○累世傳象山之學共仰高風無人問牛渚之舟有慚明月鳳
占旣叶鸞偶期諧令愛毓秀閨房生乃全於四德小兒服勤門戶
學則誤於三餘荷葑菲之不遺俾絲蘿之爲好薄言納采厚望包
荒春水桃花江上遣長須覓鯉秋風桂子月中迎仙女乘鸞
鄒與陸聘啟

甫里世居門望偉鬱林之右道鄉家學師傳本伊洛之源藉冰語
以聯姻實雲祊其多幸丁寧鶯語催促鸞妝令愛夙奉母儀禮已
嫻於內則小男勉承父訓書頗讀於中庸顧惟在飄泊之餘願早
遂團圞之樂六禮之文雖簡雙親之意實殷塵冀包荒毋嫌欲速
迨今迨吉當詠梅標之詩宜室宜家喜對桃花之景送芹可愧笑
粲爲榮

新親賀冬至劄子

八世莫京幸陰騰鳳占之吉七日來復嘉陽生犧畫之初婚姻方
重於交權節序合先於稱賀禮雖效芹羹之獻物乃如葭灰之輕
餘皆削去繁文昔已感承嘉命既書雲物便約星期香閣日長看
刺繡新添之綫梅欄春早遣過門親迎之車

朱答李取男帖贅姻劄子

珠滴檐花翠搖門柳恭唯某官考槃其在阿在澗介福則如岡如
陵某依仁居鄭公之鄉粉榆甚近贅子效秦人之俗瓜葛維新荷

不鄙西家之愚乃獲中東牀之選首蒙厚禮爰締嘉盟月下老既
辱來前春帖子謹當納上題詩桐葉足知流水之多情寄語桃花
將續仙源之盛事某伏望翠蓬星眷戩穀日增儻有委令毋吝致
曉

社舉聘章啟

用黨庠術序之良規學開鄉社求蒙養聖功之成效職在師儒賴
琴堂爲擇範模使編戶得從規矩文風聿盛化雨俱沾恭唯某官
學有淵源眼空淮海一班窺見早遊風紀之詞千仞翱翔遠避煙
塵之境適張公爲江海之客知伯牙有山水之音將欲修鶚薦之
書先請坐皋比之席姑鳴教鐸以俟徵車某願雲龍以相隨覩星
鳳而爲快敬將聘幣亟往招旌設絳帳於張林來青衿於鄭校予
潔予進勿謂互鄉難與之言於勤於思卽若國子先生之誨
代朱弘章請張子安昆仲啟

別多會少居常諷詠於停雲時和歲豐欲敘笑談於終日邀上客

一杯之款在中秋三日之先舉匏樽丹桂花前候蘭棹白蘋洲畔
難兄難弟必能與吾弟偕行明月明年更約似今年同賞臨書率
爾望賜惠然

親家賀冬至劄子

新婚交締占八世之莫京寒暑薦更喜一陽之來復節期在邇候
問宜先恭唯某官韞玉儒林濯纓芳浦高標絕俗炯若春冰和氣
接人溫如愛日蓋鍾以湖山之秀而得夫詩禮之傳棠棣聯輝才
華益著書雲紀事坐評魯史之祥賦雪成名行赴梁園之召某弟
兄舊愛兒女新歡眷言尋合好之盟微禮作賤更之慶念因親致
親者久矣視居簡行簡而恕之葭灰飛緹室之時且酬佳節花燭
■洞房之夕姑待初春謹此申聞伏希丙照

新婿整容致語

昔年占鳳皆云家世之昌此日乘龍果見門闈之喜繼桃源之盛
事畱花燭之良宵魚水交歡燕雀相賀某人胸藏錦繡口吐珠璣

種玉有緣聘婦投其雙璧贏金既富傳家兼以一經將畫他張敞
之眉先整我潘安之貌秋水為神玉為骨人謂無雙芙蓉如面柳
如眉天生一對敢陳蕪語用贊華姻詩曰一雙新偶錦鴛鴦百歲
和諧翠鳳凰最喜天姿如傅粉不須湯餅試何郎伏願結髮維新
齊眉永好夫夫婦婦常調琴瑟之音子子孫孫克紹箕裘之業
新婦整容致語

天孫配鵲橋之仙相依銀漢秦女得鳳簫之偶並樂瑤臺蓋居室
人之大倫而婚姻世之重禮既諧鳳卜宜趣鸞妝某人珠箔銀屏
繡襦金縷梅花點額代壽陽宮樣之奇桃葉宜人有周南國風之
美眼橫秋水眉斂春山香閣移步步金蓮合登出纖纖玉手不施
脂粉本來如月裏姮娥若論清真尤勝似人間西子欣逢好合敢
頌輿言詩曰媒妁殷勤不負人燭花人照洞房春紅羅隔幔牽情
合羅帶同心結好新伏願夫倡婦隨天長地久五男二女享盛福
於高堂四德三從著香名於彤管

新親遣使請上客致語

兩世爲婚永結朱陳之好千里命駕當如稽呂之交持來雙鯉之書請送乘鸞之女柳筵盛設花燭邀迎某官喬木世家耆英人物美矣毓閨中秀愛之如掌上珍繡褥金屏李監宅門闌之喜瑤簪珠履孟嘗君賓客之多既當年擇對東牀宜此日送行南浦金勒馬嘶芳草樓船燕簇飛花明月隨人春風滿路從如雲從如雨之子于歸星在戶星在天嘉賓式宴

請期劄子

曩中雀屏孫謀以爲幸事今觀鳳曆親迎而有良辰越流觴三日之期請合登百年之好鎰花有約梅標及時投以李報以桃用請期之常禮宜其家宜其室締偕老之佳盟專此申聞諒唯丙照

請男上客

五日季春兩家合好烹葵邀上客因舊親以結新親杖藜立芳洲望早酌以娛晚酌

請女上客

祓禊三日婚姻百年織女渡銀河鵲橋懽諧星偶王母會瑤池燕衍早駕雲車

李回徐再婚聘啟

因親致親之好從古流傳舊壻新壻之詩正宜重詠魚腹聿來其書尺鸞膠將用以續絃令姪醫緩齊名以聰敏旁通儒術小女姊娵同氣乃殷勤粗習女工齊眉之案雖新坦腹之牀不易自天作合如月仍圓琴瑟鐘鼓之樂固多幣帛筐篚之將何勝前日受今日受不妨聘禮之頻舊雨來今雨來重見御輪之喜回芹菲薄副楮條之

答請期劄子

婚姻憑月老之言幸成佳偶聘娶考星翁之曆喜有良辰催花雨正此連絲五朵雲遽然飛墮敬聞命矣迨其吉兮男女居室大倫古今所重歲月日時無易

答納幣三幅成

花朝餘景桃雨方新恭唯某官天相閒居日膺盛福某僭扳華閣幸締葶盟輒回魚尺之書專問燕居之敬○祇詞燕申已嚴魚甲尚冀對芳菲之景而加調甘旨之羞善保安閒式副頌禱○一舍相望皆住鶴溪之許二姓合好永諧魚水之歡載笑載言迨今迨吉某人案頭燈火殷勤黃卷之閒而某女鍼帶衣裳寂寞綠窗之下荷不遺於葑菲斯可擬於松蘿納幣今朝結褵有日桃花灼灼喜婚姻如此其宜瓜瓞縣縣看嗣續將來之盛回儀菲薄副刻條之

納幣啟

張知府子聘盧推官女

文武才之並稱夙欽華胄齊魯論之兼講甚愧微宗知心本出於同鄉愛子乃求其佳偶鄰封伊邇姻好唯新令愛四德俱全自是閨房之秀長男一經粗習尚須燈火之工崔屏幸申於前時雁幣宜陳於此日星翁涓吉月老行成承筐之意既將合卺之期可待

鐵瓮城山花夾道似入桃源金斗門官柳長街將迎鸞從寸芹菲甚副楮條之

賀娶弟婦劄子

令弟號河東之鳳生有奇才仙娥乘月下之鸞來爲佳偶禮成合香喜溢連枝想洞房花燭以歡娛送野老芹羹而慶賀墳篋交作一家藹和氣之春琴瑟和鳴百歲永齊眉之好薄言申控厚望丙

融

又

兄督厥家重乃友于之義弟宜其室合茲宴爾之歡鳳卜有靈鴿原多喜某人胸襟量闊洪如萬頃之波手足情親常共對牀之雨稱二難於月旦行六禮於婚姻某忝在葶親敬將芹獻想鴻雁之行有喜受燕雀之賀無嫌翠舞珠歌花燭夜懽諧伉儷金昆玉季桃源洞盛集神仙俯述蕪詞仰希藻鑑

納壻請上客狀

得賢壻美如玉溫樂與同居慕親翁文有金聲願陪情話高軒寵
過陋室增輝
請親眷送壻狀

女插荆釵幸致東牀之壻客來茅宇毋嫌南阮之貧傾蓋有期執
杯專候

又二首

得壻如桃源之樂琴瑟和鳴邀賓共花燭之光樽卮小酌式相好
矣請無卻之

瑣瑣之姻納壻欲敘團圓親親之長來賓誠爲光飾再三申敬千
萬寵臨

祖爲孫娶請親家狀

抱孫至有室之年實爲僥倖送女見宜家之好共樂園園花燭將
迎慈裾寵賁
祖母娶孫婦請親家母狀

孫娶而倚門龍鍾亦笑女行而結帨鸞從將臨願覩蘭姿請移蓮
步

問名三幅啟

萬谷蔣

天方嚴肅月乃嘉平恭唯某官台候迪吉動止多福某交蒙舊愛
姻締新盟承書粲駢麗之文答簡致殷勤之意○前承候問上徹
覽觀尚加調紫駝翠釜之珍以安處畫閣紅鑪之樂蒲輪有召梓
里增輝○山隨蔣姓大宗久著於圖經莊用萬名先世亦稱於鄉
國荷天相平居而交契宜冰人相語以聯姻令孫誦詩讀書承祖
風之淳謹小女治絲執絮遵姆訓之工勤吉從鳳占喜成鸞偶擇
德之初心旣遂問名之彝禮何多受言藏之永爲好也竹間三徑
相望如倚玉之榮梅贈一枝聊仰作報璫之敬
請親家翁狀

愛女甚於男人皆羨安昌之比見我有此客孰不云文靖之榮請
式燕以交歡望御鸞而光賁

請新親家母狀

降月府之姮娥佳期在邇宴瑤池之王母良會惟新立候蓬門望
移蓮步

謝免糧表

兩浙奉蠲租之詔恩意天寬羣黎懷結草之心歡聲雷動睠斯民
而得此實亙古而無之恭惟德合乾坤明同日月由生知安行之
聖巍巍成功以博施濟眾之心洋洋育物干戈旣戢禮樂聿興普
天率土慶以來歸甘露卿雲燦其呈瑞臣某等叨居劇郡幸遇明
時遙瞻丹闕之光仰效華封之祝一曰壽二曰富龜疇之景福無
疆千斯倉萬斯箱農晦之豐年多慶

中宮箋

德配一人聖政有內庭之助恩霑兩浙公租免編戶之征臣庶均
歡古今希遇欽唯聖明天子禕衣合則垂懿範於宮闈彤管紀功
示母儀於邦國厚同坤載壽與天齊臣等出守微邦蒙恩大幸家

給人足喜關雎麟趾之化行時和歲豐俟龍馬龜圖之瑞出

東宮箋

主器參萬幾之政日用三朝綸音蠲兩浙之租恩沾庶姓欽唯聖
明天子震長居儲離明協照星辰河岳煌煌氣象之新車服旌旗
奕奕威儀之盛夷夏咸悅春秋鼎來臣等藩守至微輿告上謝農
餘粟女餘布樂謳歌朝覲之歸書同文行同倫統侯甸要荒之服
聖節賀表

皇天錫羨篤生聖哲之姿化日舒長馴致雍熙之治春秋鼎盛夷
夏咸歡欽唯聖明天子德配二儀量包六合立綱陳紀同天下之
車書偃武修文舞階前之干羽蠲租賦以紓民力增俸祿以養官
廉庶績其凝彝倫攸敘臣等叨居郡守阻列朝班黎獻爲帝臣粵
有陶唐氏萬邦之眾壽富多男子敢效華封人三祝之誠

千秋節賀表

誕彌厥月先重陽五日之期時又維天繼洪祚萬年之曆永隆邦

本大愜輿情敬唯聖明在上以孝以仁唯明唯允鶴駕雞鳴而衣服寢門問安龍行虎步於太平乾坤篤佑丕承寶緒益衍瑤圖臣等微若草茅誠同葵藿望神樞之電繚繞壽祝儲宮願化國之日舒長恩沾寰宇

冬至表

龍飛御九日之師尊居丹扆儀畫驗一陽之復律應黃鍾愛日舒長普天蒙慶欽唯聖明天子乾坤合德日月同明度越古今用武功而平四海制作禮樂敷文德以教兆民當亞歲之令辰納應時之洪福臣等忝居小邑阻賀大庭千羽兩階想天顏之有喜衣裳萬國想雲日之餘情

東宮箋

七日來復陽生緹室之灰八表依歸位鎮東宮之久欣逢令旦茂緝嘉禧欽唯聖明天子天生聰明日新盛德能仰承於聖訓用參贊其皇猷視金鏡以納忠義崇風紀奉玉卮而上壽恩重天倫邦

本益隆民情允洽臣等叨居下邑賀語前陳夙興視膳而問安更有書雲之喜賢佐保躬而傳道尚輸愛日之誠

中宮箋

陽生葭琯天時妙斡於玄機歡藹椒闈日晷頻添於紅綫掖庭和樂寰宇清寧敬唯聖明天子壽與天齊德同坤厚萬乘至尊之賓敬雅重禕衣六宮內則之教修尚勤玄■載逢令節益介繁禧臣等微若草茅誠同葵藿履長今日宮中奏式燕之娛習美成風天下賴關雎之化

正旦表

普天率土幅員歸一統之初獻歲發春正朔屆三朝之始時調玉燭喜溢瑤墀欽唯聖明天子聖德乾剛神功震赫蕩蕩如天之大人所難名昭昭如日之升物無不照履始和之吉月嚮洪福之萬年臣等忝牧邑民阻趨庭賀鳳曆頒春於天下化及華夷獸樽置酒於殿前樂聞忠讜

中宮箋

四時成歲薦逢泰道之亨萬物資生實仰坤儀之盛春回寰宇歡
藹掖庭敬唯聖明天子位正禕衣功成玄■風教天下關雎正始
之音朝夕宮中卷耳求賢之意履端有喜介福宜多臣等領邑羈
縻望闕稱賀紫宸配德新年布澤如春彤管流芳億壽與天同戴
東宮箋

正月之吉始和輿情共悅維天之命不已嗣服益隆春藹青宮祚
延蒼籙敬唯聖明天子長爲主器允應禎符親傳精一之心淵源
聖學參決萬幾之政黼黻皇猷迎新茂對於良辰端本繼承其大
業臣等叨居縣邑阻賀宮庭鳳曆頒春大地之羣生有喜龍樓問
寢齊天之洪福俱增

龜巢彙卷十六

龜巢彙卷十七

行狀 銘 贊 箴

故伯母行狀

從母姓鄧氏諱某常州武進縣曹坊里人也年十九我從父諱文
正娶爲妻動循禮法事舅姑甚謹姑晚歲失明每飲食必相之徹
而後退平時雖甚寒暑服勤婦工每夜分而後寢至元乙亥天兵
南下以常州未平駐師京口遊騎往來居民多辟地他徙吾謝氏
居城西烈塘以世業不忍去置東西閭門募丁壯守之騎不能入
然人情恟懼母自以少艾恐遭俘掠嘗語娣姒等曰設不幸爲北
兵所虜將若之何眾皆曰苟無所逃惟聽命耳母獨毅然曰吾寧
自死義不受辱是年正月八日騎者二十餘輩攻里門甚急眾不
能禦遂奔潰騎者火其廬虜從母及鄰婦數人遭繫累而去行臨
漕渠母乃潛脫其鬻投簪珥於道傍投水而斃時南岸菑翳中有
竄伏者見之已而來告求其屍果得嗚呼吾從母不屈而死者於

今七十年矣應芳爲子時先君子嘗語之今諸父六人俱無嗣不肖苟不自其事是泯其潛德謹錄先君子遺言狀其行如左唯當世立言君子賜之紀述則從母死且不朽謹狀

王佛子行狀

王佛子諱彬字文甫常州武進人往遭亂譜系喪失弗究其先所自考從龍當至元乙亥天兵南下家因殲焉常旣內屬繼室以張氏養子質數年而生君君潔白端好父珍之六歲卽延師教於家君性敏慧善記誦明年生痘疹疾時已授孟子書恐爲同業所先數號泣白其母母曰兒疾旦夕且愈以兒強記之姿寧懼弗及乎殆不能釋用是致管一目稍長事親孝與兄質無閒然者未冠經營家事率有條理公私外內咸便之居無何資用益饒父母終每遇時祀則追思飲泣曰向吾封殖計裕親也今亡矣多蓄奚爲傾貲之半以施老佛祈助冥福再涉南海禮補陀山君子憫其以報親爲心而弗疵云及兄沒喪葬亦如禮至是與兄同居者七十年

矣平生慕馬少遊之爲人好閱古書中孝友陰相事然性剛直人有過面折不少貸每旦起立卑幼庭下畫授鉅細事大要歸信讓勤儉子孫少有不及必加誚責待其兄之子若孫殊覺寬假常勵之曰吾非爾宥也苟怠吾事行且罪及兄子輩愈趨事以勤食指幾數百總服同炊歲時頒賚及嫁娶品式至於服食纖嗇皆均而無私家庭之內肅如也晚築遐觀樓以延賓客多致時流名輩相與婆娑嬉遊諸子姪因得磨礪浸潤亦蘊藉可愛佛子方少時有里人夜爲盜爲家隸所獲將殺之君力救免且戒隸勿言後數年其人臨終時自語其子使毋忘焉聞者或以是詰之終於不言同母二妹其一嫁邑人姜氏生三子至正閒其父子俱爲仇家誣陷抵獄吏鍛文垂成如律乃惻然爲援之遂脫其死餘親故藉其力以排患難者亦多類此故鄉邑倚之若長隄鉅防之於湍流狂瀾云若鄰里貧而病者每助醫藥之費且常置棺別墅有不能斂者則與之或時乘馬出入遇負戴者雖少長亦引避田閒見耆老必

下馬相勞苦以爲常故鄉人號爲王佛子浙西以田賦爲重州縣吏以其家租入之多命爲正首徭役殆無虛日然按文應需之外課戒子弟毋以毫髮橫擾細民人賴以安仰之幾如父母橋梁溝洫不待官府督責而預自辦集公私兼濟其利亦以自悅也至閒暇時委家事諸子姪攜一二朋舊問丹陽道過句容臨白下陟鍾山冶亭之杪徘徊徙倚訪六朝遺跡挹臺閣清氣或入吳抵錢塘覽湖山勝槩悠然忘歸此又其高致而人少能知者至正十二年十月紅巾據常州時佛子方臥疾於家賊眾至盡掠其所有意恐爲里人禦奪發倉廩誘之皆不至賊縱火乃爲撲滅已而賊誅君疾才愈起召里人嘉勞之明年春正月卒於家年七十二子庭玉等以其年二月葬君於直瀆之新阡送者千餘人多哭之慟皆曰善人亡矣妻丹徒周氏生子男三人長庭芝早卒次庭玉次庭槐女二人長適丹陽周氏次適吳門金氏妾周氏生庭梧孫男曰敏曰政曰孜俱有室餘尚幼兄之子庭桂次庭椿其子尤夥子與

佛子同里閏且辱招致教其子孫者十餘年故知君爲詳謹狀其行實以俟當代立言君子撰序次第期示不泯云

故處士存心先生陳公行狀

曾祖諱文表宋兼州司戶餘缺祖諱霆轟宋從政郎行國子錄餘缺考諱聖淵字容軒宋承節郎提刑提舉司奔牛酒庫提幹陞提刑司簽幕兵馬鈐轄朝奉郎常州通判賜緋衣魚袋帶行都督府事機宜文字先生諱師可字伯大自號存心老人通判公之第三子也宋末父居官常州武進縣奔牛鎮宋亡而元遂爲武進人母某氏先生生至元十五年戊寅不數歲能通孝經論孟大義父常問之應對如流然天姿醇樸不尚文藻旣長當路者多薦辟之皆不就孝奉二親於喪事葬祭罔不如禮其弟振可父命爲同邑張把總後蒙可贅盧莊金氏後振可頗豪俠先生數勸勵之然其好賓客接後進飲食教誨送往迎來亦不減乎其弟也居平坐蒲古軒觀盆池小魚洋洋自得曰魚之樂猶吾之樂也或小飲微醉歌

安樂窩先生之詩擊節歎賞晚年家居爲童子師無賢愚貴賤但
內拜則進而教之束脯之禮不計其孰有而孰無也元末草竊蜂
起鄉里有不可得而居者挈家依無錫膠山安氏食指百數恬不
爲憂蓋人多知先生爲有德之士供具不絕旣而竄飛旁午乃轉
徙蘇州城西及妻康氏相繼以病歿先生享年八十有一妻年若
干宰木幾拱遇世變環城數十里河隍變遷而大明開天矣先生
初娶陶氏生子曰以仁先卒繼室康氏子男四人長曰某次曰某
娶某氏孫男三人長曰融娶丹陽陳氏次某俱幼洪武己巳葬二
親衣冠於唐原祖塋之側嗚呼先生生死始終兩遭兵變不以艱
危虧事親之禮不以困厄失守身之節存心之號不誣也某自早
年遊從且忝姻戚知先生爲詳故狀其梗槩如右云

管伯齡妻壙志

張氏諱某蘇州鐵甌人也性聰慧女紅多不學而能其精巧有過
人者父母鍾愛擇配遠邑得處士爲儒族名家子厚貲裝而嫁之

事舅姑能盡婦道凡祭祀賓客在中饋所當爲者爲之無不中節
鄉里則之男女婚嫁之禮亦然生子男二人長曰嗣娶同邑宋氏
次曰某娶陳氏從軍某州女三人長妙真適方氏次淑真以真所
適皆同里嚴氏孫男三人長顯娶周氏次仰充皆幼孫女一人適
史氏曾孫女二人長復奴早亡次孝奴在幼自處士沒丁時多艱
憂患在牀褥者幾年某年月日病卒享年若干某年某月日封窆
與處士同穴毗陵謝某嘗寓居爲鄰故知其槩如此云

義士吳先生墓志銘

先生諱轍字中衡其先會稽人祖某元江浙省醫學提學居官杭
州因家焉考某妣某氏某年月日生先生聰敏過人初家塾之師
授以孝經論孟卽暗誦如流成童通醫書內經奧旨餘如脈訣活
人書等多疵焉至如吹洞簫鼓瑟琴舞劍器皆不學而能其志若
有不屑於醫者元末多故南臺某官買里古思公知其才召爲幕
賓方欲力薦而大用之古思公以他事被讒落陷寘公懼禍波及

之變姓名挈家海上久之乃賣藥以養其親長洲故交趙執中舉家病疫鄰里無相過者獨幼兒應門先生過其家時厥子入視皆以藥飲之數日而愈後執中父母妻子跪拜奉幣而酬之先生固辭曰朋友患難不相救乎進士某縣丞俞某患輒脚疾先生憐其貧往視之曰可療但藥餌三兩月而愈俞言無裏藥之資先生曰君有此則吾豈為不速之客乎後如期而安後報禮亦毫髮不受或問俞之交非趙氏比何同然耶先生曰斯人有可用之才使得存為世而用之不亦可乎凡貧居有一才一藝求醫而可醫者皆然故吳人翕然以義士稱之吳江富人有沈姓者遣幣招致及門其主人方事巫禱先生乃飄然而歸翌日沈氏復重幣固請先生終不赴而返前幣焉凡如此者亦多或譏其桀驁弗辨也平居能孝奉二親親歿則廬墓終制化行於家妻某氏事舅姑亦盡婦道先生於洪武某年甲子某日終於家享年若干葬崑山縣石浦考塋之側先妻某氏生子曰某後趙氏無子皆先卒其子以余父執

知其親為詳請誌其墓故述其梗槩如右銘曰
時不利志不遂假方技兮行吾義全是身悅是親骨雖朽兮名弗湮於乎蒼天德哉若人

管伯齡墓志

先生諱壽昌字伯齡蘇州崑山縣人也祖諱某宋開寶中以詞賦領鄉薦考諱某遭宋革命遺逸而終生處士於元之皇慶四年某甲子某月某日氣質清秀不數歲能暗誦小學四書通大義既長為學道書院訓導諸生悅服文譽蔚然越二年以病請告踰百日而歸自是年愈長而學愈進尤工於詩泗橋杜玉泉氏招先生以教諸子時玉泉亦以詩鳴花朝月夕更唱迭和其詩如元白而不輕不俗郊島而不寒不瘦也館穀凡二十餘年玉泉歿而教授於家學徒愈盛如歇後鄭五輩及緇衣黃冠能詩者咸與之遊有通儒之遺風焉大明洪武某年某月日卒年七十有六葬某處娶張氏生子男三人長曰嗣經鉏養親次曰維從軍某州女三人孫男

若干於平先生抱俊逸之才負高尚之節齋名尚志超然晏居有詩文二十餘卷曰尚志齋集藏於家詞藻之名榮於軒冕誌其墓者毗陵故交謝某也

墓志銘

龜巢老人姓謝氏應芳其名子蘭字早從其親聞譜系世居開封多顯貴六世之祖武進尉東西謝莊族滋熾大父別業烈塘浹生男七人一進士遭宋革命家乃燬煙滅埃飛三百指舊家奕世盡憔悴賴有雙親陪而起四男一女同遺體男皆吾兄女吾姊伯兄早歿孤藐爾二仲及瓊竟無嗣我生迂疏昧生理妻任井臼畜三子木也左右奉菽水日林曰森伯爲禰七孫唯塏冠而儼坦垣成童餘幼穉商周興亡陵谷異舉家幸獲全生齒干戈十年浮海避強名龜巢等遊戲還家無復舊閭里築室橫山墓山趾春秋虛度八十二著書數篇而已矣府公遺石誌邱竈聊爾云云敘終始大明洪武十年歲次丁巳十一月十一日病中口授友人江陰張端

吳處士妻墓志銘

逸菴處士之妻姓曹氏諱某崑山人享年若干後處士若干年卒吳俗尚佛死者火之其子輒卓然能矯俗之弊以禮葬石浦之原與處士同域時某年某月日也毗陵謝子蘭與處士有通家之好處士屢嘗語蘭曰我妻性柔慧早歲在父母家精女工事親以孝謹聞旣嫁而主饋奉嘗靡不適舅姑意顧予性嗜酒喜狎賓客語滑稽賓退每相規焉及其爲母教輒與女皆有矩度教輒婦亦如之然平居言笑雖連屋之人未嘗聞也輒負氣節以剛直多與物忤母常戒飭之不敢肆微如臧獲御之亦盡恩義凡如此類其姻戚比閭之所稱道無閒然者今輒以蘭知其母之詳也乞爲銘蘭於是紀述舊聞使後之爲女爲婦爲母者儀之則其死猶無死也

銘曰

淑德之全德容靜娟玉溫潤而栗然其生也天永其年其死也人稱其賢又奚恤彤管之無傳乎洪武十年歲次丁巳秋七月二十

有二日書

駭孫墓甄銘

龜巢謝老第六孫字駭孫生三歲而能言父口授周南關雎等篇立能成誦余愛之意他日可業儒以繼先世甫五歲以痘疹死時洪武十一年三月十有三日也翌日葬潞城之原余乃哭而銘之曰
苗而折穀而脫咄彼造物奚爲者

張處士墓志銘

處士諱功懋字實甫蘇州崑山人也先世多顯宦譜牒見存考諱應宸不樂仕進居鄉里爲鄉之善人母曹氏生君之日世方中微君早歲卽幹才有所樹立旣孤養母氏極甘輒之奉鄉人稱之母沒而家益肥中歲畢姻嫁事卽以家政授二子而子又能豐其殖焉君乃構佛廬於先人墓左以奉祀事仍與僧居之故四方浮屠師多與之遊平居月齊十數日卉服蔬茹泊如也旦則持佛書諷

誦畢乃戟手向天聲謝其意若曰吾之所以得此者皆天也不敢忘也施僧之餘視貧乏或周之然奉身寡約始終一致自號守齋蓋以此耳吁其亦可謂有恆者歟妻沈生子男四人長曰天麟娶邑人金氏再娶姚氏次天麒娶朱氏次天佐出贅同邑夏氏先卒次天佑贅嘉禾王氏而歸女四人曰妙善妙靜妙清妙智皆有家而妙清早世孫男曰畿娶倪氏曰炯未冠孫女曰真曰善曰因曰寧皆得配曰璠英曰玉英尚幼處士春秋六十有九洪武元年五月十二日終於家明年五月二十七日瘞耐考塋其子天麟乞銘於毗陵謝某而某久客吳下具知處士銘曰

始蘖其樞卒蕃其枝惟根於天者弗移曰德之恆予是以銘之嗚呼其止於斯兮洪武十一年歲在丁巳秋九月三日書

方寸鐵銘

天地爲鑪陰陽爲炭鑄方寸鐵非柳下鍛鋼不可屈堅不可磨侯堅侯鋼利用實多今欲以之刻食月蟲環以執政剛過於崇惟善

用者爲衡爲權稱物平施錙銖勿偏嗟爾有此藏之於密以桑氏
視改而爲筆摘辭琬琰百鍊其工剔去魚魯斯文有功彼寸鐵兮
人孰無知欲偉其器繫鈴與錘窻小爲錘毋大爲錯凡百君子非
由外鑠

永思軒銘

人之生天地中父之恩與天同生而養送厥終盡以禮猶哀惻矧
遠離遭鞠凶一失怙無由從德罔極思何窮生之初本崆峒玉而
錯金而礪器之成皆父功哺不烏乳不羶忝物靈漸瀨穹念爾親
修爾功以爾孝移爲忠其親顯名亦榮苟不然思奚庸霜雨露愴
厥衷執籩豆感必通爾永思如水東於羹牆見儀容庶象賢寄高
風

方竹杖銘

并序

予性喜方偶得一方竹爲杖甚愛之因念古之崇節義尚廉隅者
類焉刻銘其端持以自警

猗歟竹君易園爲方虛心固節悉如其常其方伊何如玉界尺不
祇而平不繩而直曰余老矣賴人扶持義以方外庶克似之

竹素齋銘

爲鄧宜之作

天人交敷羲畫馬圖大明九邱科斗六經於昭日星漆書汗青姬
公宣尼斯文緝熙爲世範儀百家之多繼聖維軻如江如河竹兮
素兮文斯寓兮開戶牖兮爾於其中樸斲磨礪德業攸崇苟習其
辭舍已弗治雖多奚爲予言若茲直弗爾欺亦以自規

願學齋銘

并序

溧陽曾明府字子嘉前家居之日以願學名齋今居官扁仍其舊
其友常州府同知楊侯徵予文辭不獲命乃爲之作銘其詞曰
終始典學德修罔覺旨哉斯言爲世矩矱欽唯素王聖本生知學
而不厭惟日孜孜好學如顏爲聖之亞天若假年不日而化三千
七十步趨後先曰願學者子華之賢卓爾君子志華之志揭茲攸
居書紳何異學以明之仕以行之仕學俱優兩輪並馳厥德之修

與日俱積豈唯日積乾乾夕惕願學若茲勳業鼎來不負所學尚
慎旃哉

愛日堂銘

爲無錫趙德宏作

先民有言孝有不及人之事親所以爲急况伊大母春秋七十彌
亦耆年爲儀里邑晨昏定省扶持出入甘輒而饋輕煖而襲養非
徒愛敬事必恪慈訓並成蘭薰蕙裊慎言與行如玉之執曜靈西
馳恨莫能縶分陰寸晷斯須必惜厥德旣修業亦樹立愛日若茲
眾善斯集毋卑我言升階拾級

白賁軒銘

天地之文我象我儀唯文之極淡焉是宜賁之上九白賁無咎苟
爲不然咎將日有聖人立言妙理冲漠能近取譬亦孔之昭如衣
美錦其文煌煌惟其尚絅闇然而章以賁而白不賁之賁君子以
之咎弗我致嘉爾釋氏修乃舊業殊塗同歸意明允愜

永思堂銘

并引

崑山呂昭克明起家業儒信道篤而事親孝以父母生前奉佛志
極堅固有不可移者常承順而悅之及其歿依釋氏荼毘法瘞
骨於墓從治命也至居喪則多用古禮衰麻哭踊不酒不肉以
終三年之志視世俗舍禮法而溺乎異端者不同也旣而近佳
城擇地構堂龕木主香鐙朝暮歲時烝嘗追遠之心懇懇切切
惟恐後人有弗逮者堂名永思蓋取諸古經永言孝思之意洪
武癸亥夏五月克明徵予文乃爲之銘曰

人之有生曰父曰母劬勞之恩天高地厚方具慶時綵衣青春志
弗克養徒美八珍一朝云亡無復定省雖欲愛日捕風繫影嘉爾
孝子事死如生葬從治命祭盡其情日居月諸時則邁矣繼繼承
承或怠懈矣經言永思揭諸斯堂非曰能之示不敢忘婁水滔滔
不舍晝夜悠悠我思與水交瀉滔滔流水無古無今我思悠悠與
水俱深春秋霜露溪毛洞酌有感斯應來享來格無形而形無聲
而聲羹牆見之是爲思成烏鳥之忱豺獾之意雖子若孫有引弗

替

存耕銘

人有寸田產仁與義君子存之罔俾蕪穢詩書耒耜耕以學力種德樹業如黍如稷我苗芘芘我稼既同仁熟之後其用不窮彼自棄者厥田弗治耕也鹵莽獲亦如之舍己芸人斯尤可嗤勸哉存耕唯日孜孜使工或虧不其餒而

劉景儀先生畫像贊

山澤之臞頽然而長面有奇紋鬚眉雪霜幅巾藜杖逍遙相羊不可貌者其行之方其心孔臧其音琅琅德哉若人俾也可忘

張伯仁畫像贊

隨俗衣冠容物襟度坦然真率頽然魁梧屢涉危途常合矩步卽其天之所賦徵諸人之所慕其可謂吾輩俊之老而實能達時務者歟抑可謂泯星鳳之迹而人欲快覩者歟

月泉道人小像贊

炯炯乎精神蕭蕭乎衣巾值陵谷之變而又於風塵忍泥途之辱而全其天真玩世蠖落隨時屈信噫是所謂涅不緇磨不磷託迹爲方外之隱淪者耶

曹節婦贊

并序

按家傳婦吳姓歸曹氏二家皆江陰望族生子曰有實方幼婦秉節十有五年嫠居守孤慈而有教世變乃攜子辟兵子被執母卽赴水死旣而子得脫欲收葬母屍日夜號哭求諸水濱久之終不能得遂以母所遺服飾之物厝諸棺合葬父塋哀毀骨立鄉人悲之君子謂有實之篤於親非其親教之有素而能然乎夫以子之早孤母不失教不賢而能之乎然婦之所以能死節者又豈非世族文獻之澤有以致之乎故爲之贊曰

楚皋之蘭生有餘芬瑜而不瑕藍田之珍荷歟爾嫠比德蘭玉爲女爲婦儀而族屬蘭摧玉湛於江之陰跂彼其姜心乎其心拙逸箴

嗟世之人知誰爲賢膠擾擾靡日不然不作聰明不事機巧爾
逸若茲庶近乎道身弗行險意無外馳爾逸若茲孰云非宜作僞
而拙其拙可羞好遊而逸其逸可憂拙逸之言本乎周子吾其申
之以究厥旨巧凶拙吉巧勞拙逸旨哉此言宜而弗失

師箴

堯舜湯文爲君而師洙泗設教斯文在茲寥寥漢儒章句云爾濂
洛諸公麟角鳳觜師道之大實難其人曰可爲者温故知新若童
子師爲亦勿易養正之功實係於是師乎師乎宜日三省吾爲子
箴亦以自警

坦率齋箴

嗟今之人以文滅質允矣君子欲矯其失徑行直情是爲坦率本
之於身作德心逸推之於人言踐其實不修邊幅不任智術不奴
其顏不婢其膝其腹無劍口亦無蜜終始勿貳表裏惟一坦率若
此亦孔之吉彼異端者蕩無紀律居不衣冠馬牛其匹坦率若茲

乃罔足述吾亦率爾言爲爾弼謂予不信有如皦日
拙齋箴

維古聖者經綸大經至巧若拙無爲而成唐虞之民其俗皞皞不
識不知非無穴鑿三代以降智巧日出或哲或愚或得或失去古
日遠巧日益多卓爾君子拙如之何言抱其樸不事華藻不鼠之
黠不免之狡彼蛛爲羅巧於謀食我飲如蟬清風兩腋鳩拙於巢
蠶巧於繭巧拙若斯可亦無忝作僞而拙其拙可羞誠拙而逸其
心休休戒之敬之真僞兩途十目所視毋失其趨

龜巢彙卷十七

龜巢彙卷十八

題跋雜體

題陳松居所書昌黎詩後

僕早歲誦符讀書城南詩嘉韓公教子如此其切意其子必樂有賢父之教而成學及以他書考之符也果登長慶進士第斯亦可謂不負其親矣然而爲集賢校書乃有誤改金根之謬噫豈以擢第之後遂弗究於學歟今觀松居先生筆韓公之詩以示其子先生之心卽韓公之心也爲之子者得不以公之心爲心乎仲野今學優而仕方且以學軒署燕居之所勤勤焉懇懇焉佩服父訓爲學不厭夫如是視韓公之子有閒矣昔人有言顏何人哉希之則是况希韓乎僕雖老尚刮目以俟時洪武五年二月初吉毘陵謝某書

余自無錫道吳淞過故交許君善家出太乙真人圖索題

按韓子蒼之詩曰太乙真人蓮葉舟又曰龍眠畫手老入神此蓋

題李伯時畫也所謂真人者姓名時代考之列仙傳等書無之不知其果何如人然以蓮爲舟偃然高臥丰神瀟灑似非有幻化之術乃真脫骨而仙者疇能若是乎是圖摹寫之妙較之龍眠筆法人無閒然其必善學而得其神乎神仙有無姑置勿論夫君子翫物以適情耳當此金革擾攘之際人皆埋頭塵塗欲超然物外之遊而不可得覽是圖者當心融神會與博望之槎琴高之鯉金仙氏之浮杯躡蘆者同適其適不止論形似而已宗禮求子言俾題其卷云云

書歷代蒙求後

世俗以千字文爲啟蒙之書尚矣然使之識字而已餘何益乎是書以四言爲句便於習讀自羲農以來數千載世代盛衰曆數修短燦然可見授蒙童令熟記而知之豈云小補哉觀者其毋忽焉洪武某年某月日毘陵龜巢老人敬題

題子昂竹石卷

昔文敏公初赴京師過毘陵止宗人東臯先生家人多求公翰墨後仕於朝往來書上時先生數從之遊因得公書畫凡數幅內竹石一紙公題小詩絕類此卷吁公初以詩名於時其畫與詩本皆絕妙今此卷備焉有區區未易贊述者特以子家藏舊物皆亡於兵眎今又隔一宇宙捧玩再三不勝慨惜

題敬親樓詩卷後

丹徒陳彥芳旣葬其親於別墅構樓以奉先祀扁曰敬親示不忘也夫死者魂氣歸於天魄氣歸於地故廟以安神墓以藏體廟必於家者神依於人也今彥芳奉祀別第其有徵於古歟抑其心有得於敬親之實而矯非焉以假其文者歟夫目之所視而思從之登斯樓也坵壟在望松楸蔚乎其前知吾親之藏於茲也與其族之人時而至焉固將羹牆而見之抑是室也吾親之所種樹今則拱焉吾親之所燕遊其遺跡在焉彥芳卽是以思其親其有不起敬起孝乎詩曰維桑與梓必恭敬止延陵季子曰骨肉歸復於土

魂氣則無不之也彥芳之心其有徵於是歟因書以歸之
題觀弈圖

世謂觀碁者恆高於當局之士子曰不然顧其人智有優劣亦係乎用心之至與未至耳今觀是圖寫對弈者二人其風度閒雅皆若聊爾於弈坐而旁觀者一人則注目碁局凝然若精思入神或一著可以決勝負而未易語人者熟視其狀殆猶陳平患諸呂燕居深念不見陸生入坐時也吁古之當國者旁求參伍與之策安危計成敗亦有用心如觀弈者乎撫卷三歎因題其末庶覽者或有感焉

楊妃齒痛圖

玉環瓠犀以荔子而痛痛未甚也玉郎爲環而痛痛則甚矣使移是痛以痛天下羣黎之痛惡至有天寶之亂蜀山之狩乎今觀唐隸所圖不痛環之痛而痛玉郎之痛抑亦爲當時羣黎之痛也噫題山谷香巖偈圖墨跡

宋高宗學廢於五季至本朝蔡襄等方入格律蘇黃米薛各有旨趣然則山谷之書爲一代名筆豈易得哉
題麋氏家譜

凡爲譜系者往往追稱先世勲業之盛世代遼邈變革不常茫然素然有未易考者或乃致遙遙華胄之誦君子恥之今觀崑山糜氏子才家譜則不然世禰至金紫光祿公爲高祖之考然後旁及羣從至於人所不知之地天其報之如此家譜之作蓋欲後人念祖修德象其賢行其澤非直爲觀美也詩曰子子孫孫勿替引之子亦誦此爲他山之助云
跋許氏臺萊集

子嘗以天下福善禍淫驗諸古今其理未嘗不焯焯也若曹彬曹翰皆宋重臣以彬之賢屢世榮顯翰肆貪暴子孫飢寒當時史官特竝書之以示勸懲豈不信然今觀宜興簿許侯克敬所示臺萊集譜其族自南唐金紫公居番迄今垂五百年其閒擢巍科登臚

仕者代不乏人非尋常世祿之家所能及也其從兄爲金紫公十
六世孫號德夫以舊編所紀詳於名爵略於行義乃重著而備錄
之諸先正之潛德幽光燦然在目然以愚觀之必有多蓄陰德默
契於天者雖子孫有所不知閭里有所不聞國史郡乘有所不載
天其相之裕乃後昆所以興起盛大至於如此不然何世代屢易
許氏之澤愈久而愈不泯耶詩曰無念爾祖聿修厥德又曰子子
孫孫勿替引之愚請爲克敬誦之以爲祝規并筆於卷末而歸之
時洪武七年夏五之吉某謹書

跋族葬圖

河南保定趙先生所著族葬圖其說本乎周官參諸眾論尊卑昭
穆粲然有倫使觀之者心生孝弟亦猶觀老泉蘇氏族譜也如是
以葬其親以祛其風水之惑豈小補哉先生諱炳字季明其經學
德望爲中州儒宗至元大德閒七聘方起官至翰林承旨學士平
居多著述若四書選注等書皆有功斯文愚恐東南之人有未知

程伯淳者故粗述於圖說之後鏤板而傳之詳見元史

跋蘇魏公百韻詩後

古蘇魏公百韻詩敘平生出處行事之大節謙言爲家訓也然字
字句句皆足爲世模楷豈特一家之訓而已哉若考亭朱夫子西
山真文忠公諸大賢咸有贊述區區後學尚何言歟嘗忝與公之
裔孫景瞻父遊婁東蒙出是詩警教嘗謂某曰名教有餘樂異端
戒多紊只此二句有終身行之不盡者蓋其服膺祖訓力踐正學
卓然不爲異端邪說之所惑故有是言時某輩知所向慕者亦幸
賴私淑而加勉焉於乎瞻父既沒世亦隨變瞻父之子若孫家毀
於兵獨珍藏是詩出入戎馬閒三十年與身俱存且能奉庭訓不
淫老佛亦可謂不負魏公垂訓之意也某重獲觀覽儼如對瞻父
晤言敬書此以寓感愴

跋脫時敬參政手書

字書心書也能觀其親之心畫而知其志焉斯可謂能子矣今觀

高郵同守畏吾氏伯堅於兵革之餘得乃翁脫公大參所書畫錦堂記如獲重寶愛之敬之不啻若其親之在目其殆著存不忘者矣愚嘗論歐陽子之爲此記也蓋知韓魏公之志在於德被生民功施社稷故以此二語爲一篇之要大參筆其文得非志魏公之所志乎使伯堅灼見其親之志曰德曰功當知勉其所以繼之者是則愛親之心又推之於書字翰墨之外能子之道必如是而後盡耳昔者辛亥秋公來毘陵適子復忠公墓田立碑築祠公爲之大喜嘗以弔祭之文示予而往時所書端謹鄭重視此篇筆意蕭散神氣飄逸有不同者此足見其字學之妙不滯於一偏也嗚呼落月滿屋梁猶疑見顏色況心畫乎想像高風不勝起慕敬書此以告伯堅并抒所懷云

書安撫陳公跋先君小像自贊後

昔者狄節使卻梁公畫像世固稱之若先代遺容遺言如安撫公父子者其後人當視瞻如生存恭敬如侍側勉焉企及之雖時有

汗隆命有通否有不克奮力以續先緒然所以是是非非不避權勢赴人急難如救焚然是皆起懦疾之藥石也慎毋以狄公藉口而藐眎厥祖如途人然詩曰無念爾祖聿修厥德軒冕云乎哉閱閣云乎哉今安撫七世孫茂吾壻也出示石刻祖像并覽贊跋起敬起慕因題其後如此云

跋張氏家譜圖

古番禺張氏家譜圖知常州府事中憲公度做歐蘇族譜爲之由七世祖而下瓜瓞延蔓尊卑疏戚瞭然在目中憲需予言予於是因有感焉書首九族詩重同姓吾夫子嘗刪定二經垂訓萬世其敦本之意至深切矣若夫大小宗之法蓋推廣之後世宗法寢壞世教日衰然天理民彝未嘗泯絕東平九世之張江州百口之陳亦代有之若文正公則能以祖宗之心爲心瞻族有田疏遠畢給真可謂不負詩書敦本之意今觀中憲公追念厥祖畱情譜系倦倦如此他日參大政得厚祿如文正可爲之時以是心爲之吾知

文正公不能專美於昔矣揚子雲曰顏何人哉希之則是愚於是亦云

跋呂仲珪孝思庵

夫爲人子者或不幸於養生送死之道有未盡焉處理之變當從權以事其事豈徒抱終天之戚而已哉今觀崑山呂仲圭氏早歲以父命出贅不能奉甘旨其後旅殯白下去家五百餘里又不能春秋祭埽以寓哀思服闋數年痛盡如故與人言輒流涕蓋仲圭以孝有不及情莫能忘然則如之何而可也惟所謂權宜用釋氏荼毘之法函骨而歸葬諸故土宰有楸梧祠而蘋藻焄蒿悽愴常若見之則其親之死猶不死也若夫繼志述事或出或處樹其業以慰其親則諸士大夫頌美孝思之言斯足徵矣

跋凌克禮父子孝感詩文後

昔聖人以子騫父母昆弟之言而稱其孝蓋人之善事親者必先目之口之於同室之人而後一鄉一邑之人熟聞而著稱極而至

於流芳天下後世矣前數年客有過毘陵者說潤卿父子之孝吃
吃不離口予來婁江婁之人咸譽之旣而盧兗州子長嬰以趙徵
士用晦所贈孝感序并諸賢士大夫歌詩凡若干篇皆本乎其父
母昆弟之言予然後知潤卿二子長克仁次克禮能罄家輸粟以
贖罪去之日奮不顧數千里危難爭先而往昔趙禮兄弟遇暴將
腐食之其兄孝曰吾體肥可代吾弟若克禮事雖不同其亦趙氏
之心也歟然或者謂是亦常人所能爲予故原其心而論之如此
豈易得哉豈易得哉今而後凌氏五世而居重闈色養其
所以盡其孝道者固不止於是也時洪武十六年夏五月龜巢老
人謝應芳跋

跋陳寺丞思愛菴疏

右故寺丞陳公以思愛菴奉先疏請果上人主之駢灑精切字畫
端勁其爲人可知寥寥二百餘年爲果嗣法者不知凡幾代是菴
易名圓通蓋亦有年公之疏文幸而無恙今性中師弟子知敬重

之求士大夫題識余於是竊有感焉宋之文憲禮樂盛於漢唐然當時世家如文潞公之有家廟者絕少以請寺觀爲香火院者滔滔豈禮樂不明淪於俗習以致然乎今性中知其文當知其心知其心則知所以敬其先世者在乎菴仍舊名庶存初意則名正言順而奉先之事終於有成寺丞公之死猶無死也豈徒重其文而已哉

跋岳氏族譜

岳氏爲常之望族舊矣予早歲過唐門見其宅第相甲乙者數家且聞竹山蔣先生言宋乾德間岳王弟經略使之孫自九江來居由宋而元子姓蕃衍文物之盛拔萃同里比以陵谷變遷奕葉憔悴東之懼譜散失嗣而輯之猶老泉蘇公之譜其族也泉之言曰觀吾譜者孝弟之心當油然而生吾知東之亦以是有望於族人焉或謂昔者狄武襄不後梁公君子韙之是大不然非其後而附之者非也爲其後而自外之者尤非也故人苟能以東之之心爲

心由孝弟以行吾仁則民吾同胞四海兄弟無往而非仁矣然則族譜之作豈小補哉時洪武十有九年六月既望龜巢老人謝應芳敬跋

跋經訓啟蒙

右經訓啟蒙北溪陳先生之所作也先生經學得考亭夫子之傳卓然爲一代師表病世之訓蒙者所教龐雜蔑養正之功故採摛經傳以三四字爲句輯成韻語以便習讀其書言孝之大原學之旨要使幼學者誠能熟讀而蘊之於心養其德性旣而長施諸事業則舉而措之耳某昔避兵東吳得此書三十餘載郡人徐孟容孟曾等見而寶之謂明珠暗投良可惜也用是刻板以廣其傳嗚呼先生經訓以教羣蒙蓋以聖賢之心爲心視龐雜之書蘭鮑不同俱化之效久當見之凡爲父者可不慎其擇乎程子曰習與性成聖賢同歸吾於此亦云洪武己巳九月重陽日毘陵謝應芳拜手敬書

張孝子傳

張孝子小字阿伴常之無錫人也爲兒時父母以歲飢去鄉土流離四方後徙居晉陵之東洲未幾父卒兄亦早世家益貧母偃僂不能任婦事中歲復多病常在牀席伴傭力黃氏仰給之黃氏工染色伴因學焉久而遂精其業主愛之歲益其直伴身無完衣其奉養之具隨在而豐時得一美味必歸遺母母或分餉之則給云已食母盡之則喜當暑月每夕則炳蒿萊以驅去室中之蚊拂枕席以安母寢隆冬雨雪鑪不絕薪疾必燠母於懷如此者二十餘年服勤於親殫力於傭未嘗一日廢其事忘其志也母壽六十五以天年終慟哭幾絕先數歲預營葬具及斂之日卽舁柩歸無錫合葬父塋今墓木已拱春秋攜酒肉省墓必邀致鄰里飲食之拳拳焉爲保全坵壟之計平居遇飲食適口猶常動風木之悲或哽咽飲泣徹而後已且以親在之日仰食黃氏深德之效力益勤或者常欲倍其直募之伴不從嗚呼斯亦可謂義焉耳今鄉人特嘉

其孝稱爲孝子云

贊曰以曾騫之賢人親炙聖門得學問之力其孝宜矣若伴之微生長陋俗目汙凶德耳聽諛語乃卓然返哺跪乳梟獍之羣使游聖門而學焉安知非曾與騫之徒歟區區受傭於人又能以力報效久而勿忘吁世之朝祿爵而暮亡叛者其人寧無愧乎

錢孝女傳

錢孝女者吳郡田家之女也父母喜其性婉順納壻與居洪武初兵交歲餘徙家常之三山湖服勤婦兼力農畝搢搢乎其養其親父卒母老而病踰兩期腹中有瘕癖號呼痛楚女甚憂苦每中夜仰天求佛拜跪懇禱一夕潛以刃割股給其母爲他肉熟而進之連年之疾卽刻而愈旣而鄰里以其母無號痛聲故詢之知其然眾皆驚歎女姨母爲吾鄰嘗詰之言其細行人皆不可及久而益勤至不惜其肢體此亦可謂篤孝也乎

論曰昔有人同錢氏之孝昌黎伯固嘗非之其言蓋本諸經以毀

傷爲未善也然閭閻匹夫之愚禮教不知一念之誠根於方寸通乎神明而孝感昭著如此豈易得哉豈易得哉彼薄俗之不顧養者聞錢氏之風亦寧不泚頰芒背慙其心而知悔悟也歟是歲庚申六月望日

諸葛節婦黃氏傳

黃氏名真靜丹陽縣呂城諸葛用中之妻也父家晉陵以其女生有淑姿善女工父母鍾愛擇配數年聞用中爲兒時過驛亭適南臺監察御史普公見之以其能屬對擗大字甚佳呼爲奇童聰慧之聲洋溢四境故黃氏之父以女許嫁之旣嫁而翁知其能遂託付家事使其子得耑儒業翁歿其夫皆能以翁之心爲心服勤如初賓敬之禮弗渝肥家之功益著養子課作而愛不姑息凡鄉里之爲父爲母之賢者咸儀之元末兵興夫婦挈家竄吳下蒿簪卉服藜藿食飲艱苦十有餘年夫病而亡哀慟幾絕吐肝膽告之柩前曰未亡人真靜三年服除當星冠羽衣若女道士以終其身有

所否者天殛之由是教其子以繼承宗嗣無忝厥祖洪武改元於鴻雁安集之初歸葬其夫命其子復舊業付有二三餘皆棄置蓋亦知止足之義而無殆辱也數年之後又能擢其餘力助羽流重構清微觀以祠先世身佩符籙日誦老氏書貞節愈固今春秋七十有五鄉人嘗欲聞諸官以旌其門婦曰夫死不嫁吾分內事耳卒不許於戲婦有節義禮教所嘉況能繼述以昌其業以裕其嗣續豈尋常矢節者所能及哉予嘗往來常鎮間聞諸邑人質諸鄉校無閒然者故撮其要而書時洪武二十二年三月之吉

長白山居圖說

客有過予者雨窗焚香相與覽高沙李侯山居圖客謂予曰世謂畫馬無聲信矣往者李德裕以軒冕之貴疏平泉之遊賦詩憶之是圖之作亦其詩之意歟余曰不然平泉花石以力致之窮奢極靡蓋溺於玩物者也夫長白山天然勝地爲梁鄒冠冕甘泉巨谷嘉木幽卉蔚有清氣昔范文正公讀書其閒齋茹糜食與山俱清

卒爲一代名臣今侯鍾茲山之英人品卓絕學亦如之至於擢高科參大政出處繼范公故武山中猿鶴豈云忘情但時方敷歷中外若安爲蒼生而起奚暇復顧東山乎是圖也蓋侯默寓居家讀書之意以示其子孫抑亦示不忘桑梓之敬焉耳平泉之思豈其比哉客唯而起且俾以所答之語筆之圖左俟侯見而質諸

月泉說

學老氏之學宗乎無爲而能無不爲者唯其心之清明洞徹不泥於物所謂圓機之士爲能然耳吾友闕伯真殆庶幾乎漢天師四十二代孫張公真人嘗以符籙授伯真矣伯真宗其道行之於家黃冠鶴氅蕭然出塵然而陰陽醫藥巫卜之術又皆旁通至於桑海變易溷跡塵土亦未嘗忘其學離其道也真人嘉其能乃大書月泉二字爲伯真號吁名者實之賓也月泉之稱豈苟然而已哉共推千載心秋月照寒水昔吾朱夫子有是言也今真人直指其心而喻之所以警伯真者至深切矣夫是心也誠能皎然如月之

明湛然如泉之清無幽不燭有感斯應雖以膠膠擾擾之物紛乎吾前而吾之至清至明者蓋自若也然則圓機之士不幾乎和光同塵升老氏之堂而入其室歟伯真勉乎哉

無知生說

夫人與萬物同生兩閒而其所以不同者心知之靈耳彼巢而知風穴而知雨鳴而司晨吠而警盜知恩而返哺知飲而避去若此者亦未嘗蠢然而已人而無知可以不如物乎吾友趙君執中生而聰明又常用力於格致之學行年三十號無知生故聞者不能無疑焉或謂執中以時俗尚智術飾巧詐狡獪萬狀深疾之將欲塗其聰塞其明矯俗之弊以返乎不識不知之天寧爲蚩蚩之氓而不知也予曰不然若是則因噎而廢食矣吾意執中讀孔氏書尚友千古觀聖門高弟賢如顏子聞一知十方且有若無實若虛終身如愚人然況學者乎故雖多識前言往行而自視欲然猶無所知也然則名爲無知實欲求知其所見之大爲何如哉予嘗叩

之執中執中笑而不答故筆此解或人之疑并勵執中亦以自勵云

子京字說

父命子名而朋友字之禮也吾友張君伯祥之子名畿予固知其愛子之心期以遠大字日子京且爲之說曰京畿人海也五樓十二城金門玉堂冠冕佩服館閣之文物羽林之劍仗瓊林大盈之府庫凡如此類皆天下所無有實乃魚龍變化之地也故有志之士雖在窮途必勇其行乘風雲叫閭闔瞻日月之光被雨露之恩然後爲無負也今子京年方壯強一日千里勿忘命名取字之義不然則齷齪與蓬蘽同腐徒美其名何足尚哉

存耕說

爲孫允昭州判作

客有遇存耕叟於龜巢者商略今古劇談久之客謂予曰叟方臚仕而暇耕乎不耒耜蔑畎畝耕可得乎予曰不然善觀人者於其心不於其跡夫以其跡論之叟固常主一邑之簿矣嘗爲一州之

判矣然方寸之地了無荆榛耕之以禮耨之以義存而遺之子孫故於昔人之言取以自號以示無窮之意耳吁以其遺較諸德公蓋亦大同而小異矣且天生斯人亦莫不有耕耨之具焉但往往荒穢弗治暴棄而自失苟能存之則其後之人以耕以穫以收其成功乃必然之理何必泥其跡焉客語塞叟起而謝曰詩云他人有心予忖度之巢翁之謂也請以對客之語貽諸後人自曰存耕說云龜巢翁者毘陵之謝應芳是也

景中字說

尼山聖人筆六經以詔萬世其之一言閒見特出旣而子思子著書以授孟子寥寥千五百年知者蓋鮮至伊洛諸賢發明蘊奧昭如日星後之人敢畫蛇而添足乎然所謂景者景慕以冀及之學者之志也中則人所受於兩閒與生俱生無物不具學之道必先知無不明而後行無不當竊嘗以射譬之物理之中猶射之的凡射必先知其的之所在謹乃弓矢正已而射之斯可言中矣不知

其的而射者妄也妄而或中乃偶然耳吾無取焉惟時中君子從
容中道無適不然是妙於射者也詩曰高山仰止景行行止如此
則思過半矣景中勉乎哉不然執中如子莫中庸如胡公不免爲
天下後世之誚此又不可不知也

德宏字說

東林趙先生爲前代遺賢今其四世孫名廣姿稟之淑善讀書兼
明今古法律以勳業自期不狹隘以自局焉故朋友以德宏字之
請其說於予予曰人生天地閒渺如一粟謂其能與天地參者正
以執德之宏心同宇宙萬物皆備於我萬化皆出於茲所謂小無
內而大無外也勳業名譽蓋亦隨其廣狹小大而成焉若夫方寸
之衷彼疆我界藩籬荆棘雖有所得蓄縮如蝸不免貽笑於大方
之家耳然名者實之賓也名浮於實君子恥之夫以子爲東林有
道之孫貽謀未遠其立志果不■乎報德果不虛乎昔者孔門諸
弟不如曾點漆雕開能見大意聖人乃悅之予之使學者誠能有

二子之見以宏厥德則宇宙吾心也吾心宇宙也曾何人哉漆何
人哉希之則是慎勿謂老生常談而忽諸

寶山字說

今聞浮屠氏之所寶者三曰佛曰法曰僧如金銀珠玉之屬爲世
所貴雖亦七寶稱之較諸佛法不啻霄壤故瞿曇氏在祇樹園說
法有曰人以七寶施厚而求福者莫若般若一言持之於已教之
於人得福爲多由此觀之金玉之寶積如邱山何足貴哉今趙居
士拱貞有志學佛在家出家浮圖師以寶山字之其意若欲使之
歆豔而得之是亦欲其爲善也不然郿陽積金賈然臍之禍銅山
鑄鼓致餓死之辱凡如此類識者恥之況欲使人歆豔乎楚書曰
楚國無以爲寶唯善以爲寶如是而言則語意明白開示以導其
進庶可謂善誘人矣居士徵予言予無可言者請以楚書之語語
之或可補其闕云浮屠氏以爲然乎哉

學古字說

先友丁德齋往嘗以家譜示予曰五世祖爲寶祐相國多藏古聖賢書厥後以陵谷變易家用淪落書亦飄散元初大父乃徙居鄉城以慈幼齋醫藥如成都賣卜者焉他書無復有也今德齋肩子數喜讀軒岐靈素外嗜六經諸史不啻膾炙故老夫以學古字之謂曰古之學以三綱五常爲重綱常不舉則無以立身身不立則道不行於妻子況餘人乎道有大小事有緩急必先其大者急者後其小者緩者毋泥焉古之人巢居穴處無宮室也茹毛飲血未稼穡也凡如此類苟一切是古非今舍此取彼不幾乎迂疏放誕而行怪乎吁居今之世反古之道裁必及身子思子垂訓後人爲世良藥此尤不可不知也學古宜慎諸

聽其自然說

爲黃仲器作

老友黃仲器以聽其自然四字揭諸齋居一日載酒過龜巢需予文予以不知其言出何書意取何在莫敢妄爲之說仲器曰吾意天爲自然餘無所知也予以是臆度而告之曰物本乎天而主宰

之者理也夫所謂自然者如陰陽之消長日月星辰之運行江河之所以流山岳之所以峙草木鳥獸昆蟲之所以動植變化至如人大者三綱五常富貴貧賤死生壽夭之類小者如四肢百骸飲食衣服宮室車馬之屬皆本乎自然之天味者乃欲以人勝天而不聽之若季孫氏以魯大夫僭天子禮樂富於周公秦皇漢武欲長生不死者未嘗不自禍其身也孟子曰順天者存逆天者亡斯言盡之矣仲器作而謝故書此以警諸紳示諸人亦庶乎有所警云

無名異說

江湖之濱有物焉其大如菽圓如橢黃而黝外強而中乾似沙非沙也似礫非礫也纍纍乎沙礫之中不知者直以爲沙礫然髹者得之以和銅漆之漬易燥以益堅否則工雖良勿能使之燥也況堅乎故善髹者率用之以其有奇用而無名異故以無名異目之而邑有雷氏者髹數世矣其亦老於髹矣每役士大夫家則以是

詢之卒未有得其名者一日語予而悲之予止之曰是奚足悲哉
夫君子負有用之才沒世而名不稱者滔滔也況微物乎噫世之
用人者其亦有如雷之悲者乎

蛇蚓說

五月望余艤舟城西見牧豎數輩飲牛而過河俄有走而號者曰
蛇將齧人豎皆失色已而聚觀果伏蛇草中咋舌掉尾吐毒氣勃
勃可畏羣豎欲殺之擲礫如雨蛇度不能脫乃游於河猶昂首騰
踴作齧人狀旁觀有不勝憤者持短挺涉水擊之應手而斃眾皆
懼譟爲快予旣歸明日過白鶴溪上時暴雨潦水盈溢而蚯蚓縱
橫於途途之人殆不能容足先予行者三人老一壯二皆擇地而
蹈不蹂踐以殘其生吾如之回視吾蒼頭亦然予因是甚有感焉
夫蚓內無筋骨外無鱗甲苟欲殺之斯須可累千百今若此視城
西之蛇不侔矣噫蛇欲殺人而人殺之蚓則無害而人亦弗爲之
害非有所厚薄也人而蛇者可不悟哉

盟鷗文

爲熊元修作

鷗社叟老於元末屢聘不起遂屏跡五湖三泖之間魚鳥爲伍睨
京洛萬人海中鳳有池鶴有軒鷹揚而烏集紛紛乎五鳩之屬造
羽鴛鴦爲時羽衣是皆出類離羣弗與吾友而吾亦弗爲之友也
唯鷗也素服娟潔野性閒雅且夙嘗與叟相親蘿風葦月雲濤煙
浪凡可以適吾適者莫不與之共之一日舉觴酬玄真子天隨子
乞靈爲鷗社主盟而矢之曰鷗乎鷗乎爾忘機吾亦如之恆游居
於斯又曰鷗自蚌持鵬自溟徙斯盟或渝有如白水時龜巢老人
亦奉盟插吳淞之淥而與盟焉乃丹書其辭

招隱論

夫連城之璧蘊乎荆山明月之珠藏於滄海苟非識者有以取之
則希世之珍亦不能銜而自鬻也隱逸之士蓋類此耳嘗觀古之
隱者如莊周所稱善卷許由樊仲父之流土苴天下雖唐虞聖人
之事皆爲汙耳此蓋荒唐繆悠之談無足深信請以商周以來經

史所載拔其尤而論之伊尹耕有莘之野以成湯所知致聘再三遂爲阿衡不然則終於犁鋤之叱矣傳說隱於商巖以高宗所夢圖像旁求乃得爲良弼不然則終於版築之夫矣周之太公濱海而處坐茅而漁非文王載以後車則無鷹揚之功武成之日矣漢之四皓茹芝商山其不赴高祖之招而從儲君之游者蓋爲炎劉氏基業而出其大功爲何如哉若夫淮南王八公之徒大山小山之什其文藻才華不爲不盛然未聞爲朝廷得人使之康濟斯世斯民之用故君子無所取焉至如光武中興之業海內之士雲合響應而嚴光周黨獨能以節高之或授官而不拜或廷伏而不謁卒歸於江河荒寂之濱欣然與魚鳥爲伍唯其清風峻節砥柱頽波誠有裨於世教也三國六朝而下求其如南陽布衣鞠躬盡瘁以報其主三顧之勤者固少然徵舉遺逸代不乏人但燕石或僞爲荆玉魚目或誤爲隋珠不免有純盜虛聲之誚者矣今郡縣之職歲舉人才是亦古招隱之遺意也唯能知其人而取之巖穴之

閒度其才而薦之朝廷之上鉅細精粗各適其用此誠爲聖天子恢弘治道之良法焉詩曰濟濟多士文王以寧夫士也爲時而出其必有以古人之所以寧文王者以寧今日之天下國家毋徒視終南爲捷徑云

東吳野語

許慶一者崑山縣石浦人也贅同邑許家墩繆氏既而父歿母食貧往繆氏依焉慶一妻不孝於姑天曆三年六月十三日將晡其姑以飢訴鄰人許本空適安亭陸省磧澳魯道在坐且與繆姻戚遂同往勸說之本空以其釜中所餘飯飼之婦奪而覆戶外曰寧與犬食本空等方怒罵厥婦毀姑不輟且指天誓所毀不妄時片雲起西北俄頃煙霧四塞晝暝如夜霹靂震地里中大駭獨其家無聞焉本空等但見有白氣如練緣竈突下垂三人則恍然若有推出也者跌仆在地大雨傾注平地水湧溢半尺屋焚婦震死然鄰居相接略不延燎婦死至夜復甦遠近驚異婦姪數月或者

謂天不忍其腹中之子故爾由是婦方知懼養其姑以壽終今婦年六十有七當時所震者生女四十一歲矣洪武壬子冬毘陵謝某過許墩許均善家聞其詳如此於乎孰謂天爲茫茫耶屈東海之婦而旱乾悲齊堂之女而振風炎霜降獄熒惑退舍其響應若此者已多矣豈特斯婦乎然天卽理也人不順理是爲逆天順天則存逆天則亡蓋確乎其不誣也雷震之事予特欲使昧於理者知有所警故筆之

癘鬼辨

往予過無錫適州人出郭迓神赤髮青面吻出兩牙狀極詭異旗旄鼓吹衛從而昇之予訝而問焉人曰此唐張巡也且言公死時自謂當爲癘鬼故世稱公爲疫癘之神而崇奉焉嗟夫是何邪說者附會如此耶按唐史公守睢陽如一木支大廈之踏兵盡力竭死不忘君故發憤曰生不能報陛下死當爲癘鬼以擊賊此蓋忠義激烈之辭豈謂爲疫癘之鬼以害天下後世之人哉所謂癘鬼

乃汎言剛癘之鬼若韓文驅癘鬼之癘相似非癘疫之癘也誣枉前賢罔惑後世邪說之害一至於此可不辨哉第恨老無能爲不能爲州人毀除淫祠一洗習俗之陋區區謦言用告來者

重建縣學事實

皇明受命政教一新設學校置師弟子員以教以養以求其實效非疇昔文具比故官於郡縣者常以是切切也洪武五年武進縣知縣臨川董公縣丞江陰陳公以縣學弊隘僉議易之旣而乃割俸構講堂三間其軒楹如堂之數翼以兩齋齋各三楹教官等齋廬庖湏之屬又十餘楹由是師生有講堂居息之地矣明年春視夫子廟棟橈柱折懼將壓焉曰殿曰廡曰戟門及靈星門皆撤而新之聖賢肖像重爲修飾而邑人具瞻之敬益崇矣又明年規射圃於學之傍爲門三閒闢門道南向深若干步而戶外闔人守之凡廟學計若干楹其崇廣皆比昔有加地皆發甃繚以周垣樹之嘉木奐輪之美丹碧之輝煥如也某竊惟前元時武進縣初無

學宮所設教諭附郡學廩稍至某某年有司初始記者謂病地弗弘蓋苟焉而已今吾令與丞皆儒而官故能以興學爲己任前主簿登萊尹公及今簿澤州張公相繼翼贊以底於成民非不役也而役之以時故民忘其勞且有樂助其財力者皆賢長貳祇順朝家教學之意而邑人化之又能心長貳之心育才之盛當自今始真可爲斯文賀

辨訛

江南淫祠在唐爲狄梁公盡毀唐衰禮廢繼以五季之亂妄意徼福諂非其鬼泛然以犬號加封紊雜祀典祠廟滋多里巷閒土地有祠蓋肇於此然以民情推之其始也必以農穀之功本乎地土歲時祀享亦近乎報本之意迨夫廟貌之設無可爲像遂以鄉之有齒爵者當之既久而世代變革承訛踵繆至有可笑可怪而不可解者姑以目前言之郡城西南三十里曰梅村廟稱三姑其初必曰某姓三孤之官後乃訛爲三姑也按周禮三孤之貴次於三

公卽後世所謂少師少傅少保也村毗巫祝之流無知妄作以孤爲姑又城之北東有稱十姨者必拾遺之誤雨淋者必羽林也夫以十姨爲一婦人以雨淋而不室處是則可笑也已至若三姑乃儼然塑少艾三人冶容美飾眾所具瞻且復變九里塘爲九女以附會其無根之談蠱惑人心傷風敗俗有不容不辨者改而正諸宜自茲始吁甚矣人之好怪也昔蘇長公之詩有曰舟中賈客莫謾狂小姑前年嫁彭郎蓋以江州有大孤小孤之山澎浪之磯其俗亦訛孤爲姑訛澎浪爲彭郎公戲而譏之意甚明白有足以破其惑矣如應芳者雖究明是理灼見其非無狄公在位之權又無蘇子名世之詩請與鄉之士君子追原俗情遵依法律撤去繆像題其主曰土地三孤之神如此則可以正訛傳息邪說合今朝之令典釋舊俗之羣疑且不失其初報本之意若夫埽滌淫祠行之四方有不在我者不喋喋也芻蕘有詢尚俟他日

釋異

古禮人之初喪所以待三日而後小斂者蓋冀其或再生也今吾子死終日而甦無足異者但沐浴裳衣神色不亂命諸生筆遺屬二千餘言言有倫序視其字之誤者索筆爲塗改之比常人之死固有異焉至若啟殯之日經盛暑兩月不臭不腐面色如生則其異甚矣宜乎君子言墓誌不書此蓋遵用聖人不語怪之遺意雖然吾嘗觀晉書盜發尚書令卞公壺之墓壺屍僵且握拳透爪宋劉忠顯公韜靖康中使金不屈而死之燕然愍其忠叢諸西岡凡八十日金退方斂葬顏色如生史皆不誣矣又如玄鳥生契履武生稷說者謂神人之生異於常人麒麟蛟龍異於犬羊魚鼈夫死者一理也有生者之異於常則死而異者何足怪哉區區所以言者非諛子也非好辨也公天下之理而論之曰前輩有曰千人萬人中一人兩人知殆謂此耶噫

請除淫祠文

先王祭法載諸禮經曰法施於民日以勞定國曰以死勤事曰捍

災禦患者則祭之非此之屬皆淫祠也是故狄梁公盡毀淫祠程子言除淫祠而民爲善蓋淫祠不除則愚民無知將謂福可諂求而得罪可妄祈而免所以爲惡者肆而爲善者鮮矣欽唯聖朝更化之初詔誥多方淫祠有禁革諸神大號之僭稱斷婦女燒香於祠廟釋道菴院不許擅立況淫祠乎此國家洗陋俗之新條息邪說之要道普天率土罔敢不遵竊見本府西城門外有不得姓土男子突於大驛路傍創立神廟稱爲金家扇惑羣氓燒香不絕若不早爲禁止將來爲患可勝言哉如蒙官司覈實當地里甲人等果有實跡諭令拆毀庶免無知之民誤遭刑憲如此則梁公忠國之心程子愛民之意一舉而兼得矣區區毫言因國家正大之氣感而應之如豐山之鐘霜降而發聲也僭越之咎必蒙矜恕賜諸施行公諭幸甚風俗幸甚

饗天解

洪武甲子秋冬之交多雨而早寒兒輩爲予作小閣東廡廡周圍

紙屏上蒙葦席方廣裁七尺有咫圭竇出入垂之以簾亦織筠而楮之與屏一色如堊壁然瓦盆紫火傍置小榻老夫得飲食坐臥乎其中既安且煖熙然而春外閒雖層冰積雪鼓之烈風天地六合爲一凌陰此室以衛護縝密寒氣無罅隙可能入也但一己之樂未能及人猶醯雞之天苟一甕中耳故名之爲熙熙甕天客或笑之曰樂則樂矣何誇歎彼富貴之家雕甍繡闥熾鳳炭之鑪重獸錦之茵煖玉爲杯酌以醇酎肉臺盤交進於前肉屏風擁於其後溫柔之鄉其樂如此子之甕天能彷彿其萬一乎予曰不然彼樂於人吾樂於天樂於人者肆其欲樂於天者安其分區區野老年將九十目識一丁之外餘無德能爵祿貲財皆無以致之今若此不唯鄉閭側陋者鮮能同之古之君子若使虜持節者齧氈沙漠佐主中興者渡兵淖沱抗疏而謫官潮陽擒賊而夜入蔡州是皆冒冰雪涉危途急於報國而不暇顧其身也又若羊角哀之往於楚左伯桃之死於樹樓煩墮指之卒赫連蒸土之眾其爲痛苦

可勝言哉今予之樂竊比於醯雞甕中之天非誇也自以爲足也言未竟客掩口而去救弊

世俗以浮圖治喪先正斥之蓋欲行古喪禮終事親之孝而厚風俗也比年以來或者吝於財而薄於親者泛然以文公家禮藉口喪禮不行佛事不作視骨肉至親之死如途人然棺壙之外餘皆無之不孝不慈傷風敗俗至如俗禮以飲食待執紼之人亦靳而不爲親戚非之鄉里譏之有愧乎設無礙者多矣嘗觀佛事之作雖非正道亦彷彿古人祭祀之儀然香點燭猶鬱鬯庭燎之用也疏文陳白猶祝詞也齋廚供饌猶邊豆簠簋也紙錢楮幣猶玄纁圭璧也葬之日以旛幢代銘旌以鼓鈸導輶車亦皆敬吾親而送之也然則鄉俗之人喪禮旣不能行而能爲此亦可以寓孝慈之心表哀戚之意也嗚呼今薄俗一毛不拔二者俱廢吾恐轉相仿效習以成風將胥梟獍之行是故不得已而言佛事之用如前所

云初非舍正道崇異端而忘古先聖賢之名教也吾家子孫當先
警省知言君子宜以情恕洪武二十年秋七月龜巢老人書

貓捕雀圖評

物之性有微近人性之義者貓捕鼠犬吠盜獬豸觸邪是也貓舍
鼠而捕雀失其性也失其性此不義矣夫雀耗倉廩耳比鼠之害
什有其一今畫工畫啖雀之貓銛牙利爪吻流饒涎踞坐而猛若
虎鴟口是張甚可畏也嗚呼張綱已矣埋輪之語世莫得聞故良
工用史法■意以警夫繡衣豸冠之屬微而著隱而顯觀者宜默
識焉

讀易齋

秦燔六經藐大易爲卜筮書不爲煇燼夫豈一經之幸而已哉實
千萬億載斯世斯民之幸也是書出羲皇文周孔四大聖人之手
天也地也人也萬事萬物之理洪纖高下包括無遺學者當薰沐
稽首北面而讀之口誦其文心維其義見聖人於羹牆之間燭妙

理於形器之外全體妙用或庶幾焉所謂卜筮之理固在其中特
不專於此耳先正程朱二先生所次並舉而兼得之奈何近代以
來去聖遼遠邪說害正假禍福託妖幻以誣著蔡之靈又有宗九
師而異其傳吞三畫以神其術自謂探賾索隱者滔滔也至若目
之以遣閒愁而消世慮凡如此類不幾侮聖人之言者乎吾友章
彬甫自早歲讀易如悅芻豢猶恐不及而或失之故以讀易名齋
需予言者數月予維大易之義天高海深豈管窺蠡測者敢贅疣
乎維尊之敬之對越前聖如神明父母口誦心維假以歲月將見
源頭活水之來涵泳乎先天後天也洪武十七年十月旣望毘陵
龜巢謝某

獬犬文

東家翁以防盜畜獬犬數十平居多齧人其一忽牙口吐舌安其
尾疾行而不顧齧同類則其狀亦如之翁坐視若無見焉人曰獬
犬也宜謹避之里有膂力者頭髮上立忿曰我也誅蛟搏虎吾

力猶能何避此爲適有獠犬突如其前遂怒踢之躡而不死厥足
踉微有所傷不數日叫號而啞人爲眾所殺嗚呼犬之獠者固病
也翁坐視縱羣惡爲物害無算不仁爲甚矣然世之人形獸心害
同類而無厭者滔滔也豈特獠犬之爲害而已哉洪武二十年秋
七月日某書

學書

字書之學訓蒙者率以上大人二十五字先之以爲點畫簡而易
習也然所謂三千七十殆若指孔門弟子而言如丘第四字乃聖
人名諱理合迴避豈宜手之口之以瀆萬世帝王之師乎其未兩
語之乖刺尤甚故某不揣狂瞽嘗易之數與方名曰一二三四五
六七八九十百千萬億兆東西南北上下前後左右以字畫較之
亦簡易也待其手熟卽兼以壹貳叁肆伍陸柒捌玖拾百千萬字
教之以備公私計算之用區區管見於茲有年敢用質諸先覺訂
其是非儻不以人廢言或可爲他山之石而不至瀆萬世之聖人

云

書耕習軒後

往予識崑山陳侯某忼慨論前代事高宴曲堂旣而陵谷變改各
天一方未得與阿戎談也洪武庚午冬學子張文中以陳侯之楮
子孟剛耕習軒記見示其文乃汝陽袁先生所作其辭有曰夫耕
婦饁帶經鉏犁以漢魏閒倪常比之吁昔陳侯以貴富雄一州今
其楮一旦舍紉綺而臺笠緇撮委膏梁而藜藿飯糗熊膽之丸不
勞於其親牛角之歌不效於前人蓋立志之高能爲人之所難能
者如此袁之言信不誣矣尚奚用畫蛇而添足乎雖然靡不有初
鮮克有終此古人苦口良藥也孟剛需予言敢用此爲芹曝獻

言所可喜者兄其息肩幸有二雛能奉周旋日飲無何皞皞其天
意此安佚壽或可延奈何遽衰屢疾屢痊絕粒信宿晞露溘然嗚
呼哀哉誰無兄弟我獨孤苦顧二雛者視予猶父我嘗勸之以纘
先緒矢心以詞酸淚如雨

代祭子文

嗚呼天降禍於吾家何其酷耶我生勞勞髮已垂白冀汝家子仰
事俛育以纘先緒汝年既長頗涉事故與汝諸弟左支右吾我經
爾緯我作爾述知稼穡之艱難未嘗敢怠慢而逸也惟汝多病常
貽我憂去歲仲冬幾致弗救厥疾既瘳我心則喜然未嘗假以詞
色實慮汝因疾之餘弛而弗張馴致怠荒故也正月之吉我適錢
塘別方兩旬訃音忽至將信將疑屢泣屢止意汝暴疾氣或絕而
復蘇聲或啞而再語匍匐來歸汝簣已易汝棺已斂吾無復見汝
之面矣可不痛哉嗚呼彼蒼者天我罪何居人或釋之子淵之天
顏路何辜信乎修短之有數耶抑天道之茫茫耶不然何乃使汝

不得其壽也嗚呼汝子汝女嫡庶五人女嫁其一子皆未婚汝何
忍置之不顧耶食指之眾賦役之重又何忍老父無息肩之日耶
死而有知汝必念冥冥之中而我之所以念汝者將何時而已耶
嗚呼痛哉我築之室汝弗與居汝置之器用以祭汝今卜日祔葬
汝祖塋之側撰此食飲與之永訣汝妻汝孥哀慟欲絕

代王氏祭叔父文

嗚呼痛哉吾叔父春秋七十有二年始於承家中於克家終於成
家其劬瘁艱苦非諸幼所能盡也但見完美之室風雨不動衡從
其畝阡陌相通男有室而女有家水乘舟而陸乘馬非叔父積累
之功何以得此哉至如目能識丁皆叔父延師之力也行不犯義
皆叔父提耳之訓也一室之間總服同爨以叔父之恩無偏情無
私嗃嗃之威嚴不可犯故能齊其不齊以致其齊耳嗚呼痛哉庭
訓之言萬萬千千今不能盡述矣如南塾篝燈東軒舉茗嘗屢進
某等於前而語之曰吾兄弟自生至死未嘗有闕牆之日也吾夫

婦自少至老無牝晨之患也鄰不爭畔奴無私蓄許人以諾不食其言鉤鉅不知培克不能汝等亦能如是乎凡此數事反復告戒知幾朝夕今其已矣斯言不可得而聞而某等爲之子爲之姪爲之孫者可不追念貽謀而踐其成法乎否則爲叔父之辱親朋之譏鄉里之笑天地間之罪人也嗚呼痛哉去年之先人皆謂叔父嬰鑠其壽未艾也孰謂數月之頃視則眊焉聽則聵焉筋力索焉方病而紅寇入室病愈而租吏打門百憂感心二豎成禍而某等猶以醫藥可恃而不懼也詎意遽至是耶嗚呼痛哉教育之恩固不能報其萬一但速葬以遵治命如此永別之悲五內如割泣血以酬惟以告哀嗚呼痛哉尚享

代周華父祭伯文

昔我先人早棄諸孤所恃兩伯其一復殂巖然獨存山澤之癯憐我兄弟教之友于雖異厥居有無相須撫之愛之與子不殊奉承周旋匪朝伊晡階庭之間言笑怡愉小過弗責曲禮弗拘叱咤之

聲罔及僕夫鄉稱善人久矣不誣年踰八秩健飯爲娛詎意一疾竟若摧枯由茲而往誨言則無疑難誰質顛危誰扶寧不使我哀號痛呼伯兮伯兮死不復蘇薄陳簋盞清酒一壺收淚永訣靈其鑒諸

代祭吳閒閒真人文

玄玄之學世遠言湮不有先覺孰貽後人伊昔上卿道契世皇手持玄珠光明四方我師繼之山鳴谷應弘道累朝惟清惟靜帝錫之爵羽節霓旌邈乎高風崆峒廣成出入西垣在帝左右黼黻皇猷厥功亦懋名日益重德日益尊世則賴之以玄門豈不懷歸怡雲舊隴勇退弗獲祇承天寵閒閒之雲聖皇所知大書以所思奎畫煥然寶玩無已瓊館逍遙以永朝夕胡厭斯世遽遊鬱羅哀聞九重傷如之何我諸葛翁嗣法之孫如牛馬走忝爲後昆砥鼎而仙

爲亮西山祭光祖庭文

生必有死斯理焯焯况我釋氏以滅爲樂獨於交情實不能無若我與君忘之可乎在昔光孝親如葭葦承平異處患難相扶故山邱墟避地東吳未幾言還如螭如夔銅馬西來猛於貔兪再涉大江九人與俱披榛問道體無完膚旣脫虎口尤虞畏途吾二人者始終扶持白茅宵征狐噪鬼呼磧沙遇舊乃衣乃鋪萍聚雲散連年海隅每一握手猶論毒脯維莫之秋以予起楚爰繼我師踞天惠室與君相依鐘鼓朝夕平居論道風飛電激方期進修各殫其力乃遽云亡必樂於寂我失良友是用悽惻溪毛之薦謹唯來格尙饗

祭沈仁齋文

天道何茫茫耶顏氏之仁不永其年柳跖之暴壽何以延豈有生之初氣稟其偏乎抑蜉蝣朝莫蟪蛄春秋一皆聽其自然乎如君之生洵美且都鄉里共稱吉人之徒早歲失怙藐焉而孤仰事俛

育綽乎有餘若騏驥之夙駕且能範乎馳驅每遊四方以曠其居

命奈何彭殤不齊傷哉永訣漬縣以詞

爲葛子寧等祭父文

於乎天乎人孰無父獨不假我父之年遽止是耶在昔家居仰事俯育以大父遺業之重隻身負荷常懼弗克所樂者唯琴唯詩唯吟詠而已餘無所嗜好也嗃嗃之聲弗及犬馬姻族閭里咸薰其良善人之稱無間然者數年以來遭時艱棘流離異鄉食指百餘賴父全活亦豈易爲然耶嗚呼痛哉時之避艱者妻孥號號或委溝壑吾父則旁求治生之策使某與母等無凍餒之憂也時之人居無室廬或冒風雨吾父則交仗義之士使某與母等得居處之安也至若族有孤寒之瘠家有臧獲之眾亦莫不愛之如骨肉然搢紳之士多與莫逆葭葦之親相與依倚但不肖孤不能幹蠱負義方之訓爲多然我父之慈訓未嘗不勤勤也今也一疾遽爾大

故顧某等爲孤爲廢者眞若喪家之狗失水之魚矣嗚呼蒼天其無知乎如其有知視孤廢之悲若此而不爲之少憐乎然悲則悲矣猶有可慰於冥冥中者吾母以柏舟自誓將星冠羽服以終其身願以父之靈陰相之雖愚不肖旣於父有風木之憾幸母之存寧不服勤奉養以慰吾父乎矢心陳詞維以告哀維吾父念之代祭表嫂文

惟靈之生錢橋望族嬪我表兄閨門睦睦賴有內助以生以育旣肥其家且養以福吾兄強仕朔南宦遊嫂居於家家政克修男鬻而嬉女幼而柔以母可怙父弗爲憂頃因喪亂家毀於兵吳越往還千懼百驚寓茲吳門待時之清念我肩子可教而成以女許嫁親親相仍擬古朱陳卜世莫京雖居異鄉客舍相親嫂嘗有言兒女鍾情必娶必嫁此心乃寧適予親喪連服縗絰子未可醮禮文亦虧惟嫂之言艱難共知戮力同心教子擇師眷我婦子朝斯夕斯一味之珍食必共之方期將來嫁娶有時安知一疾遽爾而萎

聞者愕然慘怛歔歔况我骨肉胡寧不悲最可悲者兒號女號而今而後煢煢何依嗚呼死而有知鑒予嗚咽尚饗代祭弟婦文

我兄弟遭時艱危兵燼其廬星散其人使汝妯娌等不能同家而處同爨而食於今凡六年矣然吾弟賴汝之力以巾以櫛以絲以帛以鞠其子女常得以慰吾心焉向也吾弟與爾避地浙右吾夫婦每念汝婉孌之姿跋涉山川漂搖風雨多有可憂者焉幸而言還得同居長洲茂苑閒者數月吾乃就食於無錫矣又使汝妯娌乍聚而散百里之間相望相憶而不能數相見也近方喜汝子暫贅而歸其妻將有拜姑之日矣又喜汝女擇配得人亦將有館甥之時矣滿謂時將小康仍居故鄉少長咸萃構一畝之宮犁二頃之田歲時灑飯於先人之墓則吾妻與汝復得相率以事蘋蘩矣數日之前方聞安信片紙之上忽來訃音使舉家相顧失色始而疑焉終而信焉莫不爲擗踊而長號也於乎痛哉天胡不仁奪吾

弟之內助耶地胡不仁奪吾姪之所恃者耶苟曰非天也非地也
以汝之徽柔淑慎胡乃爲天闕如此哉自今以往雖不知故鄉之
願能遂與否其或遂焉亦不得與汝一日之同也死生之閒此憾
何極雖然天降喪亂雞犬弗及寓哀茲觴無任於邑

代祭趙師呂丈文

公之生也七十有六年時有盛衰事有得失境有順逆物有欣戚
公其處之操履如一其少也以簪纓之裔而無爵祿之念其壯也
以陶猗之富而無奢靡之習及其年之老成尤儉素而篤實爲鄉
里之善人不鬪智而用力橫逆之來唾面弗拭蓋明夫舌存齒亡
之理而得乎全身遠害之術每論人生禍福靡常鸞膠之絃三斷
而三續鳳穴之雛或存而或亡銀栢羽化付之渺茫知有命之在
天忘鳧鶴之短長維箕維裘授子及孫閒居別第翟公之門清風
茗椀沈水鑪薰日怡情於書畫絕無心於世紛視不義之富貴如
太虛之浮雲獨念先世欲勵後昆託祠事於老佛之廬屬喪具於

葭葦之親視死如歸餘何足云或謂公之可憾者燕子樓化爲劫
灰科斗壁飄爲風塵殊不知公之達觀藐如墮甌未嘗怨天而尤
人也今也人遭亂離多隕鋒鏑橫屍四野烏鳶之食若得全體之
歸掩佳城之室回視前日之死於非命者安能企其萬一乎某等
親親尊尊道義交結涉江以送其喪雪涕以臨其穴一觴敬酬千
古之別公知不知我語又咽信宿之先方歸覲省一別之後遽疾
而殞於乎哀哉倚門之母其望懸懸垂齠兩兒其泣漣漣鵠原永
歎鸞鏡莫圓德哉若人何辜於天如某等葭葦之親情猶骨肉旣
不及匍匐而往救徒號呼而頓足旅櫬來歸橫山埋玉顧彭殤之
不齊信斯理之難燭漬緜以詞酸淚盈掬

代張希尹祭王文甫文

公之一生磊磊落落操心至公俯仰無怍出詞必信不事鐫鑿人
或狙詐言諄聽藐家庭之間一呼百作奔走服勤罔敢乖錯及交
親朋春風笑謔恩誼有餘禮文則略患難相救扶顛濟弱鄉里庇

麻恩尤不薄或飢而饋或病而藥或頌其仁或糾其惡周貧恤窶
不輕唯諾頻年時危所在跼蹐鄉人愛之斂衽如昨施德有報理
亦昭灼我曹多幸松蘿附託凡詣甥館必席賓幕從容語言款洽
杯酌別不忍去期必如約今公已矣失我渠獲枉者誰矯情者誰
覺竊者誰範觚者誰削誰指其迷誰斷其壘靜言思之相見錯愕
掩袂拭涕薦此洞屬

與周縣尹祭顧元公文

盛德之士使人後千載而興起者其信然乎猗與元公才兼文武
其文也世稱三俊爲當代之儒宗其武也羽扇一麾走六州之豺
虎醉非嗜酒免禍驕主醒非沽名赤心自許抗疏補袞職之闕擇
賢進邦國之輔史不一書勳業昭著世徒知思尊而歸者之爲高
而不知采蕨南山之言先入其肺腑故公之歿特爲公鼓琴而悲
慟哭而去也睠茲長洲實公鄉土桑梓之宮墓有祠宇何物地靈
混此室處斥而去之陳我簋簠悵煙塵之滿眼懷清風之白羽維

公有神以福黎庶

爲周尹立碑祭元公文

昔典午氏碑表有禁勒石公墳勳業昭著事傳信史石亡何時走
尹茲邑永言懷思載葺祠宇邊豆具陳祀神有詩刻諸堅珉峴首
之碑令人墮淚吳人於公亦復何異惟公有靈陰隲吳人克文克
武無愧先民

代姜周佐祭姨夫王仲德文

君之老姑爲我叔母而我女兒獲奉箕帚我弟於姨復得其偶如
古朱陳婚姻世守先人嘗言君性醇厚人或顛危君力能救吾親
雖亡此語不朽如不肖者公亦弗陋有過必規有善則誘眷我弟
兄無一或否公年半百閑居靜守閨門之內肅若賓友忘情軒冕
適意杯酒奈何今年避寇奔走挈家於母虎兕旁吼千驚百憂窘
東如扭一女鍾愛疾莫能救羣盜稍息歸臥南牖襁褓之珠復碎
於手公之痛心如割如剖痛猶未定厥疾斯遘嗟我吉人天胡不

祐今公之歿命也誰咎凡我私親倚仗何有尤憐女兄孤燈白首
撫膺長號淚溼雙袖

爲王孟學祭母文

早歲失怙唯母焉依母其視之猶掌中珠未寒而衣未飢而滄右
挈左提顧之復之夙夜檢束唯恐不能自立以保其身以承其家
以奉大父母以及諸父之訓諄諄之言不一而足每於舅姑之側
視其色有不豫然者退則惴惴焉檢其不及既自檢束必詢之二
雛曰而於大父母之志或有違乎事或有怠乎抑而不能謹飭以
貽其憂乎母之欣戚視乎兒之有過無過未嘗一日忘乎懷也仰
事俯育嫠居而憂勤者十年男室女家志願方畢然於祭祀賓客
之奉身先中饋亦未嘗一日之或懈也嗚呼痛哉兒於母之康強
而年未艾烏烏之情方圖萬一庸詎知一疾而不起耶臨絕之言
謂死無憾特以弗克終養舅姑爲憾是則吾母之孝於舅姑者爲
何如哉宜乎舅姑之痛不翅如父母嗚呼風木之悲兒將奈何惟

當追念母訓兄兄弟弟各勉成立律身成家竭力以養夫父母之
志尺布斗粟昆弟其之不敢有毫髮欺隱意其否者是忘其親忘
其親則不孝之罪上通於天雖吾母之慈有不可得而宥者唯母
有神尚克相之庶踐其言以慰母靈

爲陳彥直祭外姑文

嗟我外姑德不可滅孤燈十年柏舟高節爲婦而孝爲姑而慈林
下之風鄉稱母儀如諤與謙材俱碌碌壻於名門蒹葭倚玉每詣
甥館升堂起居必詢女家諸兄何如或墮優逸勉之克勤防微杜
漸忠言屢聞或坐孱弱戒之自立扶顛持危惟恐不及比嬰微疴
母在牀席我來候問仍飲而食眷顧之情無異於常及女來歸語
猶琅琅一日之間遽成永別尊卑戚疏故皆痛切曰壻與女感恩
如前豈不哀思泣涕漣漣幸有賢嗣篤親如母夔虵相憐義當永
久死而有知知予之悲一觴敬酬靈之格思

代胡伯亨祭外舅張守齋文

於乎婦翁鄉之善士不鄙庸愚妻以其子既妻其子恩義兼全念我先君夙昔交契今也孤煢遭家殄瘁勸女內助庶勿顛躓每詣甥館言提其耳翁經州里必過敝居綜理厥家以綱以紀親之愛之視子無二別無幾何聞疾以痞女舟歸寧夜渡淞水訃音歘來驚使躒地匍匐及門翁已長逝我服雖緦我哭不殊矧爲女者其痛曷已潔此一觴進饌靈几永言哀思翁其鑒諸

代金子俊祭錢仲居文

嗟嗟仲居其止於斯福善禍淫天胡吾差父爲善人君亦如之匪義弗取匪善弗爲曰儉曰勤俛焉孜孜業日益廣家日益肥十數年間遭時艱危賦斂之蛇毒人骨肌君安其親茹荼如飴弟則友愛室家其宜是皆深淳親親之惟眷我姻戚肝膽相知温温其容抑抑其儀莫可忘者顛危扶持僉曰若翁澤流未涯厚培其根必茂其枝詎意一疾遽爾而萎禍福之柄誰其倒持於乎蒼天天闕若茲某等念■疇昔胡寧不悲矧如雙親遺孤與嫠君其痛之詎

庸曷已我春不相我淚沾衣言采溪毛薦此一卮嗟嗟仲居庶或格之

代張伯仁等祭父文

嗚呼樹欲定而風不停子欲養而親不待哀哀諸孤所以痛裂於其內也仰唯我父覆我兒女男室女家志念俱畢且復爲之樹產業立根本使各行其遺澤焉第所恨者吾父之生過於勤勞六十九年日用矻矻未嘗得一餉之優游也矧逢時艱子或受圍於城者親時野處心常危之或行役於遠者親雖家居心實隨之餘在侍旁親若可樂然憂患則爲之料理征徭則爲之區策亦未嘗忘於懷也至於鶴長鳧短物不能齊又豈能不拂吾親之意哉今也兒無所依女亦何怙菽水之歡不復可得是雖五內之裂亦徒然耳某與弟等但黽勉襄事以吾親素嗜佛學視身如幻敬以荼毘之法奉之遵治命也輻車在門翌日永訣菲焉一奠吐此衷曲祭先墓文

於乎陵谷之變知繫平時唯情所鍾不能不悲昔我先壟松大十
圍今皆宿莽荒煙晝迷不忍言者佳城或隳或幸而存冢眠狐狸
曰不肖孤避兵海涯九死一生烏鳥無枝十有六年豈不懷歸回
首鄉關道阻且危丹陽之東吳門之西方數百里野無黔黎我兄
我姨冢亦靡遺我父與母夢或見之既寤而歎涕泗交頤今我冢
子攜厥妻兒歸耕舊田邱壟是依餘口猶十未能同歸歸何不能
生理未治旅食異鄉破研日隨尚賴遺澤歸或有期載構載穫烝
嘗於茲或樹松楸如前盛時嗟我祖禰知乎不知拜伏墓下拭淚

陳詞

代張伯仁祭黃景先文

近年耆英晨星霜木婁人視之崑山片玉公之爲人生有器局遭
時迍邐如玉韞匱縉紳之交罔不刮目公之處家仰事俯育陸賈
之橐兒女均蓄彼經此緯同一機局公之居鄉春風穆穆凡與之
遊惟善是勛烈烈高風遐邇咸服於我姻黨眷義尤篤念無後人

墜緒誰續以孫贅居我女蒙福哀我親喪觸暑匍匐弔之唁之沃
酬之辱比予走謝畱連款曲別方兩旬書往而復豈意公亡疾不
經宿予聞訃音哀淚盈掬奈役於官如薪溼束送不執紼罪奚可
贖公或有知矜我碌碌束芻之奠鑒此心曲

祭大雲講主文

師之高年七十有九以涅槃而論之復傷之何有人之所以哀吾
師者我知之矣一大藏教淹貫胸中如魯靈光天台之宗今也砥
柱摧折隕波洶洶同袍之士其誰適從三周七喻化導羣迷隨所
住處桃李成蹊所以敬者古人之風先君云亡君來慟哭弔死問
生重禮之辱由茲而來陵谷變遷干戈所至流血成川公之居安
其福孔厚年過七十直爲希有予聞訃音義合匍匐更呼石濠去
不可得言采溪蘋薦公一觴公其鑒之我泗沾裳

子祭父文

代柴貴賢作

父生三子女亦如之長養婚嫁恩義維均以恭出贅愛念尤篤定

省雖疏音問不絕每歸侍養奉親飲食分甘食之視同穉孺豈唯
食之誨言諄諄惟懼孱弱弗克樹立撫恤諸孫欣欣康兒所喜
者親在健飯兵戈擾攘十五六年幸無風波以及吾親微疴月餘
靡神弗宗恭役於官如墮膠漆閒嘗請告歸視湯藥父曰亟去公
家事嚴兒能了官父心乃安別方數日聞病小愈豈其奄忽永訣
終天風木之悲尚何忍言嗚呼哀哉吾親之死人皆哀之姻戚之
哀思親義也鄉閭朋舊哀善人也我兄我姊我妻我孥其痛如荼
五內崩裂罔極之恩奈弗克報所不敢忘各慎其身黽勉成立無
忝所生尚賴遺澤垂裕後人

蕭處士祭文

蘭陵望族竹帛著稱高年通於伏生儉德同乎晏嬰自罹喪亂多
遭速遘萬死一生脫性命於虎口三吳百越寄身跡於狼煙覩姑
蘇之麋鹿重遊念北山之猿鶴相望言歸故里欲正首邱顧親故
鮮有子遺我父子獨能無恙安居未幾怪事忽生叫閭救無辜之

孫霜飛六月奉命復愁遺之老風動四方蓋埋劍之氣衝於斗牛
故覆盆之光照於日月遂爾貽謀之願灼然陰隲之符骨肉聚於
目前脩髓供於膝下得正斃而全四體自含笑而入九京蹇予努
力荷公知己自青年而蒙館穀至白首無異金蘭又如王趙之交
亦有陳雷之義今皆已矣可不痛哉老淚淋漓持束芻以效孺子
儀容彷彿撫絲桐而呼彥先卽此微忱伏惟尚饗

祭錢鼎卿文

代親友作

吳越世家焜煌史冊公爲雲仍蔓延遺澤昔在妙年青雲氣蓋弗
屑於時邱園自適風流文采聲亦藉藉三江五湖浮家泛宅歸帆
無恙佳兒連璧乃疆乃理芟乃榛棘菟裘鶴渚溪流環碧公其優
游素願斯畢邀月呼酒看花岸幘賓朋往來冠蓋絡繹滃瀼之供
子盡厥職自春徂冬頗須藥石厥足蹒跚心仍夷憚所憚者子服
勤無斁其宜泰然瞑目中夕顧唯某等攸居咫尺匪親伊故心皆
莫逆今也云亡如失肘腋緬懷德容傷心如刺鄉飲之歡無復共

席薄言采藻薦此窳窳唯公鑒之有如平昔

又代兩甥及女婿作

昔人有言見母如舅此蓋由親親而推之乃常情之所有如我舅翁其親愛於甥及甥女之夫者尤恩深而義厚厥恩維何煦濡撫摩視孱弱而爲扶植者支一木於幾傾之廈屹砥柱於頽波厥義維何切磋刮劑念昏庸而爲牖之者鑿渾沌之竅投阿膠於濁河然則公之爲舅氏而愛其甥者視餘人爲何如嗚呼痛哉輓腳之疾醫云無傷謂翁健飯全愈可望如某等朝夕承奉於理固當奈公私之服役旋磨螳之奔忙故不得勞於左右操几而執牀又安知一夕甘寢而遂亡耶嗚呼痛哉聞訃而疑匍伏救之救不可得徒哭而悲念平生之恩義雖欲報而無期一酬永訣涕泗沾衣

武進縣學起講堂祝文

維洪武五年四月二十日丁酉常州府武進縣承務郎知縣董某從仕郎縣丞陳某將仕郎主簿尹某謹以釋菜之奠敢昭告於大

成至聖文宣王曰夫學以明倫尚矣凡爲學宮必先乎講習之地使學者登降揖讓咸有儀度朝斯夕斯以明人倫之道斯堂之所以亟其成也而某等勉其厥職以副朝家興學之意尚惟神聖於斯文有以相之

縣學諸生祭陶兄文

天道何茫茫耶跖暴而壽顏仁而夭蘭摧桂折樗櫟合抱是必皆有其說蹇子昧而莫之曉耳吾友陶兄如玉在璞鍾厥愛於雙親求良工而雕琢既賣金以買書復徙居而近學惟吾兄心父母之心故能孜孜厥修如麟之角也吾黨碌碌辱交連年竊鄰燭之餘光亦效曠而勉旃方期吾兄馳騁乎詩書之林游泳乎道義之淵又安知車方駕而覆轍弓始張而斷弦也耶嗟哉彼蒼誰薄誰厚賦命不齊吾將誰咎惟沒世而有稱斯可謂爲不朽彼區區與草木同腐者雖龜鶴之年而亦何足取哉嗟我友兄其止於斯其心孔哀其友亦悲一慟永訣漬緜以詞

武進縣學移先聖祝文

廟貌之設人所具瞻所以尊聖賢寓祇敬也棟宇朽腐懼將壓焉不敬不尊責何可逃今將一殿兩廡撤而新之汎掃鱣堂昇置神像聖靈洋洋無適不存具瞻之敬蓋自若也工孱事集神其相之祭胡秀才文

公之父兄爲我友朋公之子孫吾與師生公嘗以父執遇我謙謙乎奉承翼翼乎將迎席必置醴途不並行我步我趨視爲規繩然吾亦愛之重之與之語言未嘗不肝膽相傾也於乎人孰無死有未死之前爲子孫者或不能如親之志親歿之後或墜其基業是皆不能無憾於幽明也唯公不然孝友之行父兄素稱曰子孫起廢兩興別第新築良田歲登可以供粢盛奉輸征恤孤榮鄉里稱少游之善犁鉏帶常之經死而有知豈不含笑於九京乎於乎昔我與公俱辟甲兵公亡我存無復合并每想見之於牆於羹今也以一勺之行潦表四世之交情睇彼東吳游魂杳冥吾將假

巫陽之辭以招之曰太湖之陰風濤震驚魂兮來歸歸我毘陵父母之邱隴俱在子孫之箕裘適成念此土桐鄉之愛念老夫束芻之誠魂兮來歸天風泠泠

祭胡子明文

於乎逸翁生長越杭以醫鶴游臺閣蜚英晚罹世變干戈搶攘挈家海壖晦迹韜光子未識公結交令郎觝斥妖妄氣節激昂旣見叔度穆如春陽時方艱虞紛然虎狼誨言諄諄戒慎周防吾其服膺如龜穴藏歲時往來雞黍范張公年已高神氣益昌髮黔顏童飲可百觴興致酣適庭視八荒詞多滑稽歌或慨慷以公達觀物累俱忘蓋亦有子動合義方福善自天家有餘慶屢涉畏途竟爲康莊予嘗比之珠玉琳瑯父執遇我我勿敢當所貴相知心腹賢腸公吾兒翦拂揄揚將玉其成取寸之長通家之好幾二十霜洪武己酉我歸於常贈言孔嘉且貽篚筐心親跡疏煙水相望前年暮秋過公谿堂三宿不寐清話連牀延致畫史爲貌不颺復命

其子拏舟送將別來兩秋懷思弗忘初冬病餘孤臥若僵寄詩言
懷并書數行歲聿云莫嗣音渺茫雷洲之報乃謂公亡松陰石川
悲風白楊命林拜奠老淚其滂

祭黃朱二友文

於乎兩駒並駕兮同一蹶兩輪並進兮成覆轍秋氣肅以成物兮
羌蘭摧而桂折覺鶴斷而可悲兮何短長之足說於乎天乎

祭徑山長老顏悅堂和尚文

福惠俱足唯佛稱首能具而微世亦希有如我悅翁是希有者德
尊一代聲溢叢社蚤被慈渥著金伽黎所在說法四眾依歸晚坐
南屏雷鳴鼓鐘雨花西湖魚龍起舞丞相授經化伏羣魔凌霄絕
頂砥柱頽波慧以知幾福以歸休崑岡之陽爲師菟裘師方退藏
陵谷變改兀如嬾融得大自在我昔避兵識師東林忘形儒墨結
交以心時有旦評稱師孝禪吾其敬之僧中子騫九流百家問無
不知吾其愛之僧中子期師之於予亦敬且愛片言可規如拾珠

貝我歸故鄉師贖其別歲時音問往來不絕前年孟冬丈室信宿
白雪陽春賡和舊曲寂滅樂矣師固云然我思故人中心悁悁擷
茗陽羨酌泉錫山詞以抒情塔鈴語言

夫祭妻文

於乎誰無夫婦琴瑟相交惟我與汝憂患白首粵自世變家燬於
兵扶老攜幼喋血宵征具區之山龍馬畱跡羝觸肉籬幾中鋒鏑
載歸故邑遭歲薦饑裙無完布簪遺折箸而於舅姑菽水朝夕生
事死葬與我僇力烽煙滿眼人皆岷巘賴而內助匪義不爲我擔
耒耜而躬井曰長育二雛庶亦肯構所居三徙非效孟母全身遠
害以避豺虎內外艱勤乃成此室移疾來居庶安且吉而飲而食
而言琅琅辭絕而逝悲風滿堂六十四年不失婦道雖逢百罹卒
以壽考嗟我父子痛心如割骨肉恩愛際此契闊歲時烝嘗誰與
薦羞我暑誰葛我寒誰裘風雨孤燈與誰室處齊眉之案誰爲重
舉宅兆斯卜耐而姑嫜一酬永訣我淚其滂

兩祖祝文

維洪武九年歲在丙辰七月初四日不肖孝曾孫某等敢昭告於某官之靈伏念兒子木不幸逢豸冠之怒無辜屯鳳陽之田骨肉生離肝腸痛割以卑悃陳詞於烏府蒙大臣請命於丹墀欽承釋放之恩幸獲來歸之喜雖風憲紀綱公道之卓然行之非天地祖宗陰有以相之何以得此天無可報祖何可忘謹以蔬果酒饌之儀用陳菲薦謹告

考妣祝文

伏念某兒子木屯田臨濠如落陷阱而某原其罪狀揆諸刑書爲父者有可救之理於是扶憊觸熱赴臺申訴幸而臺官垂憐轉而上聞玉音俞允放歸養親此恩固不敢忘也然某思之苟非蚤歲蒙父母教訓之力則懵於義理昧於法律視其子可援而不能奮身爲之則爲父之道有所未盡今也賴吾親之訓於昔年脫其子之難於今日恩其可忘乎哉況乎上之人所以矜恤所以釋放使

得仰事俛育而骨肉完聚者非天非祖宗有以相之不能也嗚呼天無以報矣豺獮之敬聊表於親至如父子受辱有玷先世其出於不幸而非繫於不義而致者惟天惟祖宗尚或有之

外舅姑祝文

伏念某兒子木比遭禍而屯田今蒙恩而歸里親戚骨肉重獲團欒其爲外祖父母者死而有知其必哀憐眷顧而陰相之也推情揆理義不能忘

三兄祝文

維我長兄有幹蠱之才而不得其壽由是而家人失節門祚凌替幽冥之中不能無憾也必矣然而幸存一息以嗣烝嘗如不識丁兄必愛之不啻若己子耳頃罹奇禍屯種濠梁豈不爲之哀憫哉今蒙國恩歸奉菽水又豈不爲之陰祐乎生而孝友死必不殊區區哀思詞莫能旣

維我二兄深嗜佛學早絕佻儷誓不與同室而生同穴而死也早

育二子長令出贅幼爲沙門兄則超然自謂在家出家矣避兵之日緇流與俱杳不知其所終此固兄之素願也然而佩服儒訓雅愛人倫念同氣不宜泯絕命其子林以奉嘗焉今以木屯田而歸如獲再生如脫鼎鑊吾兄以佛氏之心爲心亦必爲之慈愍焉維吾四兄未壯而克家將娶而卽世父母悲悼終身不忘諒吾兄於父母之子若孫亦不忘也如木者幸免屯種歸耕故隴以養其親以蓄其妻子兄之喜爲何如哉兄無後人命吾子森嗣之以承祭祀尚期垂裕使得與木等鼎峙而樹立也

姊及姊夫祭文

於乎賢姊之生愛弟深至視弟之子與己無異木之屯田姊必憂患以今還家必喜而慰閔予莫年遭時不利父子汗辱有玷先世嗟而子孫俱死疫癘歲時烝嘗賴女承繼我今摧頽百事俱廢念姊之心獨爾弗替姊夫善人義同昆季庶幾來格鑒此微意

祭母舅文

代陳彥高作

昔人有言見舅如母今吾不見舅氏者閱四五年又何異別吾親之久乎瞻彼陽山追懷亂離脫萬死於虎口幸重逢於聖世然而陵谷變遷各天一方舅甥之情惟天其知遭憮人之排陷若參商而東西方鴻飛於魚網奮病翮而來歸聞舅疾而往問涉兩路之塗泥亟訃音於中道乃匍匐而星馳顛崖之苦蒺藜之悲皆不能與舅氏細數而陳之釋此憾者將何時耶言采溪蘋薦此泂酌哀歌渭陽涕淚交落知乎不知神在冥漠

代任仲文祭妻祖文

翁於女孫親愛所鍾愛及其夫情亦與同旣玉其成加以磨礪藻雖不才感恩之隆服勤左右黽勉厥功歡然菽水庭闈春融金澤之濱瓢湖之東居凡三徙天風轉蓬今年夏秋巨浸如洚賦斂之蛇毒於射工辟地蘭陵請謀吾翁去危就安公樂其從瞻彼橫山滄海駐蹤將營菟裘一畝之宮月有旬日往來憧憧豈其微疾藥石罔功我方抱持滄瀨之供語音未絕瞑目而終嗟我夫婦遭罹

禍凶倚若泰山山頽倚空賴有大母同此哀恫棺以黃腸衣衾重
重忍茲永訣涕泗沾胸三寵而酸以寫愚衷

祭朱仲起文

生於東吳歿於西洲七十四年陶朱之儔其生也有一廛而弗處
樂浮家以優游有二子而離居各專力於箕裘其歿也繼室厚衣
衾之具過百倍於黔婁女孫得橐砧之良襄大事而能周視世之
生不聊其生死不得其死者迥乎其不侔又何憾首邱之正與不
耶某等或忝微姻會晤無幾或傾蓋於東洲之濱或結鄰於橫山
之陞聞哭聲而匍匐徒往救而弗起免死狐悲矧吾人耳一觴敬

酬歌同蒿里

祭妻祖文

代楊彥述作

昔在童州聞翁厚德邑之名門視為矜式遭時變故絜家中吳人
多覆轍翁行坦途陶朱之裝罔有遺失食指百餘乃保終吉陵谷
既遷言歸放兵橋梓相須聿成菟裘匪德之積曷云能爾陰隲自

天灼見斯理如某不才誤蒙采菲以孫妻之撫愛莫比每至甥館
誨言諄諄俯育之意盎然如春及翁臥疴或輟或作往來問安眷
顧如昨七十八年如旦而暮眎諸天闕實有餘祐所可悲者永別
終天女孫歸寧誰其眷憐某於羹牆思亦罔極薦此溪蘋凍淚沾
臆

祭鄒忠公墓文

公遊程門游楊比肩慎獨之學首得其傳孝於事親如曾如騫移
孝爲忠厥德兼全補衮之闕匍伏涕漣數惇六罪羣邪凜然奈何
城狐威福得專推落陷阱炎風瘴煙忤物固爾精誠動天遐陬峻
嶺感應有泉處困而亨斯文究研既釋論孟復解韋編羲文姬孔
羹牆見焉蔽日雲開暫脫迤邐再寵再辱愈磨愈堅明月之珠薤
光九淵鳳穴有雛赤霄翩翩暴白先忠誣議悉蠲德薰晉鄙垂四
百年顯忠有祠奉嘗有田由宋而元有司豆邊度守是邦追慕昔
賢詢諸遺黎知公故阡增土鬣封起碑之顛樵牧有禁溪山連延

何以奠之秋菊寒泉仰止高風服膺拳拳尚饗

祭陳氏親母文

代曹子壽作

惟靈生衣冠之舊族作佳配於潁川相夫子以無違實四德之兼全出鳳雛於丹穴煥彩翮之翩躚熊丸之教有法掌珠之愛無偏予是以有東牀之選蓋亦慕北堂之賢方鳳占之叶吉結朱陳之姻媿何飄風之不情折萱花於歛然葭苒黯乎其失色朝露若爲之涕漣念九泉之永訣灑三寵於柩前靈洋洋其如在鑒此意之勤拳

祭母文

代陳煥章作

嗚呼三子早孤皇皇疇依賴有慈親恩斯勤斯非徒養之而又有以教之視我三子掌珠之惜遭時艱危基業蕩析萬死一生幸逃鋒鏑徙茲瀟濱苟焉休息其不滿於吾親之心者一子一孫甲冑而歿居侍傍者但供其菽水習吏業者每離於朝夕常勞乎倚門之望鮮能遂板輿之適所幸時康方安厥居孰謂微疾遽然云殂

方巫醫之並用竟永棄其諸孤於乎痛哉而今而後雖日用三牲之養而吾親無復爲之娛矣一抔之土空於吳矣徒感傷於風木媿返哺之慈烏奉觴永訣肝腸若剗

祭陳母文

代陳彥直作

生長句吳秀鍾林屋有林下風四德之淑隨世變遷家此溪曲鄉稱母儀徽音馥郁熊丸教子峙若鼎足伯爲家督仲則戎服季也刀筆緒紳刮目甘輦之供如食厚祿斑衣諸子森如立竹春藹慈闈家用雍睦壽踰希年歿有餘福季歸自公撫棺慟哭烏鳥之情悲乃風木里不巷歌弔者接躅某等姆儀之敬義當蒲伏言采溪毛薦此醴醪肸蠶有靈眎同芻束

又

代李一泉等作

孟母以斷機教子成其子爲亞聖陶母以翦髮待賓致其子有大名世之爲人母者苟能有其餘風則其子亦必有可稱者矣若我陳母遺風伊何教子之功不鮮待賓之禮亦多昭哉彼蒼降福洋

洋八十指子孫之盛七十三壽考之長東鄰西舍愛同六親簞食
豆羹饗如八珍爲一境之母儀誠四德之淑人倏爾云歿孰不酸
辛時無張林淑德弗碑劉向不作立傳者誰我酌此卮我陳此詞
亦庶乎薤露之悲彤管之遺也歟

祭萬氏子文

人與萬物一氣所鍾何乾坤之爲父母有賦予之不同顏路之子
聖師之賢胡不永其年耶柳季之兄凶燄赫烈胡不使短折耶美
牛山之木而厄於牛羊戕於斧斤彼樗櫟之不才乃壽而輪囷
放梟囚鳳則足麒麟若吾甥之淳樸孝敬而天者皆莫曉乎混淪
某等思痛雪涕敢一問乎大鈞靈雖不言聞必酸辛持杯酒以弔
窮泉之幽魄亦以慰高堂之老親親乎親乎慎勿爲卜商氏之喪
明徒貽誚於聖人嗚呼彼蒼聞乎不聞

祭沈氏女文

維洪武十二年十一月初八日老姨公攜其子以酒肉祭於姨孫

女沈氏之靈曰汝之父與吾子爲弟吾之孫嘗中選汝父之雀屏
今也如寶鏡之破於未照玉簪之折於未成於乎傷矣哉吾父子
之情傷矣哉吾父子之情

又

某年月日老姨婆與姑娘等以酒菜家饌奠於時娘柩前於乎痛
哉汝之生也母亡於七歲之初使汝不得蒙其撫養汝之死也父
役於千里之外使汝不能與之訣別未笄而善事父母久病而不
弛女紅是皆可哀可憐而可憾者嗟乎彼蒼何彭何殤骨肉之悲
寓此一觴

祭外祖文

代上海任仲文作

翁於外孫恩德俱厚三孫之中藻爲最幼維其幼也特恐愚陋其
愛尤深加之訓誘翁自中年無心組綬湖山秋九風月杯酒幽花
秀竹蒲石清樛翁於其閒婆娑白首陵谷之變干戈日久危而復
安賴天之祐八十八年可謂遐壽爲鄉善人其德亦懋甥孫紛然

日在左右藻則出贅翁爲擇偶桑梓連陰聲聞雞狗
鉏畎畝復客桐江數月宿畱廢禮百端詞莫能究比聞訃音痛心
如剖匍匐而歸豈云敢後以病莫前徒抱哀疚瓢湖之水難洗厥
咎翁其閔之庶或原宥雪涕陳情薦此簞豆

龜巢彙卷十九

龜巢彙卷二十
祭文

爲曹元度祭姑夫鄒桂堂文

昔魯義姑抱姪遺子恩難兩絕義重如此公篤於親如姑之情撫
字其姪同乎所生念懷昆弟稚孺而孤適逢亂離干戈九邱垂涸
之鱗蒙激滄波無依之鵲乃棲瓊柯恩以畜之義以淑之威儀語
言教且勸之人皆羨藜我則衽席居吳數年如一朝夕陵谷變改
公還故鄉某亦里居烜以餘光咄彼青蠅竟流白璧投畀遐荒混
淆瓦礫或謂貂蟬將出兜鍪天定勝人无悔无尤夫何不弔乃涉
重坎訃音之來痛割肝膽丈夫馬革死不顧身唯其骨肉極切悲
辛巫陽之招魂其來歸桂子秋風高堂總帷知恩罔酬義蔑以報
見公羹牆淚滿懷抱魯之義姑我姑之夫書以厚俗疇茲董狐
祭徐達卿文
往昔辟兵眾依於仁纍纍乎喪家之狗躍躍乎脫網之鷹公之視

余騶虞麒麟暖蘭湯而濯足下懸榻而重茵館婦子於別室撫臆
獲而所親不以俗有數米而炊者以玉其粒不以時有析骸而爨
者以桂其薪或戚或疏恩惠俱臻長筵燕集禮意殷勤是故人皆
以和氣氤氳喜色津津忘憂於板蕩之秋湛樂於熙臺之春殆若
古桃源之避秦也別公數年滄海飛塵干戈阻絕公歿不聞迨歸
里而聞之日羈係於世紛欲一酹僑玄之墓閱屢歲而因循竊嘗
論之世衰俗薄徇利忘義者十常八九公乃磊磊落落猶獨鶴之
在雞羣然一飯之報吾志弗信抑亦有愧於古人瞻彼膠山如隔
兩塵舉匏樽以澆墳上之土頌遺愛而云云酸風撼林於乎孔賓
爲陳以貞祭王母文

昔在故里婦德著稱鍾禮郝法儀容具并暨孀居之一紀羌玉潔
而冰清今居蘭城母儀之懿奉檄有喜盡歡甘旨奉重闈之慈訓
謹操持於胥史故凡葭苧之親桑梓之恭莫不愛之敬之尊仰乎
林下之風也樂善之性本出天賦口不絕西佛之名如渴飲乎甘

露其心愈慈其髮半素諸兒女之通家時登堂而拜母起居安問
匪朝伊暮方菊月之下旬捧壽觴於初度安知彼蒼災祥並臻賢
孫有鶚書之薦而大母則病入於膏肓巫藥罔效遽爾云亡正所
謂賀者在門弔者在閭變怡懌爲哀傷矣衰絰之孫擗踊哭泣令
伯之哀眾人皆爲之嗚咽不有彤管孰紀高節采溇浦之寒藻薦
耶筒之香雪拭淚陳詞千古之別

祭崑山張伯仁文

洪武之初傾蓋如故買宅買鄰日益清願於時蘇城樓櫓灰飛公
脫陷阱欣然而歸人之所稱百鷲一鶚有猷有爲抑強扶弱我所
見者厚葬其父故舊不遺保障鄉土數載之交視同懿親爲公所
憂里多荆榛縛虎而縱反遭其齧鳩鷗夜唳興妖作孽室雖有繼
卒以無嗣播遷臨濠家日以毀女之嫁者遽失其良兩壻承家池
魚並殃公在異鄉寸心千里骨肉傷殘痛何可已一紀之別老我
於家每聞奇禍爲君怨嗟蒼天蒼天斯人何辜困阨摧折乃至此

乎客來今春謂公蒙恩難兄難弟同歸故園子欲賀之恨臂不飛
以詩言情不勝瞻依安知隔歲公已物故集師書來我淚如雨追
念疇昔肝膽相知各天一方徒云坐馳面不復晤魂其可招悲歌
此辭酌此一瓢

生日祀考妣祝文

父母生不肖八十六年矣不肖雖不能爲賢人君子爲世矜式然
未嘗敢爲小人之不臧也雖不富不貴不能顯榮其親亦未嘗飢
寒失節以辱先也長太平之時則微樹其業遭亂離之日而不殲
於兵夫妻同老暖衣飽食早眠晏起不憂不慮以安以娛是皆天
地之大恩父母之遺澤也蒙天地父母之恩澤其可忘乎其可忘
乎所願者子子孫孫中外和睦瓜瓞延蔓荆棘不生使不肖夫婦
如是安娛以盡其天年不久牀褥全歸遺體尚賴天地父母之靈
有以陰相之始生之日釀酒以告
冬至祀外舅姑祝文

嗚呼悲哉仁而無後斯理之變而又遭世之大變也三子八孫靡
有噍類所遺之業盡屬他人願爲女爲壻者毫無能爲竟不能爲
立後人以爲妣續以承祭祀每一思之慚色而已扼腕而已歎息
流涕而已唯此一陽薦此蘋藻蘋藻非薦薦以此心靈其鑒之閔
其所不能焉者宜宥厥辜

祭唐親家母文

代陳以貞
母氏作

德爲母儀五十九年見而知者罔不稱賢昔我豕子多幸自天雀
屏中選以女儷焉主我中饋毫忽罔愆母教之淑豈容忘筌昔在
鄉里絲蘿纏緜今居毘陵同居一廛姻婭之情益加於先母在牀
褥久弗能痊曰女曰壻常侍榻前我來問安飲食流連今也云亡
骨月棄捐爲子壻者公務所牽羈旅金陵未能言還女以孳育月
輪未圓棺勿能憑縗麻涕漣垂髻末孫其哀亦然靈其如在鑒此
倦倦

代祭表伯母文

昔居故里家爲比鄰縣縣瓜瓞如朱如陳今茲異鄉亦復如舊通
家往還情日益厚靈以沈疴一載之餘匪朝伊夕候詢起居若我
婦子均蒙眷顧食必分甘骨肉相處孚方馳驅信宿而歸靈乃卽
世幽明永違匍匐往救已不可得陳此薄奠涕淚沾臆

祭王君壽文

昔在西塾廿有餘年公之父叔坐子講氈愛我敬我如骨肉然公
於此時雁行聯翩敬以父執禮意勤拳規行矩步靡不勉旃厥後
一別陵谷變遷公守故邱我落海邊萬死一生脫身戈鋌我東來
歸公喜自悲喜獲再見悲歷艱危冠玉之美殘爲瘡痍樓臺廣居
化爲茅茨衣不文繡緼袍爲宜食忘八珍啜菽如飴樹菊軒階杖
屨棲遲幹蠱有子蔚乎孫枝樂事以酒餘皆弗治佳哉蔗境爲鄉
白眉吾嘗鼓琴瀟浦之湄連城屢宿細論昔時負笈之孫服受我
詩自茲以來別多會稀花朝月夕每有所思去年暮冬尺書載馳
緣有義事要公共爲安知踰月遽然其萎偶出西關路聞葬期彼

祖輓者舟欲同移眸子眊昏行且尼之送不執紼莫不奉卮烈塘
之東徬徨涕淚還家數日晝夜忸怩緬維前賢絮酒千里嗟今之
人跬步或弛朋友道喪恬不爲恥擷此溪毛陳詞尺紙物薄情深
公必鑒止

祭妻文

於乎悲哉靈年八十以微疾不兩月而亡人皆謂天錫之福子孫
滿堂衣衾而斂之高岡并餘一紀家居樂康旣葬而鄉里騷然捉
軍而驚皇使襄事之日而遇之則惡乎有數百之人祭奠於北堂
縞衣而送喪也未幾而孝子森爲人謀陷嫁禍其身我扶憊而赴
救詣郡邑而具陳刀筆之吏欺天罔人妄移文於崑邑欲玉石之
俱焚賴公道之不泯如屈蠖之得信雪理而歸父子悲辛以今思
之六十年之配儷常居安而欣欣雖世變之秋辟兵海濱亦未嘗
遭此之不仁信乎吾細君有可福之善蒙陰相於大鈞也耶卒哭
之祭遂致目瞑死而有知必不我嗔吾知母之慈子必矜憐其遭

迤奈何生死幽明之分兒哭之慟我亦沾巾嗚呼悲哉
祭張溝南先生文

維洪武六年月日同郡老友謝應芳謹遣孫塏以清酌庶羞之奠
致祭於故心友溝南先生之靈曰於乎近年耆英晨星落落公在
鄉邦雞羣獨鶴詩三百篇精華咀嚼吐而爲文光輝焯焯粵自蚤
歲飛聲臺閣遭時多艱屢進屢卻歸來故山雲臥一壑洪武更化
羣髦進趨克疑有子首應而須手持直筆追蹤董狐如哲有參養
志而娛寶樹遽折悲風叫呼公無怨尤曰命矣夫中郎之女傳業
於家丙申春莫郡志有作時我與公同秉筆削甲可乙否語皆良
藥別來數載心交如昨愛及吾兒義尤不薄前年過我新秋夜涼
中庭夜坐月白如霜劇談千古把酒淋漓興盡而去東方未明去
年夏五吾兒云亡公爲墓銘九原有光弔我唁我喻以大方斗城
之別譙門夕陽自冬徂春人多讚揚優哉游哉新居草堂幽花秀
石池鳥蒼葢不徒玩物世慮俱忘顧我潦倒理宜盍先安知矍鑠

乃在吾前四月九日訃音忽傳无妄之災網羅正纏葬不克送酒
不漬縣每一思之淚如迸泉病目皆盲舉步欲顛塏持瓣香拜於
靈筵鮑叔知我鑒此勤倦

姪婦祭姨母文

昔侍姨母東吳避兵我姑綰纒詣婦奉承及歸桑梓半舍之隔歲
時候問眷焉如昔今我娣姒等哭姑之淚未乾而又哭姨母而永
違母乎母乎見我姑於地下其能道諸婦之哀思乎溪蘋寸霜薦
此一觴阿翁悵悵作此祭章

代祭親家母文

曩余之家幹蠱乏人賢郎贅居蒙養而姻維時魚軒雲從祁祁繫
我婦子獲瞻母儀事雖從權悉如所願舉室懽然親親眷眷去年
合昏蒙饋芝蘭愛子及婦恩出肺肝顧子東牀每歸問安慈愛之
深尚蒙垂訓所可喜者起居樂康子嘗詣門亦得升堂別來未幾
聞有隱憂豈意成疾竟弗能瘳訃音忽至婦子匍匐泣血呼天救

不可得我來柩前奠此束芻區區哀忱靈其鑒諸

冬至祭母文

代木森作

於乎痛哉每年冬至齊宿祀先母率諸婦供具酒食今也中饋或有缺失誰懇懇而勸之邪每年冬至賀客過門母語諸婦治具接迎今也禮意或有懈怠誰諄諄而命之邪一味之甘誰分諸幼耶糗餌之屬誰釀諸鄰里耶是則因節序而追感者如此至若子孫之有室皆吾母擇配而爲之子之婦孫之婦其二婦有未善皆吾母教而成之平居之日甘旨裘葛之奉則吾母弗求其備温清定省之禮則吾母弗責其全或有疾則終日終夜木之濠梁屯種林之滕州被劫林之客死新鄭吾母爲之廢寢忘食晝夜憂思痛苦哭絕喪明慈愛之情言莫能盡如此之恩又皆在劬勞罔極之外今子之死者固不能報其生而存者將何以報其萬一耶母兮母兮無復見兮寫此哀衷矢弗諉於遠兮

祝亡子文

洪武十六年十一月二十一日老父命汝弟森持思賢錄一部置汝靈几酌之酒而祝之曰往歲板刻辨惑編旣成汝嘗執書立吾前而言曰不圖今日遂二十年之所願欲矣汝於此時喜容可掬吾知吾兒推心父腹旣而摘橐尤喜成速攜二書新鄭之行不兩旬而瞑目今老父偶逢於知己又爲刻思賢之錄此汝之所寫者稍撙節其簡牘工數月而就緒我已盲其雙目摩挲紙本無復能讀於乎誰念其爲之不易寶之如玉耶誰爲其喜而傳之士夫
焉乎道鄉先生之膏馥耶悲哉吾兒身不可贖置此書於靈几猶挂劍於宰木顧觸屏之子若孫絃將斷而復續覩物思人淚沾汗竹

代祭母舅文

嗚呼見舅如母念母不忘舅復厭世豈不永傷若我舅甥世居邑里如鳥同林穀育棲止版圖之繆牽連伏辜天恩汪穢姑緩其罰脫網之魚頰尾發發七里八岡水溢溝澮載欣載奔過我厯塊蒼

髮黥面泥上裳衣忘乃劬勞負疾而歸賀者在門退不旋踵弔者之來乃哭而慟如某至親洎諸姻婭痛不可忍涕淚交瀉將來休戚無復相知俯瀝肝膽酌此一卮

代祭賀彥銘文

南華有言曰上壽百歲中壽八十下壽六十一月之間得開口而笑者蓋四五日而不能及也如公之生垂及中壽喬木故家不爲不茂遇陵谷之變遷若摧枯而拉朽坐衣冠於塗炭脫性命於虎口元龍之豪氣雖衰丹穴之鳳雛方離俄陸海之風波沈鐵船而莫救有竹林之小阮尚友吾於左右五六年憂患之中能一笑如南華所言者亦烏有也於乎哀哉凡我親舊居同里閭困藜藿於世變之日照涸轍於濡沫之餘犁鋤乎荆棘之場屋廬乎瓦礫之區若夔虺之相憐不戚施而遵除吉凶慶弔出入起居或敘情於杯酒澆磊落而歎歎今也云亡痛當何如莫椒漿於三寵墮情淚如鮫珠悲風愁雲送乃輜車

祭妹文

代陳彥高作

嗟我先世錫山故鄉曰朱曰陳闕閱相當乃以吾妹嬪朱之良爲婦而賢孝於姑嫜陵谷一變雲萍四方念我兵餘如龜穴藏聿來依棲鄰壁分光爾居再遷半舍相望手足之情眷眷弗忘常念吾甥來我渭陽吾兒念姑安問亦常焉知微疾遽爾云亡朱陳六親罔不痛傷況予潦倒孤雁遑遑憑棺飲泣奠此壺漿

祭妻兄文

夫哉天之所以爲天兮宰萬物而幽玄雖陵谷而變改兮恆福善而弗愆若若人之始終兮蒙陰隲於彼蒼避戎馬於句吳兮涉畏境如康莊聚原鴿以救急兮作歸雁之同行舍故土之荒穢兮樹豐業於暨陽託家政於仲氏兮日娛客以壺觴肆優游於桑榆之景兮家有餘慶蹇子早歲有室兮得名門之女弟賴昆季之眷顧兮於今四紀睠小阮亦僥倖兮辱妻以其弟之子悵東西之相望兮多契闊而會少比安閭而抵家兮喜棣萼之俱好孰謂別無兩

月兮聞訃音而絕倒慘予室中之人兮姑與侄其同悲徒匍匐而
莫能救兮淚滂沱而沾衣奠椒漿而永別兮敘平生而陳詞

除服祭母文

二月十四日為
兒子木等作

齊哀母服也三年之喪猶卒哭而再祥禫而除其服者古之制也
然劬勞重恩罔極莫報孝思之心有不能隨服而除者也於是撤
靈帷於斯寢奉神主於祠堂歲時烝嘗寓不忘之意也不忘者何
敬與愛也凡吾親之所敬者敬之所愛者愛之死猶無死也苟忘
其親則親之故舊或疏如途人親之孫子交惡如仇敵也以若所
為是不孝也觀夫孝之至者通神明不孝者必獲戾於神也過庭
之訓諄諄有年勉而行之請質諸母之靈也矢心陳詞終身戒也

遷祖考神主祝文

嘗聞祠堂之制當設四龕以祀四世之親不肖幼年在父兄之側
失記高祖考官稱高祖妣姓氏故曩於兵後重立神主由曾祖及
禰而已虛設第一龕於茲數載今因亡妻喪既終其子木等奉母

主人祠敢請遷曾祖第一龕曰祖曰禰從而遷之以第四龕安奉
其母任氏候應芳之歿然後改題高曾祖禰號也不肖違失禮制
不能無罪唯尊靈恕之

寒食祭曾祖墓祝文

賴先世德澤未泯瓜瓞遺蔓幸繼烝嘗時維禁煙隨俗展墓匪云
報本庶不敢忘伏唯尚饗

祭祖禰墓祝文

墓祭非古也以應芳不肖不克歸里不能以時省埽常愧於心每
年寒食展拜墓下豺獾之意庶效萬一尚冀先澤垂裕後人有永
弗替

墓祭母弟祝文

寒食墓祭雖非古禮為子孫者哀慕省埽亦庶幾豺獾報本之意
焉惟慈母賢弟有靈必蒙歆格

墓祭先兄祝文

父母遺體本有三兄仲兄辟世不知所終伯兄季兄並窆於此時
維寒食祭掃荒邱手足之情庶乎不忘

娶孫婦祭祖祝文

維洪武十八年歲次乙丑三月初四日乙丑孝曾孫應芳等以孫
男墳於初五日丙寅吉辰娶本縣安豐南鄉呂氏爲妻敢昭告於
某官曰娶婦三月而廟見者古婚禮也近代之制以日代月各有
義焉應芳輒敢參酌古今從宜從俗擬於翌日親迎婦初入門先
當拜謁先世以見不敢忘本之意然後祇見舅姑及諸姻眷自茲
以往庶得奉承宗祀蔓延嗣續尚賴遺澤垂裕弗替

祭徐仲清文

於乎九流百家玉石混錯公隱於醫常之一鶚黃岐之書孰云不
知公得其要探玄索微如古兵法時用出奇博議宏辨吐屑霏霏
蜚英蚤年鄉評眾推紫燕歷塊非他可希遭時艱危挈家句吳藥
石之靈孚及豚魚長蛇當路報亦銜珠以之事親厚養爲娛春風

杏林名聲載途所不忘者首邱如狐大明開天四海一家父母之
邦青氈故廬徵車聿至乃赴清都醫國之忠老莫能輸謁告而還
子孫怡愉蜂房合戶哺雀羣烏混跡市塵懸我藥壺衛生之仁施
於州閭佳哉蔗境餘人所無衣冠敬恭鬚眉皓如應芳忝交四世
於此公有佳兒愛我中子同業於儒同出而仕唯命不由一生一
死公恤其孫與諸孫齒誘掖激昂誨言提耳老我牆東相望尺咫
頻年喪明跬步千里時蒙問信或饋藥餌心親跡疏匪負知已今
公蓋棺事皆定矣我未能然望風長喟東芻授孫往奠靈几玉雪
之姿羹牆宛爾載歌薤露商飆歛起願言遊從脫屣淖泥存順沒
盜庶幾無愧

遷葬二兄祝文

九月廿六日

元曆垂盡時盜之槌領珠斷臂無處無之嗟我二兄荒郊廢冢雖
有後人漫不省視與無人同薪者芻者爲樵牧場而犁鋤者日侵
月削又將爲禾黍區矣應芳以同氣之跡是可忍乎今重製二函

遷壘祖壘東南隅以祔大父母父母及諸父之側並封如前蔭以
竹木歲時灑飯庶得享而侑食焉唯兄有靈妥諸幽宅
諸親友祭曹子壽文

古之人有言狐死兔悲物傷其類況人爲物靈居同閭里有瓜葛
之親朋友之義者乎又況子壽之爲人善與人交而有春風和氣
者乎居常往來杯酒爲禮或有時而合歡雪襟懷之凝滯奈何輟
釜之聲瓶罍之恥往往鮮克遂其意也歔歔慷慨音猶在耳一月
之餘萎而弗起屬續未定而蓋棺訃音裁至而發引東方載明纛
裡亟掩於橫山之趾凡我親朋惆悵而已其爲骨肉至親者又何
忍而至於若是耶溪毛洞酌亟奠靈几遂成永違顙而有泚

祭唐仲傑文

公之子吾之門弟子也吾之孫公以小友呼之過愛而忘其齒也
垣雖失怙如飲食數載慶弔吉凶且能惓惓乎盡其禮也今公之
歿胥靡也哉古人明月千里且歌些辭魂兮歸只寓永傷於瓠

樽一酌乎落花流水

祭劉德祥親家文

人皆謂公有通濟之才設施之方且識見之具長何始終之乖張
吾嘗比公爲江河之舟視船而微非葦而杭能重載而遠適可周
流乎四方或長河順流縣帆巨檣一日千里快若飛黃或大江水
逆石尤風狂釘石係纜隨波低昂或脫難於盤渦或經險於呂梁
或候潮而逗遛或阻水而徬徨安知一夕怒濤春撞盲颯颯遂
顛覆於鮫鱓之鄉於乎哀哉六十四年安危變遷以姿稟之高明
知有命之在天不怨不尤處之泰然鄉之且評前後可甄有可稱
於後者何異乎青史之傳於乎哀哉如某者昔在東潤鄰比相依
承公以鍾愛之女爲吾孫阿塏之妻雖別多而會少獲通家而往
來每黃耳之有信知吾老而有期擬祖孫之同迓呼麴生以洗泥
訃音忽至招魂來歸塏也哭婦翁於四千里之外奈此願之乖違
兩兒扶持奠此一卮文以抒瓜葛之情詩以寫薤露之悲公知不

知我泗沾衣

生日祀先祝文

某之生斯世也九十一年每念劬勞罔克有報也然視不明聽不聰而猶有可觀之物可聞之聲肢體雖頽猶能杖而行几而坐也方寸之天不蔽於私義理昭著而能燭物是皆生我教我者之大恩也先世之恩報雖未能實不忘乎心也況夫左右服勞飲食裘葛內外有人老老幼幼頗知義方非祖考垂裕之力焉能得如是之樂也自今以往天年未盡喘息未息皆感戴之日也家饋殺羞先用祭享亦庶乎豺獭之報本也

祭徐子忠文

代席彥適作

且必有暮死生奈何或玉關之不入或薤露之有歌或馬革裹於異域或魚腹葬於汨羅是皆卓犖之士去鄉井捐首邱而忘其考槃之阿也今公之歿類乎古人論公平昔良可悲辛其家居也克肖而翁持身以儉約勤苦待人以和氣春風其戶役也羈縻長安

夢方尋於失鹿事乃定於蓋棺嗚呼三子鼎峙峙乃公餽銜哀服勤唯恐顛覆雖匍匐而莫救望鍾山而慟哭東牀佳壻淚亦盈掬如某既忝姻婭且居鄉曲懃懃乎協力同心董輸之萬斛觀丹旆之來歸極感愴於心目蓉湖采蘋薦此醪醪

武進縣學立先賢祠祭文

代陳知縣
易縣丞作

昔之人以鄭公之賢而名其鄉以荀淑之子而里名高陽蓋地因人勝使山川人物皆爲之有光今夫三先生之產茲邑也道學之傳淵源二程發揮道妙有功遺經劾當國以滔天之罪而貝錦乃成諫至尊以正始之道而逆鱗敢撻觀夫感應之泉醉客之語則忠義之至通乎神明若夫由大魁而演綸參大政而憂國者位雖不同同乎一誠輔崇寧之初政知秦蔡之非賢俄梁木之俱壞徒流芳於汗青是皆可以爲天下之師表百世之儀刑豈特爲鄉里之榮哉某等叨蒙國恩社民之寄以先生祠諸學宮是亦祭於社之遺意誦誦諸生駿奔粢盛如將見之於牆於羹沾德薰於晉鄙

何以異乎師承吾將見金鍾之識復靈劍之聿興
謝莊曾祖墓清明祭埽祝文

某嘗聞先世開封渡江蕃盛東西謝莊地因人姓三百年來陵谷
變遷自高而上故壟茫然睠茲哀邱鬱鬱如許卽彼侵強爲外禦
侮匪松匪楸齒篁翳之弗樵弗牧周垣衛之寒食清明聿來省埽
追遠者心妥此繁藻尚享

新河口祖墓祝文

邱墓之祭禮無所考俗禮以清明祭埽其來尚矣苟於此以盡其
誠亦庶乎豺獺報本之意幽明雖殊有感斯應所謂洋洋如在者
將見之羹牆見諸堂封斧封馬鬣封也某等雖不肖無似尚期垂
裕以衍餘澤述繼弗替尚享

先考忌日祝文

父生之恩人皆罔極惟吾父之鍾愛於某也旣生之又能擇師而
教之使日就琢磨黽勉樹立雖不克奮馳驅取青紫以華其身以

顯其親以澤其子孫然此身賴訓育之力不好不邪不淪胥於俗
習之陋於先世無甚忝辱子若孫則矯枉就正識之無於農圃之
閒而我杖屨所至晏然棲息無飢無憂是皆吾親之遺澤未泯也
此恩此德之死不忘惟茲忌辰祗陳澗酌以鳴其感悰恭請顯妣
石氏安人同賜假享謹告

祀先致語代丁學古作

奉先思孝聖賢之訓甚明事死如生考祖之靈可格焚香爲鬱鬯
之灌秉燭爲庭燎之光雖無鐘鼓鏗鏘唯是豆邊奔走志意追思
於齋戒儀容如見乎羹牆蘋蘩蒹藻之菜靈筵可薦參苓薑桂之
物相籠親傳谷陵兩變於曩年城郭一廛於今日如繩祖武勉讀
父書豚魚或昧於交孚時加修省豺獺粗知於報本歲奉烝嘗伏
願濯濯厥靈赫赫厥聲洋洋如在災不生禍不作正賴乎廈屋併
幪居之安資之深何異乎門關高大根深蒂固地久天長
初進酒

生不封侯賜酒泉無人死作酒中仙一杯初進葡萄醪且喜家庭有象賢○苾苾芬芬一豆羹丹衷寸許若葵傾我宗我祖應歡喜自喜廚無轅金聲

再進酒饌

銀燭生花再舉觴滿堂渾是鬱金香愁多莫問人閒世年少多爲地下郎○不識駝峯翠釜烹羹名錦幣亦虛稱一杯骨董如芹獻五味調和亦盡誠

三進酒饌

孤兒碌碌混沌塵華胄遙遙出縉紳百拜勉循三獻禮一年祇薦四時新○廟堂調鼎用鹽梅四海蒼生笑口開我手幸無窮鬼捩折旋三獻奉羹杯

進饅頭

籠餅炊來玉屑香論牟喜得歲豐穰賢如脫粟晏平仲應笑
■蔥俠侍郎

送靈致語

切以欲表孝忱勉循俗禮焚楮錢以代幣意在殷勤酌桂酒以送靈魂歸寥廓下情不勝感愴之至

祭曹子教文

萬物之靈莫靈于人然人所以異於物者秉彝方寸之天不私而公不僞而真也惟靈身無毀傷不辱其親口無萋菲亦近乎仁不汲汲於肥家不戚戚於謀身西園鬻爵乘時取名東林種瓜避時辭榮是皆過不文改而復其天真至若愛女而嫁不贅壻而效秦視其弟之子猶子意終老以歡忻非明理而能之乎彼蔽於理而不能然者寧不泄顙於泉下貽誚於鄉鄰某等親舊相接敬恭相親悵幽明之永別感涕泗而欷歔輻車發剝奠此束芻

子祭父文

代奔牛陳明遠兄弟作

哀哀父母生我劬勞欲報之德昊天罔極此尼山聖人刪詩三百存此篇爲萬世之訓也凡爲人子者報親之心其可忘也況某某

之痛親尤有甚於常人者元曆之末兵戈數年委棄桑梓流離異鄉其生也不能盡菽水之歡其歿也不能卜宅兆之安陵谷之變邱壟之失仰愧俯作無可奈何於茲又隔一宇宙矣今也仿昔人衣冠之葬葬以木主巫陽些歌雙魂來歸於以寓安厝之禮於以表追遠之心非敢謂報親之萬一也於乎哀哉

代祭姊夫文

猗歟吾姊得配君子梁鴻孟光隱德可比瞻我弟昆骨肉無異賓朋之交或戚或疏坦率忤物豈無微類於乎蒼天禍福倚伏乃著戎衣往役安陸折柳郡城別淚盈掬十年夢寢每論衷曲黃耳書歸殷勤齒錄路越四千親愛愈篤尚聞鬢鑠慰我毫毫安知訃音遽云瞑目生還玉關無復可卜於乎蒼天何怨何尤嗟嗟我復舉案無由兩地共哭痛心如抽爰命巫陽招魂道周香雪一觥薦此蘋羞魂兮魂兮來歸首邱

祭金親家文

代袁茂卿作金以運糧遼東巨船五十餘隻役夫千餘回途遭風覆舟而溺

於乎平地風波陸沈者多航海而沒奈颶風何魚腹葬兮渺茫蔽精靈兮八荒巫陽銜哀兮籲穹蒼白雲悠悠兮歸故鄉大矣哉尾閭無底渤海無邊非精衛之石可填豈彭咸之居能遷魂兮來歸閭井依然雙親能保其妻子一弟服勤而力田逍遙徜徉何異平生前某等葭莩之親鄉曲之情援溺之手罔措將迎之意宜傾言采溪毛薦此一觥

代祭湯母文

唯靈春秋八十有七林下高風鄉稱母儀耳聰目明老而弗衰盡三從之道全四體之歸其早歲之事非詳所知請以晚年所見而知者頌之男婚女嫁各得其時愛其男及其婦則能盡其慈親其女及其壻則無偏無私其諸卑幼愛亦如之視親眷如骨肉待鄰里無陵夷故其病也人皆扶持其歿也人皆涕洟而今而後侍奉無期區區酌東州之水擷橫山之薇於以見親親之情於以表戀戀之悲靈其不昧鑒此哀詞

祭重外甥女周氏文

維洪武二十四年十一月日龜巢老人謝舅翁攜子及孫以清酌庶羞祭汝重外甥周氏娘子昔之日人不幸遇世變而俘於兵如風雨落花飄溷泥塗鮮或不汙汝乃釋繫累以配二千石之子宜其家而悅於舅姑此不幸中之幸非人之所圖也至如一念之孝念母孀居廿餘年抱歸窆之念百餘舍涉艱關之途德哉良人能與之俱服衰絰以終其喪脫簪珥以恤其家嗟我東翁母嘗託孤亦欲報之以瑤琚凡如此類竹帛可書然則昔之所幸者抑亦有感於天而天賜之扶與今也一疾斯須朝露溘然鬣封象服慈親田墓第良人之悲有未葬之親未笄之女汝何忍乎舍旃吾意汝視斯世斯身履冰臨淵玉石俱焚萬萬千千保遺體之全歸餘無憾於九原寥寥旌善亭令名誰爲傳於乎蒼天

代曹原度祭黃仲器文

公長原內某爲忘年交年雖不同身同澤驪韋杜桑麻叔牙夷吾

舊雨有時而契闊今雨有時而招呼往往來來曾不計其誰數而誰疏也夫以公晚歲言之一子出贅鼓盆自娛或蒼頭而酒壺或載月剡溪之舟或蹋雪灞橋尋梅看竹清興逸如故人謂公爲荷蓀荷蕢之徒嗚呼公之蓋棺之日某客東吳不救喪於匍匐不送葬於泥塗每一思之涕泗沾裾酌彼潢潦薦此東芻

謝莊墓祭祝文

開封舊家軒冕烈塘隨龍渡江奄宅茲土豈無佳城海水桑田敬唯高堂祖封巍然清明祭埽豺獾遺意尚期垂裕有永弗替烈塘墓祭祝文

人本乎祖猶物之天化育之恩疇能盡然維曾大父瓜瓞蔓延幽幽殯宮宅此平原左三從祖吾祖右偏兩伯遷祔塋壁仍連五封十靈餘皆茫然天荒地老陵谷變遷尚賴遺澤箕裘勉旃清明省埽薦此蘋蘩霜露之悲永矢弗諼

橫山墓祭祝文

代子木作

哀哉慈親寂寞九泉吾弟與姪亦遽然而然言之痛心有不能忘其言者也夫親在則晨昏定省親歿則春秋祭祀寒食上冢陳此饌盞雖不足報其劬勞庶循乎世俗之禮焉吾親吾弟及其子念之

代孫垣祭邵姨丈文

於乎先人在時我姨丈以肺腑之親往來之頻不遠三舍有如此鄰至不幸歿於鄭校歸葬橫山而姨丈弔之祭之尤異乎平昔禮意之殷勤也數年之間姨丈不祿吾兄則桂折秋風時垣又失腳危途路迷而車覆母嫠居子戎服母東吳子西蜀回視六親皆茫然置諸弗告今也幸服役而過家哀辭一幅酸淚一掬吐母子之真情於此來之一慟哭也尊無醇醪豆無旨蓄聲容藹然鑒此哀曲

新河祖墓祝文

維洪武十六年歲次癸亥二月九日孝孫某敢昭告於祖考妣伯

父母祖父母父母九位尊靈曰墓祭本非禮欲子孫於霜露春秋不忘厥祖從俗祭埽以寓孝思尚冀遺澤使後人繼繼承承有永弗替謹以清酌庶羞祇薦歲事謹告

謝莊曾祖墳上築牆祭奠祝文

維年月日孝曾孫某以目昏不能遠去謹遣玄孫某等代行敬昭告於曾祖考妣二位之靈曰人本乎祖極恩如天祖世雖遠天不可忘眷茲故土殯宮猶存繚以周垣以禦樵牧清明省埽歲修祀事尚期垂裕悠遠無斃謹告

寒食祭妻墓祝文

余生與細君偕老君年七十有九我齒長於君者兩年以余之潦倒而君稍強健也孰謂君先棄予而逝也君骨肉之窆於此倏焉兩旬視時艱虞恨不相從泉下以安其居維茲寒食攜子孫徇俗祭埽以寓哀思尚享

寒食祭子墓祝文

墓藏而骨豈祭所乎然而之遺言有曰歸耐先塋子孫姻戚歲時
灑麥飯於松楸之下志願足矣今茲寒食扶我攜幼設祭墦間以
踐而之言如而之志抑亦表長幼骨肉之情耶吾子有知尚飲食
之

代祭胡隱君文

惟靈世居東吳笠澤之濱厭處卑溼於茲卜鄰同井為鄉垂五十
春維桑與梓寢為婚姻待人以恭儉以律身二子克省構獲維新
貽之諸孫佔畢其伸老福婆娑筇杖竹巾如某等同一閭門往來
僂僂以翁高年而親而尊翁雖不飲席必同茵笑語相狎翁弗我
嗔春風童顏喜色津津意其壽考錢鏗之倫何物二豎瘡我吉人
我來問疾翁語諄諄別不旋踵哭聲遽聞追念疇昔涕泗沾巾當
此窀穸束芻具陳出門一慟悲風愁雲

張彥實哀詞

歲丁亥之仲冬丹陽張君彥實邁厲虐疾不五日而逝其友人謝

應芳為哭之慟且歎曰噫君自少時倜儻多智謀尚氣節能仗大
義平居論時事言若湧泉故縉紳多器重之其憂人之憂樂人之
樂亦庶幾杜季良之流歟第峭直不容人過遇強梗欲鉏去之用
是或斂怨焉後至元開邑大姓與令有隙且與君不相能因媒孽
其短詣郡使者愬之謂君嘗為令納賄部使者初不能察稍加注
刑欲強服焉令恐噤不能辨君受挫辱累數日終不忍加誣於令
若是者非仗義能之乎至正初里有橫逆君疾之一日乃自殘其
幼構大獄以陷君之季子聞者股栗君處之裕然詣郡邑雪理卒
能脫其子之械以械之他如姻舊及凡與之遊者顛則扶之危則
持之若是者又不可一二數但惜乎負奇傑之氣時不見用終於
此而已於乎吾彥實之死可不為之哀乎然而象賢有人君又能
擇其最肖君者為仲氏之後使先世之業並立弗墜然則彥實之
死猶無死也奚哀為雖然哀者人情也禮曰哭死而哀非為生者
也予與君素相知而氣且相類狐兔之悲疇克自己故為之辭以

寫其哀云

天胡爲兮生梗楠構大廈兮無不堪匠石不遇兮老雲巖天胡爲兮生龍媒鹽車困兮駿骨埋名駒汗血兮陵谷飛埃折瑤草兮山之阿望美人兮不我過我心傷悲兮淚滂沱

壽上人哀辭

浮圖壽道傳蘇人也年三十嬰暴疾不終夕而逝其親戚師友以及鄉里之人咸哀之予之哀則又有其私焉聞道傳爲兒童業棄家學浮屠越數歲慕徑山古鼎師往事之爲入室弟子未幾師命典教藏聲譽蔚然已而振錫遊諸方參禪門老宿聞見日益廣操履日益堅披緇艾茹蒿芹泊如也一日念親老無他侍養飄然來歸朝夕奉滫瀡以答顧復之恩又築室西林閉門讀天竺書且旁通百家會其歸趣閱五六年矻矻不少暇庸詎知遽止於斯耶吁夫道傳之聰敏勤苦蚤歲入徑山之室典教藏已卓犖不羣使厯階而升足爲叢林師表矣道傳乃退然自守而卒無聞也養親而

不得終其志力學而未能發乎文辭以黼黻斯道此眾人所共惜而爲哀者也予與道傳初無葭莩之親鄉里之嫗喪亂之際傾蓋如舊館焉以安其居穀焉以盡其禮愛之敬之三載猶一日視親戚鄉里殆有過焉以今思之可不重爲之哀乎或謂彼佛以寂滅爲樂而道傳深究厥旨必樂於逝去奚哀予曰不然吾今哀道傳者情也其樂與否非所論也夫情動於中而辭出焉辭而哀之亦以示不忘云

哀鶴辭

至正八年秋盜夜入吾友諸葛用中氏之家殺其鶴於後圃已而盜被執詰之盜吐其實當其穴牆之時鶴長鳴警之旣穴而入鶴奮翮而前若將力禦焉故遇害用中於是惋惜流涕裏之席坎而埋之縣文學汪君以敬爲作瘞鶴銘進士王君伯恂又爲之誄然則鶴之死可無憾矣余於是重有感焉夫物性能警盜者犬也非鶴也警盜而鳴亦已異矣禦盜而死不亦義乎人爲物靈其舍生

取義者猶不可得況禽鳥乎葛之鶴其可為義鶴也已矣故哀之以辭辭曰
鶴兮鶴兮瘞彼高岡爾鳥其形心人之良鶴之斃兮殉以義兮骨朽名存猶無死兮

龜巢稟卷二十

龜巢稟補遺

千古基王業來鐵脊祖恩

方竹杖

子性喜方偶得一竹為杖甚愛之因念古之崇節義尚廉隅者類焉刻詩其端持以自警

猗歟竹君易圓為方虛心固節悉如其常其方伊何如玉界尺不
砥而平不繩而直曰子老矣賴君扶持義以方外庶克似之
憶長洲六友

杭越古名州江山今臥遊桃花春酒熟誰與醉滄洲 吳逸菴

空谷登音少長安踊價增政須門不出孤坐寂如僧 熊元修

柳暗藏書屋芹香洗研池催租人去後應賦惜春詩 趙朋南

舊客來雙燕佳兒戲八龍庭生書帶草門掩隱居松 趙彥禮

風雨思君子機雲屋兩頭遙憐華鄂下獨抱杞人憂 趙執中

本草添箋注焦桐對寶薰千墩一野老十日九思君 吳中行

村居四首

我愛村居好村居春日妍魚翻青荇沼鶯轉綠楊煙挈榼攜良友
尋芳學少年杖藜隨步去此樂勝登仙
我愛村居好村居夏日長園林桃李熟池館芰荷香古木團朝蔭
清風送晚涼時來北窗下不愧號羲皇
我愛村居好村居秋日涼稻花垂白露蓮子結青房杜醞茅柴酒
陶籬野菊黃一樽終日醉端不羨侯王
我愛村居好村居冬日暄瓦盆浮蠟蟻楸枰擁兒孫曝背呼鄰叟
探梅向小園幸逢堯舜世擊壤頌君恩

題谿山疊翠圖

春林通一徑野色此中分鶴跡松陰見泉聲竹裏聞草青經宿雨
山紫帶斜曛采藥知何處柴門掩白雲

遊焦山

亂流尋梵剎灑酒瀉襟期西北分天塹東南缺地維高臺平落鷺
清磬起潛螭千古基王業來遊有所思

逸菴詩

見九卷五
首缺一首

齋居四壁靜布韞雙鞋清一子能養志百事俱忘情高年髮不華
細字眼猶明谿山隨處嬉杯斝時常傾區區哭窮途笑殺阮步兵
送朱季寧赴館職寫誥

六書之學一毛錐鄉井興賢乃出奇詞頭正要心畫好革孔不妨
腰帶移黃河水清世盛日紫薇月明人靜時還念區區舊知已詠
懷應有寄來詩

題夏景雨竹圖

昨夜春雲起雨溼紫鸞尾似我上林時鷓鴣啼未止

題畫三首

鶴從海上來樓觀飛霞曉玄圃四時春香風動瑤草
佳樹藹秋綠疏篁含夕涼石閒蘿帶長披拂紫苔香
落落長松樹清風遠近聞若人忘世慮相對看秋雲

嚴將軍戰馬歌

見二卷

按摘稿與子詠梅軒家藏本同與季振宜本異序秋八月兵駐烈塘賊巢偶失一騎二語不同

將軍武惠之嫡孫帳前甲騎多如雲一驪偶爾墮賊窟背馱賊渠
來策勳沫流兩吻噴白雪光燦雙瞳夾紅月雷奔電激煙霧飛望
我旌旗馳踏鐵渠方命隨鐵堞棊驪復蹠之成粉齏賊曹瓦解爭
納款我軍凱旋歸馬嘶良驥自古稱有德驍勝豈亦能殺賊呂家
赤兔項家騅骨朽猶當有慚色將軍報國秉精忠安知馬亦肝膽
同他年太史作佳傳宜亦牽聯書乃功

中秋日玉山顧仲瑛邀飲金粟冢

見三卷

按元詩選與家藏本
本季侍御本不同

憶昔辟戎馬放權來北山相逢適中秋展席解愁顏安知復今夕
嘉讌得良會烽煙猶眯目慘澹千里外卓哉山中人曠達誰與傳
坐客金粟冢酌醴相勸酬華月出松杪靈飈吹桂子荷鋪長自隨
駒隙去如水搖毫寫雅懷絢爛無遺言客亦興不淺鬪勝寂不喧

清歡忘城鼓盡醉傾笑語柱頭老令威為作八風舞停杯論古今
仰天問嫦娥見此曠達士百世能幾何庾樓榛莽暗牛渚風浪惡
縱有酒如澗恐亦無此樂夜深月愈白清溪歸洞沿一笑謝主人
今年復明年

中秋舟過丹陽歸真觀羽士陳天倪留宿適友人孫伯昭諸葛用
中亦至登樓翫月天倪熱沈水香用中鼓琴一曲行置酒談謔
懽如也酒罷伯昭韻限陳簡齋詩句一涼恩到骨四壁事多違
其情思悠然歎賞不已遂即景寫情各賦十絕

按摘稿家藏本均依韻分爲十
首季本二卷有依韻和答一首

我愛煙霞交來此閒暇日琴樽復吟嘯此樂真第一
高秋圓月夜真館白雲鄉坐客酒微醉木犀風正涼
鶴來松樹下欲語竟忘言應笑乘軒者前時誤主恩
一雨洗吳天青山淨如埽登樓候月明清風喜先到
忘形方外交適意杯中物如此了吾生何勞鍊金骨

胸中無棘榛何往非樂地懷哉安樂翁不出時有四
回仙昔曾遊相傳著靈跡不見榴皮書惡詩誰疥壁
楚氛何模糊淮山盡憔悴不知天上人誰任世閒事
青松生礪底叢桂老巖阿誰信崑崙圍春風雨露多
戶角無芒刺腰閒減帶圍吾衰人共笑復與世相違
具區耕隱歌見四卷

按季本與家藏本異

脫屣東華塵結廬太湖濱蓬蒿開小徑桑麻接比鄰金門玉堂夢
不到煙蓑雨笠情相親東風二月桃花雨布穀飛來向人語一犁
初破隴頭春黃犢出欄健如虎西山不知誰采薇南山不知誰采
芝我耕我田食我粟歲晚復有冰壺齋悲歌笑甯戚夜半猶未已
人閒閒是非何用污牛耳綠陰繫牛春晝閒樵童隨我看青山日
暮歸來一壺酒牛棘花前開笑口笑問儂家子若孫知我犁鋤佳
趣否豈不見蘇秦爲無二頃田六印纍纍苦犇走吁嗟落禍阮虛

名何足取鹿門龐眉真我友

兵後過季子廟故基

見五卷

按家藏本與季本異

延陵壤地荒榛棘延陵祠廟成瓦礫延陵野老歸弔古獨立斜陽
長太息塵埃野馬紛滿眼城郭人民半非昔恭惟秦伯吳鼻祖三
讓高風揚九土周衰列國方爭雄卓爾雲孫繩祖武麟經登載二
三策馬史揄揚千萬古況有煌煌十字碑光照暨陽墳上土於平
祠堂之毀還可屋禮讓風衰較難復漢家兄弟歌布粟唐家兄弟
相屠戮方今羣賢秉鈞軸整頓乾坤挽頽俗芳也未死當刮目
張士衡媿烏名軒又名集曰焦尾作二詩爲壽見五卷

按家藏本與季本異

嗟哉反哺烏窮林故巢傾漂搖風雨餘劬瘁骨肉情翩翩俛而啄
啞啞喜而鳴所啄奚足喜得以飼所生余昔養親日瞻烏常自懲
別來今白首見之雙眼青匪謂得所止丈人屋崢嶸爲時梟獍多

見鳥如閔會王孫金彈丸慎勿令爾驚
嗟哉焦尾桐舉世稱奇材向非蔡中郎幾作爨下灰
七絃繫朱絲攜上高高臺一彈廣陵散絕響有餘哀
箏琶佛新聲瓦釜亦鳴雷麟膠今續絃師襄復歸來
鏘鏘朱鳳吟靈風揚九垓吾方洗吾耳盤石坐莓苔
天甯寺性天僧以同袍有不相能者見五卷

按家藏本與季本異

道人踞猊牀說法如趙州奈何兔三窟不與貊一邱
風塵瀕動日草木凋零秋法幢扶未起法鼓鳴未休
本來無住著聊爾小淹留祥麟自獨角怪鳥從九頭
正須羣魔伏乃見吾道優釋門第一義坐斷聞思修

龜巢稟補遺

龜巢稟補遺

詞

陳彥真居毘陵鶴溪之陰中年以來斥斷家事黃冠羽衣倏然物外予聞而嘉之故作此以贈

如夢令
滿眼青山如畫說甚玉堂金馬頭戴鹿皮冠穿箇布袍
冬夏都罷都罷心上了無牽挂

一帶鶴溪環遶溪上石田多少春雨駕龍耕種得玉芝
瑤草堪笑海水幾翻乾了

蘿屋不經風破苔徑不教塵污魚鼓洞仙歌童子唱來
還和閒坐閒坐窗下白雲飛過

松菜酒香春甕更有麻姑相送日日瀉流霞添我胸中
鉛汞珍重珍重浮世本來如夢

江城子

賀蕭墅張克讓戊申正月九日初度生孫是日立春節也

賀蕭墅張克讓戊申正月九日初度生孫是日立春節也

阿翁初度宴重闈正熙熙醉如泥春到階庭玉樹長孫枝座客持
杯停壽曲都聽取鳳雛啼 明年蓬矢兩弧垂對佳期試周期看
取干戈俎豆弄金龜彭祖春秋應八百孫似祖與年齊

南樓令

老友劉景儀去秋以星術之書推測年命謂今春當卽世乃預
集葬具且自爲埋銘及賦詩自挽既而失去行囊之資用鬱鬱
然然康強無恙予故
作此曲戲而付之

生死隔年期劉伶老似癡動教人負鍤相隨驚得青蚨飛去了無
酒飲卻攢眉 春煖典春衣還堪醉似泥趁清明雨後遊嬉楊柳
池塘桃杏隲春水漫夕陽遲

高陽臺

題張德機荆
南精舍圖

陽羨溪山鞦韆川煙雨隱然畫裏觀詩芳草王孫別來幾度春歸最
憐屋壁藏蝌蚪化劫灰飛入昆池好階墀書帶青青竹雪霏霏
相逢共約歸期待玄龜出雒朱鳳鳴岐邱壑幽尋正須重製荷衣

斬蛟射虎都休問有白鷗堪與忘機近西枝移我龜巢憐爾漁機
沁園春

寄崑山友
人并自述

泉石膏肓塵土驅馳還家鬢霜想吟邊茗盃清風習習醉中琴操
流水洋洋口不雌黃眼無青白鳧鶴從教自短長閒居好有溪蓬
釣具林館書牀 春風賓主壺觴坐慈竹軒中挹翠香儘劇談千
古神游混沌高歌一曲興在滄浪老我牛衣懷人馬帳誰似彭宣
到後堂都傳語問魚書久絕兔穎何忙

前調

憶昔移家著處偷生廿有餘霜遭幾番驚怕青天霹靂滿懷愁悶
蒼海茫洋故步全非新知誤喜韞綫初無尺寸長龍鍾後方馬歸
伏櫪龜作檣牀 年來飲不盈觴也不愛花枝錦繡香與山僧野
老交情淡淡盤蔬盂飯清話浪浪燕子重來桃花應笑四壁空空
一草堂償詩債有隔年未了連日猶忙

前調

寄詞

每憶巖房端石玄雲宣毫紫霜想筆端風雨不時蕭颯胸中淵海
無底潢洋楓落寒江草生春夢欲說天機話甚長知音者有真能
入室好與連牀梅花窗下茶觴小團月烹來寶乳香覽吳淞夜
月珠光瑩潔崑山霽雪瓊液淋浪不出門庭那知世態金玉家家
要滿堂長安市似遺腥蠅聚采蜜蜂忙

江城子

前作五月十二日壽萬拙齋詞意有未盡
乃再歌別紙寫去為拙齋寬舒逸樂之勸

去年今日訪龐公也恩恩去城中回首青山帶雨汗顏同茅屋破
來風轉急愁殺我浣花翁今年一笑喜相逢海榴紅照簾櫳休
把閒愁牽擊廢歌鐘請看灰飛千里草金滿陽總成空

西江月

與鄧景文先生
干借姜堯章詞

十載不歌金縷秋娘已負青年朝雲飛過畫樓前無復為人留戀
默坐鷓鴣聲裏尋思白石詞仙好將花樣更流傳重觀春風人
面

蝶戀花

贈萬彥述
鷓鴣重譜

一曲求凰彈越調紅葉慙慙鳳已成雙了織翠輕裾雲縹緲多情
佩有宜男草十月小春天氣好春到南枝梅蕊含微笑珍重畫
眉人起早風流不讓張京兆

龜巢彙補遺

右龜巢彙二十卷元謝應芳撰按事蹟已見辨惑編先生遭時不
辰隱居白鶴溪構斗室顏曰龜巢因自號龜巢老人故名其集為
龜巢彙明史列傳云二十卷 四庫所收僅十七卷 提要謂詩
後有文文後又有詩序次紊亂定為傳鈔之誤有人以為前後兩
集前集十二卷後集五卷并而為一者誠傳鈔之誤也且閣本十
七卷傳是樓書目十八卷均非足本道光癸卯謝氏裔孫蘭生得
季滄葦侍御鈔本龜巢集詩文二十卷卷數與明史合上元朱明
府緒曾以為序次畫一卷數加增推為善本然蘭生止刻詩十卷
又輯補遺一卷而文則未刻丁酉從浙中修本堂得舊鈔二十卷
本原出於季氏因刊入叢書俾海內得見龜巢真本云宣統庚戌
穀雨日武進盛宣懷跋

